

NGECHUCHUARÜ NGÜEXÜGÜ GA YAMUGÜXÜÄRÜ PURACÜCHIGA

Tupana inaxuneta rü tá ínangu i Naãe i Üünexü

¹⁻² Pa Mecü Pa Teóquirux, nüxïra chaxümatüxü ga poperawa cumaã nüxü chixu ga guxüma ga Ngechuchu üxü rü duüxügüxü namaã nangüexëxü ga noxritama inaxügüãgu ga norü puracü ñuxmata yema ngunexü ga Tupana daxüguxü ga naãnewa nagaxgu. Rü yexguma tauta daxüguxü ga naãnewa naxüxgu ga Ngechuchu rü nayadexechi ga norü ngüexügü ga yamugüchaüxü na Tupanaärü puracü naxügüxücèx. Rü Tupanaãe i Üünexüärü poramaã nanangüexë ga yema duüxügü, rü namaã nüxü nixu ga tacü tá na naxüexü.

³ Rü yexguma marü yuwa ínadxëguwena ga nüma ga Ngechuchu rü 40 ga ngunexügu rü nügü nangoxëxü naxcèx ga norü ngüexügü rü muxüma ga togü ga nüxü yaxögüxü na yemaãcü nüxü nacüexgüxücèx na aixcüma wena namaxüxü. Rü namaã nüxü nixuchiga na ñuxãcü na yixixü i Tupana aëxgacü íyixüwa.

⁴ Rü yexguma yema ngüexügü ga yamugüxütanüwa nayexmagu ga Ngechuchu, rü namaã nüxü nixu ga tama nüxna na ngextá naxixücèx ga Yerucharéü. Rü ñanagürü nüxü: —Ípenanguxëx i ngëma Tupanaãe i Üünexü ga

Chaunatü pemaã ixunetaxü ga pemaã nüxü chixuchigaxü!

⁵ Aixcüma nixi ga Cuáü rü dexáwa duüxügüxü ínabaiüxêëxü, natürü i pema rü tãütáma muxü i ngunexü nangupetü na Tupanaãe i Üünexü tá pexna nguxü —ñanagürü.

Daxüguxü ga naãnewa naxü ga Ngechuchu

⁶ Rü yexguma nangutaquëxegü ga yema norü duüxügü, rü Ngechuchuna nacagü, rü ñanagürügü: —Pa Corix, ¿éxna ñoma tá nixi i ngunexü i marü ícunawoxü i nuã Yudíugüchiüñewa i torü uwanügüarü churaragü na wenaxärü tomatama namaã itacuáxüçex i ñaã tochiüãne? —ñanagürügü.

⁷ Rü Ngechuchu nanangãxü, rü ñanagürü: —Pema rü taxuçexma nüxü pecuáxchaü i ñuxgu tá nixi i ngëma ngunexü, erü Chaunatüxicatama nüxü nangëxma i pora na nüxü naxunetaxü i ngëma ngunexü i choxna naxçex peçaxü.

⁸ Natürü ngëxguma pexna nanguxgu i Tupanaãe i Üünexü, rü tá pexü naporaexëe. Rü tá ípechoxü na nüxü peyarüxugüexüçex i chauchiga i Yerucharéüwa, rü guxüma i Yudeaanewa, rü Chamáriaanewa, rü ñuxmatáta guxü i naãnewa nangu —ñanagürü.

⁹ Rü yexguma yema ñaxguwena rü nüxü ínadaunüyane ga norü ngúexügü, rü Tupana rü daxüguxü ga naãnewa Ngechuchuxü naga. Rü wüxi ga caixanexügu nayaxücu, rü yemaãcü tama wenaxärü nüxü nadaugü.

10 Rū yexguma Ngechuchuxū ínadaunüyane ga daxūwa na naxūxū, rū ngürüãchi natanüwa nangox ga taxre ga yatü ga icómüchiruxū.

11 Rū ñanagürügü nüxū: —Pa Yatügü i Gariréaanecūãx, ¿tüxcüü daxūgu íperüdaunü? Erü daatama Ngechuchu ga petanüwa yexmacü rü ñuxma Tupana daxūwa nagacü, rü ngēma ñuxma nüxū na pedauxū na ñuxãcü daxūwa naxūxū, rü ngēmaãcü tátama nixī i wena núma naxūxū —ñanagürügü.

Yudachicüü nanayauxgü ga Matía

12 Rū yema ngúexügü ga Ngechuchu imugüxū na Tupanaärü puracü naxügüxúcèx, rü nüxna ínixī ga guma mèxpúne ga Oríbunecügu ãegane. Rū Yerucharéücèx nawoegu. Rū guma ñanearü yaxū nüxna ga guma mèxpúne rü wüxi ga kilómetru nixī.

13 Rū yexguma Yerucharéüärü ñãnewa nangugügu, rü nagu nachocu ga guma ñ ga nagu napegüne. Rū dauxna naxīgü naxcèx ga yema ucapu ga taxū ga nagu napegüxū. Rū nümagü nixī ga Pedru, rü Cuáü, rü Chaütiágu, rü Aüdré, rü Piripi, rü Tumachi, rü Baturumé, rü Mateu, rü Chaütiágu ga Arupéu nane, rü Chimáü ga Iporaãécücü, rü Yuda ga Chaütiágu naëneë.

14 Rū guxūma ga nümagü rü guxüguma nangutaquëxegüxū na wüxigu nayumüxëgüxúcèx namaã ga Ngechuchueneëgü, rü ngïmaã ga María ga Ngechuchu naë, rü ñuxre ga togü ga ngexügü.

15 Rū guxūma ga yema ngunexügügu rü nangutaquëxegüxū ga yema yaxögüxū. Rū 120 nixī. Rū wüxi ga ngunexügu ga Pedru rü inachi ga norü ngãxütanüwa, rü ñanagürü:

16 –Pa Chomücügüx, marü ningu ga yema Tupanaãe i Üünexü nuxcüma Dabíxü muxü na naxümatüãxücèx nachiga ga Yuda ga namaãrü cuèxruü ixixü naxcèx ga yema duüxügü ga Ngechuchuxü iyauxgüxü.

17 –Rü tatanüxüchirèx nixi ga Yuda, rü nüma rü ta taxrüü ñaã Tupanaãrü puracüwa napuracü ga noxrix.

18 –Natürü nüma ga Yuda rü bexma Ngechuchuxü ínaxuaxü. Rü yemacèx ga ãëxgacügü rü nüxü nanaxütanü. Natürü yixcama ga Yuda rü naxcèx ínicuèx ga yema chixexü ga naxüxü, rü yemacèx nanataeguxèe ga yema díeru. Rü yemawena rü nügü nawëxnaxã rü naítanüwa nügü narütáe. Rü yexguma duüxügü nadaexügügu rü inanago, rü niwãixpütüwe rü ínayixü ga naünüta. Rü yema díeru ga nataeguxèexümaã ga ãëxgacügü rü naxcèx nataxe ga wüxi ga naãne.

19 –Rü nüxü nacuáchigagü ga guxüma ga Yerucharéücüãx, rü yemacèx Achédamagu nanaxüéga ga yema naãne. Rü ngëma nixi i “Nagüchitaü” ñaxüchiga.

20 –Rü Wiyaegüarü poperawa yemachiga nanaxümatü ga Dabí, rü ñanagürü:

“Yixrüma rü ngëma natá ya napata, rü taxúema nagu pe”,

ñanagürü. Rü toxnamana i ngëma poperawa rü ñanagürü ta:

“Rü name nixi na togue naxüxü i ngëma norü puracü”,

ñanagürü.

21-22 –Rü nuã tatanüwa nangëxmagü i ñuxre i yatügü ga guxüguma tüxü ümücügüxü ga

yexguma tatanüwa nanuxmagu ga Cori ga Ngechuchu. Rü nümagü rü tawe narüxĩ ga noxritama Cuáũ Ngechuchuxũ íbaixẽẽgu rü ñuxmata yema ngunexũ ga daxũguxũ ga naãnewa naxũxgu. Rü name nixĩ i ngẽmatanüwa na nayaxuxũ i wüxi i Yudachicüüxũ na tamücü yĩxũcèx rü tarüũ nüxũ yaxuxũcèx i ñuxãcü wena na namaxũxũ ya Ngechuchu.

²³ Rü yemawena rü nüxũ naxunetagü ga taxre ga yatügü. Rü wüxi nixĩ ga Yúche ga Yuchugu ãegaxũ ga Bachabámaã naxugũxũ. Rü Matía nixĩ ga to.

²⁴⁻²⁵ Rü ñaãcü nayumüxẽgü: —Pa Corix, cuma nüxũ cucuèx i guxũma i duũxũgüarü maxũ. ¡Rü ñuxma rü toxũ nawẽx i ngẽxũrüüxũ i cuxcèx mexũ i ñaã taxrewa na cunamuxũcèx rü nüma na naxüãxũcèx i ñaã puracü ga Yuda ítáxũ ga yexguma norü poxcuwa naxũxgu! —ñanagürügü.

²⁶ Rü wüxi ga dẽeru ga cuèxruũ ngĩxũ nañanagügü na yemawa nüxũ nacuèxgũxũcèx ga ngẽxũrüüxũ ga yema taxre tá na ixücuxũ. Rü Matíagu nangu na yangucuchixũcèx. Rü yexgumatama rü yema 11 ga duũxũgü ga Ngechuchu imugũxũtanügu naxã ga Matía.

2

Ínangu ga Tupanaãẽ i Üünexũ

¹ Rü nawa nangu ga yema Yudíugüarü peta ga Pẽtecóstegu ãegaxũ. Rü yema ngunexũgu rü guxũma ga yema yaxõgũxũ rü wüxi ga nachicawa nangutaquẽxegü.

² Rü ngürüãchi daxüwa ne naxũ ga wüxi ga naga ñoma wüxi ya buanecü ya taxüchicü icuxcugurüũ,

rü guxüne ga guma ï ga nawa nayexmagünegu nayaxüga.

³ Rü naxcèx nangox ga üxüema ga ñoma n-conügüraüxü. Rü yema üxüema rü nügüna nixīgü, rü wüxichigü ga yema yaxögüxüna ninguchigü.

⁴ Rü guxüma ga yema yexmagüxü rü Tupanaãxê ga Ünexü nüxna nangu. Rü yema Naãê i Ünexü yadexagüxêxüãcüma inanaxügüe ga to ga nagawachigü na yadexagüxü.

⁵ Rü yema ngunexügügu rü yema petacèx Yerucharéüwa nayexmagü ga muxüma ga toxnamana ne ïxü ga Yudíugü ga Tupanaga ïnüëxü ga guxü ga togü ga nachiüãnewa ne ïxü.

⁶ Rü yexguma nüxü naxïnüëgu ga ñuxãcü na yadexagüxü ga yema yaxögüxü, rü nangutaquëxegü ga muxüma ga yema duüxügü ga toxnamana ne ïxü. Rü nabaixãchiãëgü yerü yema yaxögüxü rü wüxichigü ga yema togü ga duüxügügawachigü nidexagü.

⁷ Rü yema na poraãcü nabaixãchiãëgüxüçèx, rü nügümaã rü ñanagürügü: —¿Tama êxna Gariréaanecüãx yixīgüxü i guxü i ñaã duüxügü i tagawa idexagüxü?

⁸ —¿Rü ñuxãcü êxna i nüxü ixïnüëxü i wüxichigü i yixema i taga i nawa iyaexüwa na yadexagüxü?

⁹⁻¹¹ —Yixema tixīgü i Pártiaanecüãx, rü Médiaanecüãx, rü Eraüãnecüãx, rü Mechopotámiããnecüãx, rü Yudeãanecüãx, rü Capadocháanecüãx, rü Põtuanecüãx, rü Áchiaarü naãnecüãx, rü Piríquiaanecüãx, rü Paüpíriaanecüãx, rü Equituarü naãnecüãx, rü Díbiaarü naãnecüãx i Chirenecüãx. Rü tatanüwa

nangēxma ta i duūxūgū i Crétaanewa rü Arábiaarü nañnewa ne ĩxŭ. Rŭ ñuxre i yixema rü Dumacŭāx i Yudíugü tixígü. Rŭ nuā tatanüwa nangēxma ta i Dumacŭāx i tama Yudíugü ixígüxŭ natürü tacümagu ĩxŭ. Rŭ guxāma rü nüxŭ taxīnŭē na wüxichigü i tagawachigü na yadexagüxŭ i ñāā ngúexŭgü. Rŭ tagawa tamaā nüxŭ nixugüe i ñuxācü na namexēchixŭ ya Tupana —ñanagürügü.

¹² Rŭ guxŭma poraācü nabaixāchiāēgü, rü tama nüxŭ nacuèxgü ga ñuxācü na yīxŭ ga yema. Rŭ nügüna nacagüe, rü ñanagürügü: —¿Tacüchiga nixī i guxŭma i ñāā? —ñanagürügü.

¹³ Natürü ga togü rü nüxŭ nacugüecüraxŭ, rü ñanagürügü: —Nangāxēmare rü ngēmacēx nixī i ngēmaācü yadexagüxŭ —ñanagürügü.

Pedruarü dexa

¹⁴ Rŭ yexguma inachi ga Pedru namaā ga yema 11 ga namücügü, rü tagaācüma ñanagürü: —Pa Yudíugü i nuxma Yerucharéügu naxīānexŭ rü Pa Nuācŭāxgüx, jrü dücax, meā iperüxīnŭē i ñāā tá pemaā nüxŭ chixuxŭ!

¹⁵ —Rŭ ñāā chomücügü rü tama nangāxē i pema nagu perüxīnŭēxŭrŭŭ, erü pèxmamatama nixī rü ngexwacèx 9 arü orawa nangu.

¹⁶ —Natürü ñāā ñuxma nüxŭ pedauxŭ nixī ga yema Tupanaärü orearü uruŭ ga Yoé marü nüxŭ ixuchigaxŭ ga yexguma ñaxgux:

¹⁷ “Rŭ ñanagürü ya Tupana: ‘Ngēma nawa iyacuáxŭ i ngunexŭgügu rü guxŭ i duūxŭgütanüwa tá chanamu i Chauāē i Üünexŭ, rü penegü rü pexacügü rü tá chauchigagu nidexagü. Rŭ choma rü tá chayangoxetüxēē i perü

ngextūxūxūgū rü tá nüxū nadaugū i ngēma
tá nüxū chawéxū. Rü perü yaguāxgūmaã tá
chidexa i nanegüwa.

18 Rü chorü duūxūgūtanüwa tá chanamu i Chauãẽ
i Üünexū i ngēma ngunexūgūgu, rü tá chauchigagu
nidexagü.

19 Rü naãnetüwewa tá ichanawēx i mexūgū i
taguma nüxū idauxū. Rü ñoma i naãnewa tá
ichanawēx i cuèxruūgū i nagü, rü üxüema, rü tae-
maxū.

20 Rü üèxcü rü tá nixoema rü tauemacü rü tá
nagürüü naduema naxüpa na wenaxārü núma
naxūxū ya Cori. Rü ngēma ngunexū i nagu núma
naxūxū, rü wüxi i ngunexū i mexēchixū tá nixī.

21 Rü guxāma ya yíxema Corina caxe na tüxū
nangüxēxücèx, rü tá tamaxē’ ”,
ñanagürü ga yema orewa.

22 Rü ñanagürü ga Pedru: —Pa Duūxūgū Pa
Yudíugūx, jiperüxīnūē i ñaã ore! Rü pema
rü meāma nüxū pecuèx rü Ngechuchu ga
Nacharétucūāx rü guma nixī ga wüxi ga yatü
ga Tupana pepēxewa nüxū yaxucü na Nanexūchi
yīxū. Rü yemacèx ga Tupana rü norü poramaã
nüxū nanaxüxēē ga muxūma ga mexūgū rü
cuèxruūgū ga noxri taguma nüxū idauxū.

23 —Rü Tupana pexna nanamu ga guma
Ngechuchu na pecaducèx nayuxücèx yerü
yemaãcü nanaxüxchaū ga Tupana, rü yemaãcü
nagu narüxīnū ga noxri tauta naxüxgux ga
naãne. Rü pema penamu ga yatūgū ga tama
yaxōgūxū na yayauxgūāxücèx rü curuchawa na
yapotagūāxücèx. Rü yemaãcü penayuxēē.

24 —Rü woo nayuchirēx natürü tama yexma

nayacuèx, yerü Tupana wena nanamaxëë rü ínanadaxëë. Rü yemaãcü ga yema yu rü taxuacüma marü nüxü narüporamaëëcha.

²⁵ —Yerü ga ãëxgacü ga Dabí rü Ngechuchuchigagu nidexa, rü ñanagürü:

“Guxüguma nachauxütagu ya Cori ya Tupana rü choxü narüngüxëë na taxucèxma chaxoe-gaãëxüçèx.

²⁶ Rü yemacèx marü chataãë rü taãëxü ga oremaã chidexa. Rü choma nüxü chacuèx na mexü tá choxü üpetüxü i ngëxguma chayuxgux.

²⁷ Erü cuma täütáma yuexüchicawa choxü cutèx, rü täütáma cunaxwèxe na yayixixü i chaxune i choma ya Cune ya Üüncü na chíixü.

²⁸ Marü choxü nüxü cucuèxëë i ñuxãcü tá chanayaxu i maxü i taguma gúxü, rü tá poraãcü choxü cutaãëxëë, erü chomaã tá icurüxãüx”, ñanagürü ga Dabí.

²⁹ Rü ñanagürü ga Pedru: —Pa Chaueneëgüx, rü aixcüma pemaã nüxü chixu na nayuxü ga nuxcümaücü ga tórü ãëxgacü ga Dabí, rü marü inatèx, rü ñuxma rü ta tatanüwa nangëxma i naxmaxü.

³⁰ —Natürü nüma ga Dabí rü wüxi ga Tupanaärü orearü uruü nixí. Rü yemacèx nüxü nacuèx rü wüxi ga nataa tá nixí i ãëxgacü ya Cristuxü ingucuchicü, yerü ga Tupana rü yemaãcü namaã inaxuneta.

³¹ —Rü yemacèx nuxcümaxüchima ga Dabí rü ñoma marü nüxü nadauxuchixürüü nüxü nixu rü Cristu rü tá yuwa ínarüda rü täütáma naxmaxüwa nangëxmaëcha rü täütáma niyixi i naxüne.

³² —Rü ñuxma ya Tupana rü marü wena nana-

maxēē ga guma Ngechuchu, rü guxāma ga toma rü nüxŭ tadaugü na wena namaxŭxŭ, rü ngēmacèx pemaã nüxŭ tixuchiga.

³³ —Rü Tupana rü daxŭguxŭ ga naãnewa nanaga na norü tŭgŭnecŭwawa yanatoxŭcèx. Rü Tanatü ya Tupana rü marü nüxna nanamu ga Naãē i Üünexŭ ga nuxcŭma nüxŭ yaxuxŭ rü tá nuã na namuãxŭ. Rü ñuxma ya yima Ngechuchu rü núma totanüwa nanamu i ngēma Naãē i Üünexŭ. Rü ngēma Naãē nuã üxŭ nixĩ i ñuxma nüxŭ pedauxŭ rü nüxŭ pexĩnüèxŭ.

³⁴⁻³⁵ —Rü taguma daxŭwa naxŭ ga Dabí, natürü nümatama rü ñanagürü:

“Tupana rü chorü Cori ya Cristumaã nüxŭ nixu rü ñanagürü: ‘¡Rü chorü tŭgŭnecŭwawa rŭto ñuxmatáta cuxmèxwa chanangèxmagŭxèē i curü uwanügü!’ ”

ñanagürü.

³⁶ Rü ñanagürü ga Pedru: —Name nixĩ i guxāma i pema i Yudíugü na nüxŭ pecuèxgŭxŭ rü guma Ngechuchu ga curuchawa peyapotacü, rü Tupana rü marü perü Cori ya Cristuxŭ nayaxĩxèē —ñanagürü ga Pedru.

³⁷ Rü yexguma yemaxŭ naxĩnüègu ga yema duŭxŭgü ga yéma yexmagŭxŭ, rü poraãcŭ nanaxixächiãègü. Rü Pedruna nacagüe, rü yema togü ga Pedrumücügüna rü ta nacagüe, rü ñanagürügü: —¿Rü tacü tá taxüexŭ i ñuxmax, Pa Toeneègŭx? —ñanagürügü.

³⁸ Rü Pedru nanangãxŭ, rü ñanagürü: —¡Nüxŭ perüxoe i pecüma i chixexŭ rü Tupanacèx pedaugüe rü Ngechuchuégagu ípebaiŭ na pexŭ

nūxŭ nangechaŭxŭcèx i perŭ pecadugŭ ya Tupana! Rŭ Tupana tá pexna nanamu i Naãe i Üünexŭ.

³⁹ –Rŭ ñaã Tupanaârŭ uneta, rŭ pexcèx nixĩ, rŭ pexacŭgŭcèx, rŭ guxŭ i duŭxŭgŭ i yaxŭwa ngẽmagŭxŭcèx nixĩ. Erŭ guxŭ i duŭxŭgŭ i tórŭ Cori ya Tupana nŭgŭxŭtawa naxcèx çaxŭcèx nixĩ i ngẽma uneta –ñanagŭrŭ ga Pedru.

⁴⁰ Rŭ yema oremaã rŭ muxŭma ga to ga oremaã nayaxucŭxègŭ ga Pedru, rŭ ñanagŭrŭ: – ¡Nŭxna pixĩgachi i ngẽma duŭxŭgŭ i chixexŭ ŭgŭxŭ na pema rŭ ta tama chixexŭ pexŭgŭxŭcèx! – ñanagŭrŭ.

⁴¹ Rŭ yema duŭxŭgŭ ga naga ñnŭexŭ ga yema ore ga Pedru namaã nŭxŭ ixuxŭ, rŭ ínabaiŭ. Rŭ yema ngunexŭgu rŭ poraãcŭ nayexera ga na yamuxŭ ga yema yaxŭgŭxŭ. Rŭ 3,000 ga duŭxŭgŭ nixĩ ga Ngechuchuaxŭ yaxŭgŭxŭ ga yexguma.

⁴² Rŭ yema yexwacèx yaxŭgŭxŭ rŭ guxŭguma inarŭxñnŭe ga yema ngúexŭgŭ ga Ngechuchu imugŭxŭârŭ nguxèetae. Rŭ meã nŭgŭmaã nangaugŭ ga norŭ yemaxŭgŭ. Rŭ guxŭguma nayumŭxègŭxŭ rŭ chibŭcèx nangutaquèxegŭxŭ.

Yema yaxŭgŭxŭ rŭ aixcŭma nŭgŭ nangechaxŭgŭ

⁴³ Rŭ yema ngúexŭgŭ ga Ngechuchu imugŭxŭ rŭ nanaxŭgŭ ga muxŭma ga mexŭgŭ ga Tupanaârŭ poramaã naxŭgŭxŭ. Rŭ yexguma yemaxŭ nadaugŭgu ga togŭ ga duŭxŭgŭ, rŭ poraãcŭ nabaixãchiãègŭ ga guxŭma.

⁴⁴ Rŭ guxŭma ga yema yaxŭgŭxŭ, rŭ wŭxigu narŭxñnŭe. Rŭ meã nŭgŭmaã nangaugŭ ga norŭ yemaxŭgŭ.

⁴⁵ Rû namaã nataxegüxü ga norü naãnegü rû guxüma ga togü ga norü yemaxü. Rû nügümaã ngixü nitoyegüxü ga yema dïeru yexgumarü na ñuxre natümawëxexü ga norü ònatanü ga wüxichigü.

⁴⁶ Rû guxü ga ngunexügu tupauca ga taxünewa nangutaquëxegüxü, rû chibücëx nangutaquëxegüxü ga napatagüwa, rû taãëcüma nügümaã nachibüexü.

⁴⁷ Rû guxüguma Tupanaxü nicuëxüügüxü. Rû guxüma ga yema ñãnecüãx rû nüxü nangechaügü ga yema yaxögüxü. Rû wüxichigü ga ngunexügu rû nimuëtanü ga duüxügü ga yaxögüxü, yerü nüma ga Cori ga Ngechuchu rû nüxü narüngüxëë na nayauxgüãxücëx ga norü maxü i taguma güxü.

3

Naxcëx nitaane ga wüxi ga yatü ga chixeparacü

¹ Rû wüxi ga ngunexügu ga Pedru rû Cuáü rû tomaëxpüxarü oragu ga yáuanecü rû tupauca ga taxünewa naxï, yerü yema nixï ga yumüxëärü ora.

² Rû yéma guma tupauca ga taxünewa nayexma ga wüxi ga yatü ga norü bucümatama chixeparacü. Rû guxü ga ngunexügu rû natanüxügü rû guma tupauca ga taxüneärü ñãx ga Mexëchixügu äëgaxügu nayamugüxü, na dïerucëx ínacaüüxücëx nüxna ga duüxügü ga guma tupauca ga taxünegu chocuxüxü.

³ Rû yexguma Pedru rû Cuáüxü nadëuxgux ga tupauca ga taxünegu na nachocuxü, rû guma chixeparacü rû nüxü nawémëx rû dïerucëx nüxna naca.

⁴ Rū Pedru rü Cuáũ meãma nüxũ narüdaunü, rü Pedru rü ñanagürü nüxũ: —¡Toxũ nadawenü! — ñanagürü.

⁵ Rū nūma ga yatü rü nüxũ nadawenü, yerü nūma nüxũ nacuèxgu rü chi tacü nüxna naxãgü.

⁶ Natürü ga Pedru rü ñanagürü nüxũ: —Choxũ nataxuma i dñeru. Natürü ngẽma choxũ ngẽxmaxũ tá cuxna chaxã. Rū naegagu ya Ngechuchu ya Cristu ya Nacharétucũãx cuxũ chamu, rü jinachi rü ixũ! —ñanagürü.

⁷ Rū yema ñaxguwena ga Pedru, rü norü tügünemèxëgu nayayauxãchi, rü inanachixëë, rü yexgumatama napora ga namëxtüxügüwa rü nacutügüwa.

⁸ Rū nayuxnagü rü inachi, rü inanaxügü na iyaxũxũ. Rū nūmatama iyaxũácüma Pedru rü Cuáũwe tupauca ga taxũnegu naxücu. Rū nanayuxnagüane rü Tupanaxũ nicuèxüxũ.

⁹ Rū guxũma ga duũxügü nüxũ nadaugü ga na íyaxũxũ, rü Tupanaxũ na yacuèxüxũ.

¹⁰ Rū poraãcü nañaixãchiãëgü ga duũxügü naxcèx ga yema nüxũ ngupetüxũ ga guma yatü. Yerü nüxũ nacuèxgü ga na guma yĩxũ ga tupauca ga taxũneãrü iãx ga Mexëchixũgu ãegaxũwa rütooxũchirécü rü yéma dñerucèx ícacü.

Tupaucacüwawa yexmaxũ ga chopetüchica ga Charomóũlarü Üpetüchicagu ãëgaxũwa nidexa ga Pedru

¹¹ Rū guma chixeparachirécü ga marü naxcèx yataanecü, rü tama Pedru rü Cuáũna nixügachichaũ. Rū guma tupauca ga taxũnecüwawa nayexma ga wüxi ga chopetüchica

ga “Charomóúârü Üpetüchicagu” ãegaxü. Rü yema chopetüchicawa rü Pedru rü Cuáüçèx naxïtaquẽxe ga guxüma ga duüxügü yerü poraãcü nabaixãchiãëgü.

12 Rü yexguma Pedru nüxü dèuxgu ga yema duüxügü ga yéma naxcèx ïtaquẽxegüxü, rü ñanagürü nüxü: —Pa Chautanüxüğü i Yudíugüx, ¿Tüxcüü pebaixãchie namaã i ngẽma ñã yatümaã ngupetüxü? ¿Rü tüxcüü toxü perüdaunü ñoma torü poramaã rü torü mexümaã tanamexëëxürüü?

13 —Nuxcümaügcü ga tórü oxigü ga Abráü rü Ichaá rü Acobu rü togü ga tórü oxigü rü nüxü nayaxögü ga Tupana. Rü yimatama Tupana nixï ya ñuxma Ngechuchuxü taxëëcü, na guxüârü yexera yïxüçèx. Rü gumatama Ngechuchu ya Tupanaârü ngüxëëruü ixïcü nixï ga pema ãëxgacü ga Piratuxütawa penagagücü. Rü yexguma nüxü yangéxchaügu ga Piratu, rü pema rü tama penaxwèxegü ga na yangéãxü.

14 —Pema rü tama penaxwèxe ga na ínanguxuchixü ga guma üüncü ga aixcüma mecü ga Ngechuchu, natürü naxcèx ípeca na pexcèx ínanguxuchixëãxüçèx ga wüxi ga máëtaxü.

15 —Rü yemaãcü pematama peyamèxgü ga guma Ngechuchu ya tüxü maxëxëëcü. Natürü ga Tupana rü wena nanamaxëë. Rü toma nixï ga nüxü tadaugüxü ga wena na namaxüxü.

16 —Rü ñã yatü ga chixeparachiréxü i pema nüxü pedauxü rü nüxü pecuáxü rü marü naxcèx nitaane erü Ngechuchuaxü nayaxõ. Rü ngẽma Ngechuchuaxü na yaxõõxüçèx nixï i naxcèx yataanexü ngẽma ñuxma guxãma i pema nüxü pedauxürüü.

17 –Rü dücax i ñuxma Pa Chaueneëgüx, rü yexguma pema rü wüxigu perü ãëxgacügümaã peyamëxgügu ga Ngechuchu, rü tama nüxü pecuëxgü ga tacü na pexüexü.

18 –Natürü ga Tupana rü yemaãcü nayanguxëë ga yema uneta ga nuxcüma nümatama nüxü yaxuxü nawa ga guxüma ga norü orearü uruügü. Yerü yema norü ore ga ümatüxüwa rü ñanagürü: “Cristu rü tá ngüxü ninge”, ñanagürü.

19-20 –Rü ngëmacëx, Pa Chaueneëgüx, rü name nixi i nüxü perüxoe i pecüma i chixexü, rü Tupanacëx pedaugü, rü nüxü peyaxögü na nüma pexü ínapíãxücëx i perü pepadugü. Rü ngëxguma i nüma rü tá pexü nataãëgüxëë, rü tá núma nanamu ya Ngechuchu ga noxritama naãne ixügügu pexcëx nüxü naxunetacü na perü ãëxgacü ya Cristu na yixücëx.

21 –Natürü i ñuxma rü Tupana nanaxwëxe i daxüguxü i naãnegu na naxãüxü ya Ngechuchu ñuxmatáta nüma ya Tupana wena namexëëãgu i guxüma i ñoma i naãnewa ngëxmaxü. Yerü yemaãcü nixi ga nüxü yaxuxü ga Tupana nawa ga nuxcümaügüxü ga norü orearü uruügü ga ixüünexü.

22 –Rü Moïché rü tórü oxigümaã nüxü nixu rü ñanagürü:

“Rü perü Cori ya Tupana rü petanüwa tá nüxü naxuneta i wüxi i norü orearü uruü i chauxrüü ixixü. Rü name nixi na naga pexinüëxü i guxüma i ngëma pemaã nüxü yaxuxü.

23 Rü texé ya tatanüwa tama naga ñnüxë i ngëma orearü uruü, rü tá tüxü ínatëxüchi i tatanüwa”,

ñanagürü ga Moïché.

²⁴ —Rü Chamue rü guxüma ga togü ga Tupanaärü orearü uruügü ga naweama ügüxü rü ta nüxü nixugüe ga tacü tá na üpetüxü i ñomaücüü.

²⁵ —Rü nuxcümaxüchima ga Tupana rü tórü oxi ga Abráümaã nüxü nixu rü ñanagürü:

“Rü wüxi i cutaa tá nixi i nüxü rüngüxëxü i guxüma i duüxügü i ñoma i nañecüãx”, ñanagürü. Rü yemaãcü ta Tupana inaxuneta nawa ga nuxcümaügüxü ga norü orearü uruügü. Rü pemaã nüxü chixu i ñuxma, rü pexcèx nixi ga yema unetagü ga nuxcümaügüxü ga orearü uruügüwa tórü oxigümaã nüxü yaxuxü ga Tupana.

²⁶ —Rü pemaã nüxü chixu Pa Chautanüxügü i Yudíugüx, rü yexguma Tupana wena namaxëngu ga Nane ga Ngechuchu rü petanüwaxira nanamu na pexü nangüxëxüçèx, erü nanaxwèxe i wüxichigü i pema na nüxü perüxoexü i pecümagü i chixexü —ñanagürü ga Pedru.

4

Ãëxgacügüpëxewa nayexmagü ga Pedru rü Cuáü

¹ Rü yexguma duüxügümaã íyadexagügu ga Pedru rü Cuáü, rü yexgumayane yéma nangugü ga guma tupauca ga taxüneärü purichíaarü ãëxgacü, rü paigü, rü Chaduchéugü.

² Rü Pedru rü Cuáümaã nanuë ga paigü yerü duüxügüxü nangüxëxë ga na marü wena namaxëxü ga Ngechuchu, rü naxrüü tá ta wena namaxëxü i guxüma i duüxügü i marü yuexü.

³ Rü ínanayauxü, rü poxcupataügu nanawocu ñuxmata moxüãcü, yerü marü nayáuane.

4 Natürü muxüma ga yema duñxügü ga nüxü ñnüxü ga yema Tupanaärü ore rü nayaxögü. Rü 5000 wa nangu ga yatüxüxica ixugügu.

5 Rü moxüäcü Yerucharéüwa nangutaquëxegü ga Yudíugüarü äëxgacügü namaã ga naerugü, rü ngúxëëruügü ga ore ga mugüwa nguxëëtaegüxü.

6 Rü yéma nayexma ta ga Aná ga paigüeru ixícü, rü Caipá, rü Cuáü, rü Areyáüdrü, rü guxüma ga yema togü ga paigü ga paigüerutanüxü ixígüxü.

7 Rü nanamu na naxütawa nagagüäxüçèx ga Pedru rü Cuáü. Rü yexma norü ngäxütanügu nanachigüxëë rü nüxna nacagü, rü ñnanagürügü: — ¿Texé pexü tamu, rü texé pexna tanaxã i pora na penamexëëxüçèx i ñña yatü? —ñnanagürügü.

8-9 Rü Pedruwa nayexma ga Tupanaãë ga Üünexü rü nanaporaxëë. Rü yemacèx ga Pedru rü nanangäxü, rü ñnanagürü: —Pa Ìãneärü Äëxgacügüx, rü Pa Yudíugüarü Äëxgacügüerugüx, rü ññuxma toxna naxcèx peca naxcèx ga norü mexëë i ñña chixeparachiréxü erü nüxü pecuáxchaü ga ññuxäcü na namexü.

10 —Rü ññuxma tá pemaã nüxü tixu na nüxü pecuáxüçèx i guxãma i pema rü nüxü nacuëxgüxüçèx i guxüma i tatanüxügü i Yudíugu. Rü ñña yatü i ññuxma pepëxewa ngëxmaxü rü Ngechuchu ya Cristu ya Nacharétucüäx nixi ga namexëëcü. Rü guma nixi ga pema curuchawa peyapotacü rü peyuxëëcü. Natürü ga Tupana rü wena nanamaxëë.

11 —Rü gumatama Ngechuchu nixi ga pema nüxü pexoecü. Natürü ga Tupana rü nayamucuchi na guxüarü äëgacü yixixüçèx.

12 –Rü yima Ngechuchuxicatama nixĩ ya tórü maxẽxẽẽruũ, erü yixicatama nixĩ ga Tupana nüxũ unetacü i ñoma i naanewa na tüxũ namaxẽxẽẽxũcèx –ñanagürü ga Pedru.

13 Rü yexguma yema ãẽxgacügü nüxũ daugügu ga ñuxâcü tama muẽãcüma na yadexagüxũ ga Pedru rü Cuáũ, rü nabaixãchiãẽgü, yerü nüxũ nicuèxãchitanü ga tama meã poperaxũ na yacuáxũ rü puracütanüxũmare yixĩgüxũ. Rü aixcüma nüxũ nicuèxãchitanü ga Ngechuchuarü ngüexügü na yixĩgüxũ.

14 Rü ñuxũchi nüxũ nadaugü ta ga guma yatü ga rümeçü ga Pedru rü Cuáũxũtagu na nachixũ. Rü yemacèx ga yema ãẽxgacügü rü taxuacüma ñuxũ ñanagürügüega nachiga ga yema ngupetüxũ.

15 Rü yexguma ga yema ãẽxgacügü rü ínanamuxũ ga yema ínangutaquẽxegüxũwa, rü nüxĩcatama nügümaã nidexagü.

16 Rü ñanagürügü: –¿Tacü tá namaã ixüexũ i ñaã yatügü? Erü guxũma i Yerucharéũcũãx i duũxügü rü nüxũ nacuèxgü i ngẽma mexũ i taxũ i naxügüxũ, rü taxuacüma itayacux.

17 –Naturü ngẽma na tama yexeraãcü duũxügütanüwa nanguchigaxũcèx i ngẽma ngu-petüxũ, jrü ngĩxã tanamuũẽxẽẽ na ñuxmawena rü taxúemaãma ngẽma Ngechuchuchigagu yadexagüxũcèx! –ñanagürügü.

18 Rü wenaxârü Pedru rü Cuáũcèx nacagü, rü nüxna naxãga na tama Ngechuchuchigamaã yadexagüxũcèx, rü bai i texéxũ na nangüexẽẽxũcèx i nachiga.

19 Naturü ga Pedru rü Cuáũ rü nanangãxügü, rü ñanagürügü: –¡Nagu perüxĩnũẽ i pematama! ¿Rü

namexü i Tupanapëxewa na pega taxĩnüëxü rü ëxna Tupanaga taxĩnüëxü?

²⁰ —Erü toma rü taxuacüma nüxü tarüxoe na nüxü tixuxü ga yema nüxü tadaugüxü rü nüxü taxĩnüëxü —ñanagürügü.

²¹ Rü yexguma ga yema ãëxgacügü rü nayaxãxünegü rü yemaãcü ínayamugü, yerü nataxuma ga tacücèx na napoxcueãxü rü duüxügüxü namuñë, yerü guxüma ga duüxügü rü Tupanaxü nicuèxüügü naxcèx ga yema nüxü ngupetüxü ga guma yatü ga chixeparawa rümecü.

²² Rü guma yatü ga yemaãcü Tupanaärü poramaã naxcèx itaanecü, rü 40 arü yexera nixĩ ga norü taunecü.

Yema yaxõgüxü rü Tupanaarü ngüxëëcèx ínacagü

²³ Rü yexguma marü ínামুখüãxgu, rü Pedru rü Cuáü rü namücügü íyexmagüxüwa naxĩ. Rü namaã nüxü nixugüe ga guxüma ga yema ore ga Yudíugüarü ãëxgacügü rü paigüarü ãëxgacügü namaã nüxü ixuxü.

²⁴ Rü yexguma Pedru rü Cuáüxü naxĩnüëgu ga namücügü, rü guxüma wüxigu nayumüxëgü rü Tupanamaã nidexagü rü ñanagürügü: —Pa Corix, cuma cunaxü ga daxüguxü ga naãne rü ñoma ga naãne, rü taxü i taxtü, rü guxüma i tacü i nawa ngëxmaxü.

²⁵ —Rü cumatama nixĩ ga nuxcüma Cuãë i Üünexüxü cumuxü na curü ngüxëëruü ga Dabíwa yanadexaxüçèx rü ñaxüçèx:

“¿Tüxcüü ínipurae i ñoma i naãnecüãx i duüxügü i tama yaxõgüxü? ¿Rü tüxcüü ngëma natüçèxmamare ixígüxügu narüxĩnüë i guxü i nachüãnecüãx?”

26 –Nümagü i nachiuñãnegüarü ãëxgacügü rü Tupanamaã nanuẽ, rü nügümaã nangutaquëxegü na wüxigu nügümaã nagu naxĩnüëxücèx na ñuxãcü tá nüxü na nayexeragüxücèx ya Cori ya Tupana rü Nane ya nüxü naxunetacü ya Cristu”, ñanagürü.

27 –Rü aixcüma nixĩ ga ñoma ga ñãnewa ga ãëxgacügü ga Erode rü Piratu ga nangutaquëxegüxü namaã ga to ga nachiuñãnegücüãx rü totanüxü ga Yudíugü, na chixexü naxügüxücèx namaã ya curü ngüxëëruü ya üüncü ya Ngechuchu ya Cristuxü nüxü cuxunetacü.

28 –Rü yemaãcü ga nümagü rü nayanguxëë ga guxüma ga yema cuma nuxcü mama nagu curüxĩnüxü rü nüxü cuxunetaxü rü tá na yanguxü.

29 –¡Rü dücax, Pa Corix, cuma nüxü cucuèx na ñuxãcü toxü naxãxünegüxü! Toma nixĩ i curü ngüxëëruü rü tanaxwëxe na toxü cuporaexëëxü na tama tamuñëãcüma nüxü tixuxücèx i curü ore.

30 –¡Rü curü poramaã nameëxëë i duüxügü i idaaweexü! ¡Rü duüxügüxü nawëx i cuëxruü rü i curü poramaã cuxüxü i naegagu ya curü ngüxëëruü ya üüncü ya Ngechuchu! – ñanagürügü.

31 Rü yexguma yumüxëwa nüxü nachauegu, rü guma ipata ga nawa nangutaquëxegüne rü naxĩãxãchi. Rü Tupanaãë i Üünexü rü nüxna nangu ga guxüma. Rü tama namuñëãcüma nüxü nixügüe ga Tupanaãrü ore.

Yema yaxõgüxüãrü yemaxügü rü guxüãrü nixĩ

³² Rū namu ga yema yaxōgūxū. Rū guxūma rū wūxigu narūxīnūē. Rū taxuūma nagu narūxīnū ga noxrūxicatama na yīxū ga norū yemaxūgū, natūrū guxūma ga namücūgūmaā nangau.

³³ Rū yema ngúexūgū ga Ngechuchu imugūxū na Tupa-naārū puracū naxūgūxūcèx, rū Tupanaārū poramaā nūxū nixugūe ga ñuxācū wena na namaxūxū ga Cori ga Ngechuchu. Rū Tupana rū poraācū nūxū narūngūxēē ga guxūma ga yema yaxōgūxū.

³⁴⁻³⁵ Rū natanūwa rū nataxuma ga wūxi ga nūxū nataxuxū, yerū guxūma ga yema nūxū yexmaxū ga naānegū rū ēxna ĩpatagū, rū namaā nataxegū. Rū yema dīēru ga ngīxū nayauxgücū rū yēma ngīxū nangegū, rū yema ngúexūgū ga Ngechuchu imugūxūna ngīxū nayaxāgū. Rū ñuxūchi nūgū ngīxū ninuūxū ga ñuxrechigū nūxū nataxuxū ga wūxichigū.

³⁶ Rū nayexma ga wūxi ga yatū ga Lebítanūxū ga Chiprecūāx ga Yúchegu āegacū. Rū yema ngúexūgū ga Ngechuchu imugūxū na Tupanaārū puracū naxūgūxūcèx rū Bernabémaā nanaxugū. Rū ngēma naega, rū: “Taāēxēēruū”, ñaxūchiga nixī.

³⁷ Rū nūma ga Bernabé rū nūxū nayexma ga wūxi ga naāne, rū namaā nataxe. Rū yema ngúexūgū ga Ngechuchu imugūxūxūtawa ngīxū nana ga yema dīēru.

5

Ananiā rū Chacúraarū pecaduchiga

¹ Rū nayexma ga wūxi ga yatü ga Ananíãgu ãegaxŭ rü Chacuíra ga namèx. Rū nūmagü rü namaã nataxegü ga wūxi ga norü naãne.

² Natürü nūma ga Ananía rü namèxmaã wūxigu nagu narüxĩnue na nügüxŭ ngĩxne nayauxgüxŭ ga ñuxre ga yema naãnetanü. Rū ñuxŭchi yema ngúexŭgü ga Ngechuchu imugüxŭxŭtawa ngĩxŭ nangegü ga yema nūxŭ íyaxücü.

³ Rū yexguma ga Pedru rü ñanagürü nūxŭ: — Pa Ananíãx, ¿tüxcüŭ ngoxo i Chatanága cuxĩnü rü Tupanaã i Ūñexŭmaã quidora, rü cugüxŭ ngĩxne cuyaxu i ñuxre i ngẽma curü naãnetanü?

⁴ —¿Éxna yexguma tauta namaã cutaxegu, rü tama éxna cuxrü yĩxŭ ga yema naãne? ¿Rü yexguma namaã cutaxegu, tama éxna cuxrü yĩxŭ ga yema díeru na ngĩxŭ cuguxêexŭcèx i ngẽma cuma cunaxwèxexŭãcũma? ¿Tüxcüŭ i cunaxüxŭ i ñaã? Tama yatügümaãxĩca quidora, natürü Tupanamaã rü ta nixĩ i quidoraxŭ —ñanagürü ga Pedru.

⁵ Rū yexguma yema orexŭ naxĩnügu ga Ananíã, rü yuxŭma inayangu. Rū poraãcuxŭchima namuŭê ga guxŭma ga yema duŭxŭgü ga yexguma yemaxŭ nacuáchigagügu.

⁶ Rū ñuxre ga yéma yexmagüxŭ ga ngextüxŭxŭgü rü nanayauxgü ga naxŭne, rü nananuquegü, rü inayatèxgü.

⁷ Rū tomaẽxpŭx ga ora ngupetüxgu rü íngu ga namèx. Rū yexma ixücu natürü tama nūxŭ icuèx ga tacü na ngupetüxŭ.

⁸ Rū Pedru ngĩxna naca, rü ñanagürü: —¿Yema natanü ga ipexunetaxŭgu yĩxŭ ga namaã petax-

egüxŭ ga perü naãne? –ñanagürü. Rŭ ngĩma rŭ: – Ngŭ, ngëxgumaëxpŭxgu nixĩ –ngĩgürügü.

⁹ Rŭ Pedru rŭ ñanagürü ngĩxŭ: –¿Tŭxcüŭ pegümaã ngëmaãcŭ wŭxigu perŭxĩnŭë na namaã pidoraexŭcèx i Tupanaãë i Üünexŭ? ;Dŭcèx, ngëma cutexŭ iyatèxgŭxŭ rŭ marü Ínangugŭ, rŭ ñŭxma rŭ cuxŭ rŭ tá ta ngema nangegŭ! –ñanagürü.

¹⁰ Rŭ yexgumatama yŭxcüma Pedrupëxegu iyangu. Rŭ yexguma nachocuxgu ga yema ngextŭxŭxŭgŭ, rŭ yŭxcüma ngĩxŭ inayangaugŭ. Rŭ ngĩxŭ nayauxgŭ, rŭ ngĩtexŭtagutama ngĩxŭ nayatèxgŭ.

¹¹ Rŭ yexguma nüxŭ nacuèxgŭgu ga yema ngu-petŭxŭ, rŭ guxŭma ga yema yaxŏgŭxŭ rŭ yema togŭ ga duŭxŭgŭ rŭ ta poraãcŭxŭchima namuŭë.

Tupanaärü poramaã nanaxŭgŭ ga muxŭma ga mexŭgŭ

¹² Rŭ yema ngúexŭgŭ ga Ngechuchu imugŭxŭ, rŭ duŭxŭgŭpëxewa nanaxŭgŭ ga muxŭma ga mexŭgŭ ga Tupanaärü poramaã naxŭgŭxŭ. Rŭ inanawëxgŭ ga muxŭma ga cuèxruŭgŭ. Rŭ guxŭma ga yema yaxŏgŭxŭ rŭ guxŭguma naxŭtaquëxegŭxŭ nagu ga yema tupauca ga taxŭnewa yexmaxŭ ga chopetŭchica ga Charomóŭärü Üpetŭchicagu äegaxŭ.

¹³ Rŭ yema togŭ ga duŭxŭgŭ ga tama yaxŏgŭxŭ rŭ namuŭë na yema yaxŏgŭxŭtanŭgu naxŭgŭxŭ, natŭrŭ poraãcŭ yema yaxŏgŭxŭxŭ nangechaŭgŭ.

¹⁴ Rŭ nimuëtanüãma ga yema yaxŏgŭxŭ yerü muxŭma ga duŭxŭgŭ ga yatŭxŭgŭ rŭ ngexŭgŭ rŭ Coriaxŭ nayaxŏgŭetanü.

15 Rū nūma ga duūxūgū rū ïtamūgūgu naya-mugūxū ga idaaweexū naxchápenūūmaã rū norū caruūgūmaã na yexguma Pedru yéma üpetūxgu, rū naxchipetamare nūxū na nachixūcèx.

16 Rū yexgumarū ta rū yéma naxïtaquēxegūxū ga muxūma ga duūxūgū ga Yerucharéūārū ngaicamana imugūne ga ïānewa ne ïxū. Rū yéma naxcèx nanagagūxū ga yema idaaweexū rū yema ngoxoāxgūxū. Rū guxūma naxcèx nitaanegū.

Pedru rū Cuāīwe ningēxūtanū ga paigū

17 Rū yexguma ga guma paigūeru rū guxūma ga yema natanūxūgū ga Chaduchéugū rū poraācū nixāūxāchigū naxcèx ga yema mexūgū ga naxūgūxū ga yema ngúexūgū ga Ngechuchu imugūxū.

18 Rū yemacèx norū purichíagūxū namu na ïnayauxūāxūcèx ga yema ngúexūgū. Rū ïāneārū poxcupataūgu nanapoxcue.

19 Natūrū Coriarū orearū ngeruū ga daxūcūāx naxcèx nayawāxna ga yema poxcupataūārū ïāxgū ga chūtacū. Rū ïnanamuxū, rū ñanagūrū nūxū:

20 —¡Ngēma tupauca ya taxūnewa pexī, rū guxū i duūxūgūmaã nūxū pixu na ñuxācū Tupana in-axāxū i ngexwacaxūxū i maxū! —ñanagūrū.

21 Rū yexguma ga yema ngúexūgū ga Ngechuchu imugūxū rū naga naxīnūē ga yema ore. Rū moxūācū ga pèxmamaxūchi rū tupauca ga taxūnewa naxī, rū duūxūgūxū nangúexēē. Rū yoxni ga guma paigūeru rū natanūxūgū, rū nanangutaquēxexēē ga guxūma ga yema togū ga āēxgacūgū ga āēxgacūgūtücumūwa ügūxū. Rū poxcupataūwa nanamugū ga purichíagū na

yagagüãxücèx ga yema ngúexügü ga Ngechuchu imugüxü.

22-23 Rû yexguma poxcupataüwa nangugügu ga yema purichíagü, rû taxuxüxüma inayan-gaugü. Rû nayawoegu, rû nüxü nayarüxugüe, rû ñanagürügü: —Yima poxcupataü rû narüwãxta, rû meãma nataichirëx, rû purichíagü nüxna nadaugü i naãxwa. Natürü ngëxguma tayawãxnagu, rû tax-uxüxüma itayangaugü i aixepewa —ñanagürügü.

24 Rû yexguma yema orexü naxĩnüëgu ga yema paigüeru rû yema togü ga paigü ga ãëxgacügü ixīgüxü rû yema tupauca ga taxüneärü purichíagüarü ãëxgacü rû guxüma nabaixãchiãëgü yerü tama nüxü nacüëxgü ga ngextá tá na nanguxü ga guxüma ga yema rû ñuxãcü tá na iyanaxoxëëgüãxü.

25 Rû yexguma yemagu ínaxĩnüëyane rû yéma nangu ga wüxi ga yatü, rû namaã nüxü nixu, rû ñanagürü: —Ngëma yatügü i pepoxcuechirëxü, rû tupauca ya taxünewa nangëxmagü, rû ínanangüexëë i duüxügü —ñanagürü.

26 Rû yéma naxĩ ga tupauca ga taxüneärü purichíagüarü ãëxgacü wüxigu namaã ga norü purichíagü na yagagüãxücèx. Natürü namuüë na duüxügü nutamaã yamuxütanüxü, rû yemacèx meãmare yema ngúexügüxü nigagü.

27 Rû yexguma namaã ínangugügu, rû yema ãëxgacügüpëxewa nanagagü. Rû yema paigüeru rû namaã nidexa rû ñanagürü nüxü:

28 —Marü poraãcü pexna tanachüxu na tama ngëma Ngechuchuégamaã penangüexëëxücèx. Natürü i pema rû guxüne ya Yerucharéüwa

penangúexēē i duŭxŭgŭ, rŭ ñuxŭchi toxna penaxuxchaŭ ga na togagu nayuxŭ ga yema Ngechuchu —ñanagŭrŭ.

29 Rŭ Pedru rŭ namŭcŭgŭmaã nanangãxŭgŭ, rŭ ñanagŭrŭgŭ: —Narŭmemaē nixŭ na Tupanaga taxŭnŭēxŭ rŭ tama i yatŭgŭga.

30 —Guma Tupana ga nuxcŭmaŭgŭxŭ ga tŭrŭ oxigŭ nŭxŭ yaxŭgŭcŭ, rŭ guma nixŭ ga wena namaxēēcŭ ga Ngechuchu ga pema peyamácŭ ga yexguma curuchawa peyapotagŭgu.

31 —Natŭrŭ Tupana rŭ nanataxēēãma, rŭ nŭgŭarŭ tŭgŭnecŭwawa nanatoxēē. Rŭ tŭrŭ cuēxruŭ rŭ maxēxēēruŭ nayangucuchixēē na tatanŭxŭgŭ i Yudŭgŭxŭ nangŭxēēxŭcèx na nŭxŭ naxoexŭcèx i norŭ chixexŭgŭ, rŭ Tupana nŭxŭ nŭxŭ nangechaŭxŭcèx i norŭ pecadugŭ.

32 —Rŭ toma nŭxŭ tacuèx na aixcŭma yŭxŭ i guxŭma i ngēma pemaã nŭxŭ tixuxŭ erŭ tomatama nŭxŭ tadaugŭ. Rŭ ngēxgumarŭŭ ta i Tupanaãē i Ŭnŭxŭ i Tupana tŭxna ãxŭ ya yŭxema naga ñnŭēxē, rŭ nŭxŭ nacuèx na aixcŭma yŭxŭ —ñanagŭrŭgŭ.

33 Rŭ yexguma yemaxŭ naxŭnŭēgu ga yema ãēxgacŭgŭ, rŭ poraãcŭxŭchima nanuē, rŭ nanadaixchaŭ.

34 Natŭrŭ yema ãēxgacŭgŭtanŭwa nayexma ga wŭxi ga Parichéu ga Gamarié ga naēga. Rŭ nŭma rŭ meãma nanangúexēē ga Tupanaãrŭ mugŭ. Rŭ guxŭma ga duŭxŭgŭ rŭ nŭxŭ nangechaŭgŭ. Rŭ nŭma ga Gamarié inachi rŭ nanamu na paxaãchi ínamuxŭãxŭcèx ga yema ngúexŭgŭ ga Ngechuchu imugŭxŭ.

35 Rū ñuxũchi namücügü ga ãëxgacügümaã nüxũ nixu rü ñanagürü: —Pa Chautanüxũx, ¡pexuãëgü na tacü tá namaã pexüexũ i ñaã yatügü!

36 —Rü nüxna pecuëxãchie ga ũpa ga ñuxãcü ãëxgacüxũ nügü ningucuchixëëchaũ ga Teudá. Rū nügütama nixu na wüxi ga tacü na yĩxũ. Rū maneca 400 naguxũ ga yatügü nawe narüxĩ. Natürü churaragü nayamëxgü, rü nayu. Rū guxũma ga yema nawe rüxĩxũ rü nangĩachi, rü yexma nayarüxo ga guxũma.

37 —Rü yixcūra ínangu ga to ga yexguma tachiũãneärü ãëxgacü duũxũgüxũ ixugügu, rü yema nixĩ ga Yuda ga Gariréaanecũãx ga ãëxgacüxũ nügü ingucuchixëëchaũxũ. Rū nayaxucüxëgü ga duũxũgü rü nawe narüxĩ ga ñuxre. Natürü yemaxũ rü ta nimëxgü rü nayu. Rū guxũma ga yema nawe rüxĩxũ rü nangĩachi.

38 —Rü ngëmacèx i ñuxma rü pexũ chaxucüxë na peyangëxgüxũ i ñaã yatügü, rü tama penapox-cuexũ. Erü ngëxguma nagagutama yixĩgu i ngëma nūma naxügüxũ, rü tá inayarüxo.

39 —Natürü ngëxguma Tupanaärü yixĩgu i ñaã naxügüxũ, rü taxuacüma ipeyanaxoxëë. ¡Rü pexuãëgü na tama ngürüachi Tupanamaã yĩxũ i penuëxũ! —ñanagürü. Rū guxũma ga yema ãëxgacügü rü naga naxĩnüë ga yema norü ucüxë.

40 Rū ñuxũchi nanachocuxëë ga yema ngúexũgü ga Ngechuchu imugüxũ. Rū nayaçuaixgü. Rū nüxna naxãga na tama Ngechuchuchiga yadex-agüxũcèx. Rū yemawena rü nayangëxgü.

41 Rū yema ãëxgacügüna ínixĩ ga yema ngúexũgü. Rū nataãëgü yerü woetama Tupana nanaxwèxe ga

yemaãcü Ngechuchucèx ngúxũ na yangegüxũ.

⁴² Rũ guxũ ga ngunexũgu tupauca ga taxũnewa rũ İpatagüwa, rũ nanangúexẽẽãma, rũ nüxũ nixugüetanũ ga ore ga mexũ ga Ngechuchu ya Cristuchiga.

6

Yema ngúexũgü ga Ngechuchu imugüxũ rũ nüxũ naxuneta ga 7 ga yatügu na nüxũ nangüxẽẽgüxũcèx ga Tupanaãrũ puracüwa

¹ Rũ yexgumaücüü rũ yexeraãcü nimuchigü ga yema duüxügu ga yaxõgüxũ. Rũ natanüwa nayexmagü ga Yudiügüchirèx ga Griéguanewa ne İxũ rũ Griégugawa idexagüxũ. Rũ nayexma ta ga yaxõgüxũ ga Yudiügü ga Yerucharéücüãx ga woetama nagawa idexagüxũ. Rũ yema yaxõgüxũ ga Griégugawa idexagüxũ rũ nidexagüecha nachigagu ga yema yaxõgüxũ ga Yerucharéücüãxgü İxİgüxũ, rũ ñanagürügü: –Totanüwa yutegüxe rũ tama meã õna tüxna naxãgüxũ i ngëxguma õna İnaxãgüüxgu i wüxichigü i ngunexũgu –ñanagürügü.

² Rũ yexguma ga yema 12 ga ngúexũgü ga Ngechuchu imugüxũ rũ guxũma ga yema yaxõgüxũxũ nangutaquëxexẽẽgü, rũ ñanagürügü nüxũ: –Tama name na İtanangéxũ i Tupanaãrũ orearü uchiga i tomax na õnamaã İtacuáxũcèx.

³ –Rũ ngëmacèx, Pa Tomücügüx, rũ İNaxcèx pedèux i petanüwa ya 7 ya yatügu ya guxãma nüxũ ngechaücü, rũ meã naãëxũ cuácü, rũ aixcüma Tupanaãë i Üünexũ nawa ngëxmacü! Rũ toma tá nüxna tanaxã i ngëma puracü na nümagü õnamaã İnacüèxgüxũcèx.

4 –Rü ngëxguma i toma rü yumüxëwa rü Tupanaärü orearü uchigawaxicatama tá tapuracüe –ñanagürügü.

5 Rü yexguma ga guxüma ga yema duüxügü rü: –Ngü –ñanagürügü naxcèx ga yema ore. Rü nüxü naxunetagü ga Etébaü ga meã yaxöcü rü aixcüma Tupanaãe i Üünexü nawa yexmacü, rü Piripi, rü Pócoro, rü Nicanúru, rü Timú rü Paruménu, rü Nicuráchi ga Aütioquiácüãx ga tauta Ngechuchuaxü yaxöõgu Yudíugücüma yaxucü.

6 Rü yema ngúexügü ga Ngechuchu imugüxüxütawa nanagagü. Rü nümagü naxmëxmaã nüxü yangöögüãcüma naxcèx nayumüxëgü.

7 Rü yema Tupanaärü ore rü yexeraãcü nixüchigü. Rü poraãcü nimuëtanü ga yema yaxögüxü ga Yerucharéüwa. Rü woo muxüchixüma ga Yudíugüarü paigü rü ta Ngechuchuaxü nayaxögü.

Etébaüxü niyauxgü

8 Rü Etébaü nixí ga wüxi ga yatü ga Tupana poraãcü nüxü rüngüxëëcü rü naporaxëëcü na duüxügütanüwa naxüãxüçèx ga mexügü ga taxügü rü cuèxruügü ga Tupanaärü poramaã naxüxü.

9 Rü nayexma ga wüxi ga ngutaquëxepataü ga Yudíugüarü ga Ínguxüxüãrü Ngutaquëxepataügu ãegane. Rü gumawa nangutaquëxegü ga duüxügü ga üpaacü corigümëxëwa yexmagüxü. Rü ñuxre ga guma ngutaquëxepataüçüãx rü wüxigu namaã ga ñuxre ga Chireneãnecüãx, rü Aleyãdríaanecüãx, rü Chiríchiaanecüãx, rü Áchiaarü

nañnecüãx, rü inanaxügüe ga Etébaũmaã na iyaporagatanücüüxü.

¹⁰ Natürü taxuacüma Etébaũxü narüyexeragü, yerü nüma ga Etébaũ rü nidexa namaã ga yema cuèx ga Tupanaã i Üünexü nüxna ãxü.

¹¹ Rü yexguma ga yema duũxügü rü togüaxü nanaxütanügü na Etébaũchiga doraxü yaxugüxcèx. Rü ñanagürügü ga yema idoraegüxü: –Toma nüxü taxĩnüègu, rü Moĩchéchiga rü Tupanachigamaã chixexü ga ore nixugü ga Etébaũ –ñanagürügü.

¹² Rü yemaãcü nananuèxèè ga duũxügü rü Yudíugüarü ãèxgacügüerugü rü ngüexèèruügü ga ore ga mugüwa ngüxèètaegüxü. Rü yemacèx Etébaũcèx nibuxmü, rü nayayauxgü, rü ãèxgacügüerugü íngutaquèxegüxüwa nanagagü.

¹³ Rü naxcèx nadaugü ta ga yatügü ga doraxü ixugüemarexü rü yema rü ñanagürügü: –Ñãã yatü rü guxüguma chixexümaã nidexa i nachigagu ya daa tupauca ya taxüne, rü nachigagu i Tupanaãrü mugü.

¹⁴ –Rü toma rü nüxü taxĩnüè rü:

“Yima Ngechuchu ya Nacharétucüãx rü tá nanangutaũxèè ya daa tupauca, rü tá inayanaxoxèè i nacümagü ga Moĩché tüxü ngüexèèxü”, –ñanagürügü.

¹⁵ Rü yexguma Etébaũxü nadaunügu ga guxüma ga yema ãèxgacügü ga yéma rütogüxü, rü nüxü nadaugü ga nachametü rü wüxi ga daxü-cüãx ga orearü ngeruũchametürüü na yĩxü.

Etébaũrũ ore

¹ Rũ nüma ga paigüeru, rũ Etébaũna naca rũ ñanagürũ: —¿Aixcũma yĩxũ i ñaã ore i nüxũ yaxugüexũ? —ñanagürũ.

² Rũ Etébaũ nanangãxũ, rũ ñanagürũ: —Pa Chautanũxũ Pa ãẽxgacügũx, ¡Choxũ iperũxĩnũ! Guma Tupana ya mexêchicũ, rũ nuxcũmaũcũ ga tórũ oxĩ ga Abráũcèx nangox ga yexguma Mechopotámiããrũ naãnegu naxãchiũgu ga yexguma tauta Aráũãrũ naãnewa naxũxgu na yexma yaxãchiũxũcèx.

³ —Rũ Tupana rũ ñanagürũ nüxũ:
 “¡Nüxna ixũ i cuchĩũãne rũ cutanũxũ, rũ ngẽma choma tá cuxũ nüxũ chadauxẽẽxũ i naãnewa naxũ!”
 ñanagürũ.

⁴ —Rũ yexguma ínaxũxũ ga Abráũ nawa ga yema Cadéucũãxãrũ naãne ga ngextá noxri ínaxãchiũxũwa, rũ Aráũãrũ naãnegu nayaxãchiũ. Rũ yexguma nanatũ yuxguwena, rũ ñoma ga naãne i ñuxma nagu pexãchiũxũwa naxũ, yerũ yemaãcũ Tupana núma nanaga.

⁵ —Natürũ yexguma rũ ta taxuũma ga noxrũxũchi ga naãne nüxna naxã ga Tupana i ñoma i naãnewa, rũ bai ga íraxũ ga noxrũxũchi ga naãne. Natürũ Abráũmaã inaxuneta ga yixcama tá nüxna na naxããxũ ga ñoma i naãne na noxrũxũchi yĩxũcèx, rũ yixcama marũ nayuxguwena rũ nanegũarũ na yĩxũcèx. Rũ yemaãcũ Abráũmaã inaxuneta ga woo na nangexacũxũ ga yexguma.

⁶ —Rũ ñanagürũ Abráũxũ ga Tupana:
 “Rũ yixcama i cutaagũ rũ tá to i nachĩũãne i tama noxrũ ixĩxũwa nangẽxmagũ. Rũ

ngẽma nachiuãnecũãx i duũxügü rü norü duũxügüxũ tá nayaxĩgüxẽẽ. Rü 400 ya taunecü rü ngẽma duũxügü rü tá chixri namaã nachopetü i cutaagü.

⁷ Natürü choma tá chanapoxcue i ngẽma nachiuãnecũãx i norü duũxügüxũ yaxĩgüxẽẽxũ. Rü ngẽmawena i cutaagü rü tá ínachoxũ nawa i ngẽma naãne, rü nuã ñaã i naãnewa tá choxũ nicuèxüügü”, ñanagürü ga Tupana.

⁸ –Rü yexguma Tupana rü Abráũ rü nügümaã nanamexẽẽ, rü ñanagürü ga Tupana:

“Choma rü tá cuxũ charüngüxẽẽ ega cuma rü guxũma i cutanüxügü ípewiũchèxmüpẽxechiraũgu. Rü ngẽma tá nixĩ i cuèxruũ i yigümaã imexẽẽxũ”,

ñanagürü ga Tupana. Rü nabu ga wüxi ga nane ga Abráũ, rü Ichaágu nanaxüéga. Rü yexguma ⁸ ga norü ngunexũwa nanguxgu ga Ichaá, rü nümatama ga Abráũ rü ínanawiechèxmüpẽxechiraũ. Rü yexguma marü nayèxgu ga Ichaá rü nabu ga nane ga Acobu, rü nümatama ga Ichaá rü ínanawiechèxmüpẽxechiraũ. Rü yixcama marü nayèxgu ga Acobu rü nüxũ nayexma ga 12 ga nanegü. Rü nümatama ga Acobu rü ínanawiechèxmüpẽxechiraũ ga guxũma ga yema 12 ga nanegü. Rü yema 12 ga nanegü nixĩ ga yema 12 ga nuxcümaũgüxũ ga tórü oxigü.

⁹⁻¹⁰ –Rü yema 12 ga Acobu nanegü ga tórü oxigü ixĩgüxũtanüwa rü wüxi rü Yúche nixĩ ga naega. Natürü naëneëgü ga guma Yúche rü nixãũxãchie, rü yemacèx Equituarü naãnewa ìxũ ga taxetanüxũxũ Yúchemaã nataxegü na Equituarü

naãnewa nagagüãxücèx. Natürü Tupana rü Yúchemañ nayexma, rü nüxũ narüngüxêẽ na tama pecadu naxüxücèx ga yexguma guxchaxüwa nayexmagu. Rü nüxna nanaxã ga cuèx, rü Yúchexũ narüngüxêẽ ga meã na nayauxãxücèx ga Equituaneãrũ ãëxgacü ga Faraũ. Rü yemacèx ga Faraũ rü ãëxgacüxũ nayangucuchixêẽ. Rü nüma ga Yúche nixĩ ga ãëxgacü ga Faraũpatawa rü guxũma ga yema nachiuãnewa. Rü Faraũxĩcatama nixĩ ga Yúchearu yexera na ãëxgacü yĩxũ ga yema naãnewa.

11 –Rü yexgumaücüü nayexma ga taiya ga guxũ ga Equituarü naãnewa rü Canaããrũ naãnewa. Rü poraãcü taiya nüxũ nangux ga duũxũgü. Rü yemacèx ga yema nuxcümaũgüxũ ga tórü oxigü rü düxwa taxuacüma nüxũ inayangaugü ga nabü ga Canaããrũ naãnewa.

12 –Natürü yexguma nüxũ nacuáchigaxgu ga Acobu ga na nayexmaxũ ga nabü ga Equituanewa, rü yéma nanamugü ga nanegü ga guma tórü oxigü ixĩgücü. Rü yema nixĩ ga nawa inaxügüxũ ga noxrima nabücèx Equituanewa na naxĩxũ.

13 –Rü yixcama marü naguxgu ga yema nabü rü wenaxãrũ Equituanewa naxĩ nawa ga nabü. Rü yexguma wenaxãrũ yéma naxĩxgu ga naëneëgü, rü nügü nixu ga Yúche namaã. Rü yexguma nüxũ nacuèx ga Faraũ ga ngextácüãx na yĩxũ ga Yúche.

14 –Rü yixcamaxũra ga Yúche rü tümacèx nangema ga nanatü rü guxũma ga natanüxũ. Rü maneca 75wa nangu ga yema duũxũgü ga Yúchetanüxũ.

15 –Rü yemaãcü Equituanewa naxũ ga Acobu na yexma yaxãchiüxücèx. Rü yexma nayu ga nümax. Rü yexma nayue ta ga nanegü ga tórü oxigü.

16 –Rü yexguma nayuxgu ga Acobu, rü Chiquéüwa nanangegü ga naxüne na yexma yatëxgüãxücèx nagu ga yema naxmaxü ga Abráü dīērumaã naxcèx taxexü ga Amú nanegüxütawa ga Chiquéüwa.

17 –Rü düxwa nawa nangu na Equituanewa ínanguxüxücèx ga tatanüxü ga yexgumarüü ga Tupana Abráümaã ixu-netaxü. Rü yexguma rü marü poraãcü nimu ga tatanüxü ga Equituanewa.

18 –Rü yexguma ningucuchi ga to ga Equituanearü ãëxgacü ga tama Yúchechigaxü cuáxü.

19 –Rü yema ãëxgacü rü tatanüxüxü nawomüxëë rü chixri tümamaã naxüpetü ga guxema nuxcümaüğüxe ga tórü oxigü. Rü tüxü namu na yexwaca buexe ga tümaxãcüğüxü ítawogüxü na tayuexücèx.

20 –Rü yexgumaücüü nabu ga Moíché, rü Tupanaãxü nangúchaü. Rü tomaëxpüx ga tauemacü nüxna tadaugü ga tümapatawa ga naë rü nanatü.

21 –Rü yexguma düxwa ítanatëxgügu, rü Faraüxãcü inayaxu, rü ngīnexü inayaxëë.

22 –Rü yemaãcü Moíchéxü nanguxëëgü ga guxüma ga Equituanecüãxãrü cuèx. Rü nüma ga Moíché rü wüxi ga ãëxgacü ga poracü nixĩ, rü norü dexawa rü ta napora.

23 –Rü yexguma 40 ga norü taunecüwa nanguxgu ga Moíché rü nagu narüxĩnü ga natanüxügü ga Yudíugütanügu na naxüãneãxü.

24 –Rü nüxü nadau ga wüxi ga Equituanecüãx ga wüxi ga Yudíuxü na naçuaxixü. Rü yemacèx ga Moíché rü yema Yudíuétüwa ínayuxu, rü yema Equituanecüãxü nimèx rü nanayuxëë.

25 –Rü nüma ga Moïché nagu rüxĩnügu rü chi natanüxügü ga Yudiügü rü chi nüxũ nacuèxgü na Tupana yéma namuxũ na ínguxũxēēãxũcèx. Natürü tama nüxũ nacuèxgüega ga yema natanüxügü.

26 –Rü moxũãcü ga Moïché rü nüxũ nadau ga to ga taxre ga Yudiügü ga nügü yexma dèixũ, rü nüxna nachogüchaũ. Rü ñanagürü nüxũ:

“Pema rü pegütanüxügü pixĩgü. ¿Rü tüxcüũ pegü pedai i pemax?” ñanagürü.

27 –Rü yexguma ga yema namücxũ ícuaxixũ rü Moïchéxũ natèxnetá, rü ñanagürü nüxũ:

“¿Texé cuxũ tamu na toeru quiĩxũcèx rü tomaã icucuáxũcèx?

28 –¿Éxna choxũ quimáxchaũ ta, ga ñne quimáxũ ga Equituanecũãxrüũ?” ñanagürü.

29 –Rü yexguma yemaxũ naxĩnügu ga Moïché, rü niña ga yema naãnewa. Rü Madiáũãnewa naxũ. Rü yema nachiũãne ga tama noxrü ixĩxũgu nayaxãchiũ. Rü yexma naxãmèx rü nabu ga taxre ga nanegü.

30 –Rü 40 ga taunecüguwena ga dauxchitawa ga Chinaĩ ga mèxpúneãrü ngaicamana, rü wüxi ga naĩxètaxacü ga yéma iyauraxũwa Moïchécèx nangox ga wüxi ga Tupanaãrü orearü ngeruũ ga daxücxãx.

31 –Rü nabaixãchiãe ga Moïché ga yexguma nüxũ nadèuxgu. Rü naxcèx nixũ rü nüxna nangaicama na meã nüxũ nadauxũcèx. Rü yexguma Moïchémaã nidexa ga Cori ga Tupana, rü ñanagürü nüxũ:

32 “Choma nixĩ i curü oxigüarü Tupana chiĩxũ rü Abráũ rü Ichaá rü Acobuarü Tupana

chiixũ”,
ñanagürü. Rü yexguma ga Moïché rü inanaxügü ga
norü muũaã na yaduruxũ. Rü namuũ ga yexma
na nadawenũxũ.

³³ —Rü yexguma ga Cori ga Tupana rü ñanagürü
nũxũ:

“¡Inacuaixũ i curü chapatu erü ñãã naãne i nagu
cuchixũ rü naxũüne, erü chanuxma!

³⁴ Choma rü ngóxũwama nũxũ chadau i ñuxãcü
poraãcü ngúxũ na yangegũxũ i chorü duũxügü i
Equituanewa. Rü nũxũ chaxĩnü i na naxauxexũ.
Rü ngẽmacèx núma chaxũ na íchananguxũxẽxũcèx.
¡Nuã naxũ na Equituanewa cuxũ chamuxũcèx!”,
ñanagürü.

³⁵ —Rü woo ga noxri ga nümagü ga natanũxügü rü
guma Moïchéxũ naxoe ga yexguma ñagügu:

“¿Rü texé cuxũ tamu na toeru quiixũcèx rü
tomaã icucuáxũcèx?” ñagügu, natürü ga Tupana
rü yema nanamuãma na yema duũxügũxũ
íanguxũxẽxũcèx rü norü ãẽxgacü na yĩxũcèx. Rü
yemaãcü Moïchéxũ namu ga Tupana ga yexguma
naxũtawa namuãxgu ga yema norü orearü
ngeruũ ga yema naĩxẽtaxacü ga iyauraxũwa
naxcèx ngóxũ.

³⁶ —Rü Moïché nixĩ ga Equituarü naãnewa
ínagaxũxũ ga nuxcũmaũgũxũ ga tórü oxigü. Rü
Equituanewa, rü Dauchiũxũ ga Taxtũwa, rü
dauxchitawa ga ngextá taxúema íxãpataxũwa
inanawẽx ga cuèxruũgü, rü nanaxü ga mexũ
ga taxũgü ga Tupanaãrũ poramaã naxũxũ. Rü
yemaãcü 40 ga taunecü nũxũ na rü-ngũxẽẽ ga
yema duũxügü.

37 –Rü nümatama ga Moïché nixĩ ga tatanüxügü ga Yudiügümaã ñaxũ:

“Tupana rü yixcûra tá pexcèx nüxũ naxuneta i petanüwa i wüxi i norü orearü uruũ ga yexgumarüũ ga choxũ na naxunetaxürüũ”, ñanagürü.

38 –Rü nümatama ga Moïché nixĩ ga nuxcümaügüxũ ga tórü oxigümaã nangutaquëxexũ ga yema naãne ga ngextá taxúema ixãpataxüwa. Rü tórü oxigümaã nayexma ga Chinaĩ ga mèxpúnewa ga yexguma namaã yadeaxgu ga Tupanaärü orearü ngeruũ ga daxüçüãx. Rü nümatama ga Moïché nixĩ ga nayauxãxũ ga Tupanaärü ore i maxëxëeruũ na nüxĩ tüxna naxããxüçèx.

39 –Natürü ga tórü oxigü rü tama naga naxĩnüëchaũ ga guma Moïché. Rü Ínanatëxüchigüama, rü Equituaneguama narüxĩnüãëgü.

40 –Rü tórü oxigü rü Moïchéeneë ga Arãũxũ ñanagürügü: “¡Rü toxcèx naxü i tupanachicünèxãgü na nawe tarüxixüçèx! Erü tama nüxũ tacuèxgü i tacü nüxũ na üpetüxũ i ngëma Moïché ga Equituanewa tüxũ yagagüxũ”, ñanagürügü.

41 –Rü yexguma nanaxügü ga wüxi ga wocaxacüchicünèxã norü tupanaxũ. Rü ñuxüchi naxcèx nanadai ga ñuxre ga carnerugü na yemamaã nüxũ yacuèxüũgüxüçèx. Rü wüxi ga peta naxcèx naxügü ga yema wocaxacüchicünèxã ga nümatama naxügüxũ.

42 –Rü yemacèx ga Tupana rü nüxna nixügachi ga yema duüxügü. Rü Ínanawogü na woramacuri rü üèxcü rü tauemacümaã natupanaãxëëãxüçèx.

Yerü yemaãcü Tupanaãrü orearü uruügüarü poperagu naxümatü, rü ñanagürü:

“Pema, Pa Yudiugüx, ¿Chauxcèx yĩxũ ga penadèixũ ga carnerugü ga yexguma 40 ga taunecü dauxchitawa ga ngextá taxúema íxãpataxũwa peyexmagügu?

⁴³ Tama aixcüma chauxcèx nixĩ yerü ga pema rü ngextá ípexĩxũwa rü ípenangeexũ ga napata ga perü tupananeta ga Moro rü ípenangeexũ ga perü tupananeta ga Refããrü woramacurichicünèxã. Rü yemaãcü pegümaã ípenangeexũ ga yema tupanane-tachicünèxãgü ga pematama pexügüxũ na nüxũ picuèxüügüxücèx. Rü ngẽmacèx i ñuxma rü perü naãnewa tá pexũ íchawoxũ rü yaxũwa i Babiróniããrü yexerawa tá pexũ chamugü”, ñanagürü ga Tupana ga yema orewa.

⁴⁴ —Rü yema naãne ga ngextá taxúema íxãpataxũwa rü tórü oxigü nüxũ nayexma ga wüxi ga ípata ga naxchirunaxcèx ga nagu namaã nanguxüğüne ga Tupanaãrü mugü ga nutagu ümatüxũ. Rü guma ípata ga naxchirunaxcèx nixĩ ga nüxũ nawéãcüma Tupana Moĩchéxũ naxüxèxene.

⁴⁵ —Rü yexguma nayuxguwena ga Moĩché, rü Yochué ningucuchi ga ãëxgacü na yĩxũ. Rü tórü oxigü rü nuã tórü naãnewa nanangegü ga guma ípata ga naxchirunaxcèx ga yexguma Yochuémaã napugüãgu ga ñaã naãne nüxna ga yema duüxüğü ga Tupana íwoxüxũ napëxewa ga tórü oxigü. Rü núma nayexma ga guma ípata rü ñuxmata Dabí ingucuchigu ga ãëxgacü na yĩxũ.

⁴⁶ —Rü guma ãëxgacü ga Dabí rü Tupana rü poraãcü namaã nataãe, rü nüxũ narüngüxèe. Rü núma ga Dabí rü Tupanana naxcèx naca

na naxüãxüçèx ga wüxi ga tupauca ga taxüne
ga nawa Tupanaxü na yacuèxüügüxüçèx ga
tatanüxügü ga Acobutaagü.

47 –Natürü Dabí nane ga Charumóu nixí ga naxücü
ga guma tupauca ga Tupanacèx ixíxüne.

48 –Natürü ya Tupana ya tacüxüchima rü tama
duüxügü üxüne ya tupaucagümaã naxãpata. Rü
yemacèx ga Tupana rü nuxcümaücü ga norü ore-
arü uruüwa rü ñanagürü:

49-50 “Choma nixí ya ãëxgacü ya tacüxüchima,
rü daxüguxü i naãne nixí i chorü tox-
maxwèxeruü ixíxü rü ñoma i naãne nixí i
chorü chicutüruü ixíxü. ¿Rü ñuxücürüwa i
nagu perüxínüëxü tá na penaxüxü ya wüxi
ya tupauca ya chaugu mexüne?”

ñanagürü ga Cori ya Tupana. Rü ñanagürü ta ga
Tupana:

“¿Tama ëxna choma yíxü ichanaxüxü ga guxüma i
tacü i ngëxmaxü? ¿Rü ñuxäcü chi penaxüxü
i wüxi i nachica i nagu charüngüxü?”

ñanagürü ga norü orewa.

51 Rü ñanagürü ga Etébaü: –Düçèx Pa Æëxgacügüx,
pema rü guxüguma nüxü pexoe i Tupanaärü ore,
rü tama iperüxínüëchaü. Rü peãëwa rü tama
peyaxögüchaü. Rü pema rü guxüguma Tupanaãë
i Ünexümaã penuëëcha. Yema nuxcümaügüxü ga
perü oxigürüütama pixígü i pemax.

52 –Rü perü oxigü rü chixeäcüma namaã na-
chopetü ga guxüma ga Tupanaärü orearü uruügü.
Rü nanadai ga yema orearü uruügü ga nüxü
ixuchigagüxü ga na núma naxüxü tá ga guma
mecü ya Ngechuchu. Rü yexguma ínanguxgu ga

guma Ngechuchu rü pema Piratuna penamu rü penayuxẽ.

⁵³ —Rü woo pema rü Tupanaãrũ orearũ ngeruũgũ ga daxũcũãxũtawa penayaxu ga Tupanaãrũ ore, natürũ tama naga pexĩnüẽ —ñanagürũ ga Etébaũ.

Nayu ga Etébaũ

⁵⁴ Rü yexguma nüxũ naxĩnüẽgu ga yema ore, rü nanuẽxũchiana ga yema duũxũgũ. Rü norũ numaã Etébaũcèx nixũxchapütägũ.

⁵⁵ Natürũ ga Etébaũ rü aixcũma Tupanaãẽ i Üünexũ nawa nayexma. Rü daxũ nadawenũ, rü nüxũ nadau na ñuxãcü namexẽchixũ ga Tupana. Rü nüxũ nadau ga Ngechuchu ga Tupanaãrũ tũgũneguama chicũ.

⁵⁶ Rü yexguma rü ñanagürũ: —Nüxũ chadau i na yangoxnaãchixũ i naãnetũwe, rü nüxũ chadau ya Cristu ya Tupana Nane ya duũxũxũ ixĩcü ya Tupanaãrũ tũgũneguama chicũ —ñanagürũ ga Etébaũ.

⁵⁷ Natürũ nümagũ rü nügũ narütütamachixẽgũ, rü tagaãcü aixta naxũeãcüma nüxna nayuxgũ.

⁵⁸ Rü ínanagaxũchigũ ga ñãnewa, rü nutagũmaã ínamuxũchigũ. Rü yéma nayexma ga wũxi ga ngextũxũxũ ga Chaurugu ãegaxũ. Rü yemaxũ nanawotanũ ga norũ gáuxũchirugũ ga ínacũxuchigũxũ ga yema duũxũgũ ga Etébaũxũ imèxgũxũ.

⁵⁹ Rü yexguma nutamaã ínamuxũchigũãguyane, rü nayumũxẽ ga Etébaũ rü ñanagürũ: —Pa Cori Pa Ngechuchux, ¡Nayaxu i chauãẽ! —ñanagürũ.

⁶⁰ Rü yemawena rü inacaxãpũxũ, rü tagaãcü aixta naxũ, rü ñanagürũ: —Pa Cori Pa Tupanax, ¡Tãxũ i ñãã pecaducèx cunapoxcuexũ i ñãã

duŭxügü! –ñanagürü. Rŭ yexguma yema ñaxguwena rŭ nayu.

8

Chauru rŭ guxema yaxögüxewe ningëchigü na tüxŭ napoxcuexüçèx

¹ Rŭ Chauru rŭ norü me nixĩ ga Etébaŭxŭ na yamèxgüxŭ. Rŭ yematama ngunexügu rŭ norü uwanügü rŭ inanaxügüe ga na poraäcü nawe yangëxŭtanüxŭ ga yema yaxögüxŭ ga Yerucharéŭwa yexmagüxŭ. Rŭ düxwa ga guxŭma rŭ Yudéaanegu rŭ Chamáriaanegu nügü nawoone. Rŭ yema ngüexügü ga Ngechuchu imügüxŭxicatama ínayahügü ga Yerucharéŭwa.

² Rŭ ñuxre ga yatügü ga meäma Tupanaäxŭ yaxögüxŭ rŭ nanayauxgü ga Etébaŭxŭne, rŭ inanatèxgü rŭ poraäcü naxçèx naxauxe.

³ R yexguma ga Chauru rŭ chixri tümamaã naxüpetü ga guxema yaxögüxe. Rŭ tümapatagu nixücuchigü na tüxŭ ínayauxŭxŭçèx. Rŭ yéma tüxŭ ínátüxŭ ga yatügü rŭ ngexegü, rŭ ñuxŭchi poxcupataŭgu tüxŭ nawocu.

Chamáriawa nüxŭ nixuchiga ga Tupanaärü ore i mexŭ

⁴ Rŭ yema yaxögüxŭ ga Chauruchaxwa ibuxmüxŭ ga Yerucharéŭwa, rŭ guxŭwama ga ngextá ínaxixŭwa rŭ nüxŭ nixuchigagü ga ñuxäcü Ngechuchu tüxŭ na maxëxëxŭ.

⁵ Rŭ Piripi nixĩ ga wüxi ga yema orexŭ ixuchigacü. Rŭ nüma rŭ ñäne ga Chamáriawa naxŭ, rŭ yéma inanaxügü ga Cristuchigaxŭ na yaxuxŭ.

6 Rū yema duūxŭgŭ ga Chamáriacŭãx, rū Piripicèx nangutaquëxegŭ. Rū guxŭma meãma inarŭxĩnŭë ga yema ore ga namaã nüxŭ yaxuxŭ, yerŭ nüxŭ nadaugŭ ga yema mexŭgŭ ga taxŭgŭ ga Tupanaãrŭ poramaã naxŭxŭ ga Piripi.

7 Rū muxēma ga duūxēgŭ ga ngoxogŭ tŭmawa yexmaxē rū tŭmacèx nitaanegŭ. Rū yema ngoxogŭ rū tagaãcŭ aita naxŭeãcŭma tŭmawa ínachoxŭ. Rū yexgumarŭŭ ta rū muxēma ga nawãixãchigŭxe rū chixeparagŭxe rū tŭmacèx nitaanegŭ.

8 Rū yemacèx poraãcŭ nataãëgŭ ga guxŭma ga duūxŭgŭ ga guma ããne ga Chamáriawa.

9 Natŭrŭ guma ããnewa nayexma ga wŭxi ga yatŭ ga Chimáúgu ãëgaxŭ ga ñuxre ga taunecŭ norŭ yuŭmaã duūxŭgŭxŭ womŭxëëxŭ ga guma ããnewa. Rū nügŭ nixu ga na wŭxi ga tacŭxŭ cuáxŭ na yĩxŭ.

10 Rū guxŭma meãma nüxŭ inarŭxĩnŭë woo ga buxŭgŭ rū yaxŭgŭ. Rū ñanagŭrŭgŭ: —Ñãã yatŭ rū aixcŭma nüxŭ nangëxma i Tupanaãrŭ pora i taxŭ —ñanagŭrŭgŭ.

11 Rū naga naxĩnŭë ga duūxŭgŭ, yerŭ mucŭma ga taunecŭ rū norŭ yuŭmaã nanawomŭxëë.

12 Rū Piripi rū yema duūxŭgŭmaã nüxŭ nixu ga ore ga mexŭ ga Ngechuchu ya Cristuchiga, rū ñuxãcŭ na ãëxgacŭ yĩxŭ ya Tupana. Rū yexguma yema ore yaxŭgŭga ga duūxŭgŭ, rū Piripi ãnabaiŭxëë ga yatŭxŭ rū ngexŭgŭ.

13 Rū nümatama ga Chimáú rū ta nayaxŭ, rū ãnabaie. Rū ãnaxŭgŭ ga Piripixŭ na naxŭmŭcŭxŭ. Rū yexguma nüxŭ nadëuxgu ga yema cuèxruŭgŭ rū mexŭgŭ ga taxŭ ga Tupanaãrŭ poramaã naxŭxŭ ga Piripi, rū poraãcŭ naãaixãchiãë ga

Chimáũ.

¹⁴ Rũ yema Ngechucharũ ngúexũgũ ga Yerucharéũwa yexmagũxũ rũ nüxũ naxĩnũéchiga ga meã na nayauxgũãxũ ga Tupanaãrũ ore ga Chamáriawa. Rũ yemacèx yéma nanamugũ ga Pedru rũ Cuáũ.

¹⁵ Rũ yexguma Chamáriawa nangugũgu ga Pedru rũ Cuáũ, rũ naxcèx nayumũxẽgũ ga yema yexwaca yaxõgũxũ ga duũxũgũ, na nayauxgũãxũcèx ga Tupanaãẽ i Üünexũ.

¹⁶ Yerũ yexguma noxri yaxõgũãgu ga yema duũxũgũ rũ Piripi marũ ínanabaiũxẽẽmare naegagu ga Cori ga Ngechuchu, natürũ taxuxũnata nangu ga Tupanaãẽ i Üünexũ.

¹⁷ Rũ yemacèx ga Pedru rũ Cuáũ naxmẽxmaã nüxũ ningõgũgũ ga yema yaxõgũxũ, rũ yexguma nanayauxgũ ga Tupanaãẽ i Üünexũ.

¹⁸⁻¹⁹ Rũ nüxũ nadau ga Chimáũ ga na duũxũgũna nanguxũ ga Tupanaãẽ i Üünexũ ga yexguma Pedru rũ Cuáũ naxmẽxmaã yema duũxũgũxũ yangõgũgũgu. Rũ yemacèx dïeru Pedru rũ Cuáũna ngĩxũ naxãxchaũ ga Chimáũ rũ ñanagürũ nüxũ: — ¡Choxna rũ ta penaxã i ngẽma pora, na yixema tüxũ chingõgũxe rũ ta tüxna nanguxũcèx i Tupanaãẽ i Üünexũ! —ñanagürũ.

²⁰ Rũ yexguma ga Pedru rũ ñanagürũ nüxũ: — ¡Cuxrũõtama iyanataxux i curũ dïeru, erũ ngĩmaã naxcèx cutaxechaũ i Naãẽ i Üünexũ i Tupana tüxna mumarexũ!

²¹ Cuma rũ taxucürüwama cunayaxu i ngẽma pora, erũ curũ maxũ rũ tama name i Tupanapẽxewa.

22 ¡Nüxü rüxo i ngêma curü chixexü, rü Tupanana naxcèx naca na cuxü nüxü nangechaüxcèx! Rük bexmana tá cuxü nüxü nangechaü i ngêma chixexü i cuãêwa nagu curüxñnüxü.

23 Erü nüxü chacuèx rü poraãcü cunuãêwèxe, rü ngêma curü chixexü rü cumaã inacuèx rü ñoma cupoxcuxürüü cuxü nixixêẽ –ñanagürü.

24 Rük Chimáü nanangãxü, rü ñanagürü: –¡Pema Tupanana chaucèx peça na tama choxü nangu-petüxcèx i ngêma nüxü pixuxü! –ñanagürü.

25 Rük Pedru rü Cuáü rü yema Chamáriaanecüãx ga duüxügümaã nüxü nixugüe ga Cori ga Ngechuchuchiga, rü namaã nüxü nixugüe ga Tupanaärü ore. Rük yemawena rü Yerucharéücèx nawoegu. Rük namawa rü muxüne ga Chamáriaanewa yexmane ga ñanexãcügüwa rü nüxü nixuetanü ga Tupanaärü ore i mexü.

Piripi rü namagu nüxü nangau ga wüxi ga ãëxgacü ga Etiópiaanecüãx

26 Rük yemawena, rü Tupanaärü orearü ngerüü ga daxücüãx rü Piripimaã nüxü nixu, rü ñanagürü: –¡Rük paxa inaxüãchi rü ñane ya Gachawaama naxü nawa i ngêma nama i Yerucharéüwa ne daxü rü Gachawa iyarügoxü! –ñanagürü. Rük ngêma nixi i nama i dauxchitawa i ngextá taxüema íxãpataxüwa dapetüxü.

27 Rük inaxüãchi ga Piripi rü yema namawa naxü. Rük yexma nügü nangau namaã ga wüxi ga yatü ga Etiópiaanenanguxü ga guxcüma ga yema ãëxgacüarü dñeru. Rük ñneãcü Yerucharéüwa naxü na Tupanaxü yanacuèxüüxcèx.

28 Rū nachiũñecèx nataegu, rü norü autu ga cowaru itúchigünewa narüto. Rū nawa ningúchigü ga yema ore ga Tupanaãrü orearü uruũ ga Ichaxía ümatüxũ.

29 Rū Tupanaãe i Üünexũ rü Piripixũ ñanagürü: —¡Paxa naxcèx ixũ i ngẽma autu! —ñanagürü.

30 Rū paxa yema autucèx niña ga Piripi. Rū yexguma naxütawa nanguxgu rü nüxũ naxĩnü ga na Tupanaãrü orearü uruũ ga Ichaxía ümatüxũ ga orewa nangúxũ ga yema ãëxgacü. Rū yexguma ga Piripi rü nüxna naca rü ñanagürü nüxũ: —¿Nüxũ cucuáxũ i tacüchiga na yĩxũ i ngẽma nawa cungúxũ? —ñanagürü.

31 Rū nūma ga ãëxgacü ga Etiópiaanecũãx rü nanangãxũ, rü ñanagürü: —¿Ñuxücürüwa i nüxũ chacuáxũ ega taxúema chomaã inanguxũxëëgux? —ñanagürü. Rū Piripicèx naca na naxĩnagüxücèx, rü naxütawa na natoxücèx.

32 Rū yema nawa yangúchigüxũ ga Tupanaãrü ore ga ümatüxũ, rü ñanagürü:

“Rü ñoma wüxi i carneru i norü mèxwa nagagüxürüũãcü nayagagü. Rū wüxi i carneruxacü i ngẽma yayoxtèxagüxüpèxewa tama aita üxürüũ nachianemare, rü taxu ñanagürü.

33 Rū yexguma duũxügü poraãcü chixri namaã chopetügu rü taxúema naetüwa tachogü. ¿Rü texé tá meã nachiga tidexa ga yema duũxügü ga yemaãcü poraãcüxüchima chixexũ ügüxũ? Yerü nayamèxgü na nataxuxücèx i norü maxũ i ñoma i naãnewa”, ñanagürü ga yema ore ga nawa nangúxũ.

34 Rū Piripina naca ga yema ãëxgacü ga

Etiópiānecūāx, rü ñanagürü: —¡Chomañ nūxū ixu! ¿Rü texéchigagu nixī ga yadexaxū ga yema Tupanaārū orearū uruū? ¿Nügüchigagutama rü ěxna toguechigagu? —ñanagürü.

³⁵ Rü yexguma nanangāxū ga Piripi. Rü yematama ore ga ümatüxūmañ inanaxügü na namañ nūxū yaxuxū ga ore i mexū ga Ngechuchuchiga.

³⁶ Rü yixcamaxūra ga yexguma inaxīyane, rü dexá íyexmaxūwa nangugü. Rü ñanagürü ga yema āēxgacü: —Nuñ nangēxma i dexá. ¿Rü tama ěxna inamexū na nuñ choxū ícubaixēēxū? —ñanagürü.

³⁷ Rü ñanagürü ga Piripi: —Ngēxguma aixcūma meāma cuyaxōxgux, rü marü name i na cuxū íchabaixēēxū —ñanagürü. Rü nanangāxū ga yema āēxgacü, rü ñanagürü: —Ngēmāācü chayaxō na Ngechuchu ya Cristu yīxū ya Tupana Nane —ñanagürü.

³⁸ Rü yexguma ínayachaxāchixēē ga norü autu, rü wūxigu dexáchiüwa nachoū. Rü Piripi ínanabaixēē ga yema āēxgacü.

³⁹ Rü yexguma dexáwa ínachoōchigu, rü Tupanaāē i Üünexū rü Piripixū niga. Rü yema āēxgacü rü marü tama wena Piripixū nadau. Natürü taāēācü namagu nixū.

⁴⁰ Natürü Achotowa nayangox ga Piripi. Rü yema ñānewa inaxūāchi, rü nūxū nixuchigü ga ore i mexū ga guxūma ga ñānewa ñuxmata Checharéaarü naānewa nangu.

9

Ngechuchuaxū nayaxō ga Chauru

1-2 Rū yoxni ga Chauru rü daimaã nayaxãũnechigüama ga yema duũxügü ga Cori ga Ngechuchuaxũ yaxögüxũ. Rū yemacèx paigüeruxütawa naxũ, rü naxcèx nüxna naca ga popera ga nüxna ãgaxũ na Yudiügüarü ngutaquëxepataügü ga Damacuwa yexmagünegu yaxücuchigüxücèx rü yexma tümacèx nadauxücèx ga guxema yaxögüxe ga yatüxe rü ngexegü na Yerucharéüwa tüxũ nagagüxücèx rü yexma tüxũ yapoxcuexücèx.

³ Natürü yexguma marü Damacuxũ yangaicagu, rü ngürüãchi meãma nüxũ nabáxi ga wüxi ga omü ga poraxũ ga daxüwa ibáxixũ.

⁴ Rū ñaxtüanegu nayangu ga Chauru, rü nüxũ naxĩnü ga wüxi ga naga ga nüxna çagüxũ ga ñaxũ: —Pa Chauru Pa Chaurux, ¿tüxcüü i chowe quingëchigüxũ? —ñaxũ.

⁵ Rū Chauru nanangãxũ, rü ñanagürü: —¿Rü texé quixĩ, Pa Corix? —ñanagürü. Rū nüma ga Cori rü nanangãxũ rü ñanagürü: —Choma nixĩ i Ngechuchu, rü chorü duũxügü nixĩ i ngëma nawe quingëchigüxũ.

⁶ ¡Rü inachi, rü ngëma Damacuarü ñãnewa naxũ! Rū ngëma rü wüxi ya yatü tá cumaã nüxũ nixu na tacü tá cuxüxũ —ñanagürü.

⁷ Rū yema yatügü ga Chauruxũ íxümücügüxũ, rü inayanguãëgü, yerü nüxũ naxĩnüë ga yema ore natürü taxúexüma nadaugü.

⁸ Rū ñuxüchi inachi ga Chauru ga ñaxtüanewa ga íyanguxüwa, rü nidauchixetü, natürü taxuüma nadau yerü nixoxetü. Rū yemacèx ga namücügü, rü nachacüügu nayayauxãchi, rü yemaãcü Damacuwa nanagagü.

9 Rū tomaēxpūx ga ngunexūgu, rū nangexetū, rū tama nachibū, rū tama naxaxe.

10 Rū Damacuwa nayexma ga wūxi ga yatū ga Ngechuchuaxū yaxōxū ga Ananíã ga naega. Rū Cori ya Ngechuchu naxcèx nangox, rū ñanagürü nüxū: —Pa Ananíãx —ñanagürü. Rū nüma ga Ananíã nanangãxū, rū ñanagürü: —¿Tacü? Pa Corix —ñanagürü.

11-12 Rū nüma ga Cori nanangãxū, rū ñanagürü: —¡Dücèx, ngēma ítamū i Meã i Wéxūgu ãegaxūwa naxū! ¡Rū ngema Yudapatawa naxcèx ínaca i wūxi i yatū i Tarsucūãx i Chaurugu ãegaxū! Rū nüma rū ngema ínayumūxē rū nangoxetū rū marū cuxū nadau, Pa Ananíãx, na ngēxma cuxücuxū rū naxētūgu quingōgūxū na wena yadauchixūcèx —ñanagürü ga Cori ga Tupana.

13 Rū yexguma yemaxū naxīnūgu ga Ananíã, rū ñanagürü: —Pa Corix, muxūma i duūxūgū chomaã nüxū nixu i ngēma yatūchiga na ñuxre i chixexū naxūxū namaã i curū duūxūgū i Yerucharéūwa.

14 Rū ñuxma rū paigüarū ãëxgacügüarū mumaã núma naxū na ínayauxūãxūcèx i guxūma i duūxūgū i cuégagu yumūxégūxū —ñanagürü.

15 Natürü nüma ga Cori rū ñanagürü nüxū: —¡Ngema naxū! Erū choma chanayaxu i ngēma yatū na choxū yaxuchigaxūcèx namaã i togū i nachiūñanecūãxgū i duūxūgū rū norū ãëxgacügü, rū ngema Iraécūãxgü.

16 Rū choma tá nüxū nüxū chadauxēē i ñuxre i ngúxū i tá yangexū i chauxcèx —ñanagürü ga Cori.

17 Rū guma ĩpata ga Chauru nawa yexmanewa naxū ga Ananíã. Rū nagu naxücu, rū nüxū ningōgü, rū ñanagürü nüxū: —Pa Chaueneē

Pa Chaurux, nūma ya Cori ya Ngechuchu ga guma namawa cuxcèx ngócü ga yexguma núma cuxũxgu, rü núma choxũ namu na wenaxârü quidauchixũcèx, rü cuxna nanguxũcèx i Naãe i Üünexũ –ñanagürü.

¹⁸ Rü yexgumatama rü ñoma tacüchicutêxerüü naxêtüwa ínayi, rü yexguma wenaxârü meã nidauchixetü. Rü yexguma inachi ga Chauru, rü Ananíã Inanabaixẽẽ.

¹⁹ Rü yemawena nachibü, rü wenaxârü naporã. Rü ñuxre ga ngunexũgu yexma Damacugu narüxãũx namaã ga yema yaxõgüxũ ga yexma ãchiũgüxũ.

Chauru rü Damacuwa nüxũ nixu ga Ngechuchuchiga

²⁰ Rü yexguma inanaxügü ga Chauru ga ngutaquêxepataũgüwa nüxũ na yaxuchigaxũ na Ngechuchu yiixũ ya Tupana Nane.

²¹ Rü guxũma ga yema nüxũ ñnüexũ rü porãcü nabaixãchiãëgü, rü ñnanagürügü: –¿Tama êxna ñãã yatü yiixũ ga Yerucharéüwa íyayauxũgüxũ ga guxũma ga duũxügü ga Ngechuchuaxũ yaxõgüxũ? ¿Rü tama êxna ñããtama yiixũ ga yema núma üxũ na ínayauxũãxũcèx rü ññuxũchi paigüarü ãëxgacüxũtawa nagagüãxũcèx i duũxügü i yaxõgüxũ? –ñnanagürügü.

²² Natürü ga Chauru rü guxũ ga ngunexũgu yexeraãcü tama namuũãcüma nüxũ nixuchigaama ga ore ga Ngechuchuchiga. Rü inayanangeëxgüxẽẽ ga Yudíugü ga Damacuwa yexmagüxũ, yerü meãma nanangoxẽẽ na Cristu yiixũ ga Ngechuchu.

Chauru rü Yudíugü- chaxwa niña

23 Rū marū muxūma ga ngunexüğü ngupetüguwena rū yema Yudiüğü rū wüxigu nügümaã nagu narüxĩnüē na Chauruxü yamèxgüxücèx.

24 Natürü nūma ga Chauru rū nüxü nacuáchiga ga na yamèxgüchaũãxü. Rū yema Yudiüğü rū ngunecü rū chütacü rū guma ãñeãrū poxeguxũãrū ãxgügu Chauruxü nanèixgüxü na yamèxgüãxücèx.

25 Natürü ga Chauruarü ngúexüğü rū chütacü rū wüxi ga pexchi ga tacügu guma ãñeãrū poxeguxũtapüxétüwa Ínanaçhüxüetaüğüama, rū yemaãcü niña ga Chauru.

Yerucharéüwa nayexma ga Chauru

26 Rū yexguma Yerucharéüwa nanguxgu ga Chauru, rū yema yaxögüxümaã nangutaquëxechaũ. Natürü yema yaxögüxü rū nüxü namuũē, yerü nūma nüxü nacuèxgügu rū tama aixcüma Ngechuchuaxü nayaxõ.

27 Natürü Bernabé rū yema ngúexüğü ga Ngechuchu imugüxũtanüwa nanagaama. Rū yema ngúexüğümaã nüxü nixu ga ñuxãcü Cori ya Ngechuchuxü na nadauxü ga Chauru ga namawa, rū ñuxãcü Cori namaã na idexaxü. Rū nüxü nixu ta ga ñuxãcü Damacuwa rū tama namuũãcüma nüxü na yaxuxü ga Ngechuchuchiga.

28 Rū yemaãcü ga Chauru rū Yerucharéügu narüxãũx. Rū yema ngúexüğü ga Tupana imugüxũtanügu naxã. Rū tama namuũãcüma Cori ya Ngechuchuchigaxü nixuchigü.

29 Rū yema Yudiüğü ga Griégugawa idexagüxümaã nidexaxü ga Chauru, rū

Ngechuchuchigagu nügümaã nayaporagaexũ. Natürü ga nūmagü rü naxcèx nadaugüama ga ñuxãcü tá na yamèxgüãxũ.

³⁰ Rū yexguma nūxũ yacuèxãchitanügu ga yema togü ga yaxōgüxũ, rü Checharéawa Chauruxũ nagagü. Rū yexguma yéma nangugügu rü wüxi ga wapurugu nayamuëgü rü Tarsuwa naxũ.

³¹ Rū yexguma rü meãma nūxũ naxüpetü ga yema yaxōgüxũ ga guxũma ga Yudéaanewa, rü Gariréaanewa rü Chamáriaanewa. Rū yexeraãcü meã nayaxōgüetanü rü aixcüma Tupana naxwèxexũãcüma meã namaxë. Rū Tupanaãë i Üünexũârü ngüxëëmaã nimuëtanüãma ga yema yaxōgüxũ.

Eneã rü narüme

³² Rū yexguma Pedru yema yaxōgüxütanügu ixũãgüchigüxgu, rü yema Didágu ãchiügüxũ ga yaxōgüxütanüwa rü ta nangu.

³³ Rū yexma nūxũ nayangau ga wüxi ga yatü ga Eneã ga naega ga 8 ga taunecü norü pechicagu cacü, yerü nanawãixãchi.

³⁴ Rū Pedru ñanagürü nūxũ: —Pa Eneãx, Ngechuchu ya Cristu cuxũ narümexëë. ¡Inachi rü namexëë i cuxchapenüxũ! —ñanagürü. Rū yexgumatama inachi.

³⁵ Rū guxũma ga yema Didácüãxgü rü Charunacüãxgü rü nūxũ nadaugü ga na inachixũ ga guma yatü, rü nūxũ narüxoe ga nacümagü ga chixexũ, rü Cori ya Ngechuchuwe narüxĩ.

Wena imaxũ ga Dorca

³⁶ Rū yexgumaücüü ga ñãne ga Yopewa rü iyexma ga wüxi ga Tupanaãxũ yaxōxcü ga ngecü

ga Tabita ga ngĩega. Rū ngěma naega i Griégugawa rū Dorca ñaxũchiga nixĩ. Rū ngĩma rū wũxi ga mecũ iyixĩ ga ngĩrũ ũwa, rū guxũguma nũxũ irũngũxěē ga yema duũxũgũ ga tacũ nũxũ taxuxũ.

³⁷ Rū yexgumaũcũũ iyadaawe ga Dorca, rū iyu, rū ngĩmũcũgũ nanamexěē ga ngĩxĩne. Rū ĩpataarũ daxũchiũwa yexmaxũ ga ucapugu nanaxũgũ ga ngĩxĩne.

³⁸ Rū Yopearũ ngaicamana nayexma ga guma ĩāne ga Didá ga Pedru nawa yexmane. Rū yema yaxõgũxũ ga Yopecũāx rū nũxũ nacuèxgũ ga Didáwa na nayexmaxũ ga Pedru. Rū naxcèx yéma nanamugũ ga taxre ga yatũ ñaxũmaā: —ĩRũ paxa toxcèx nuā naxũ! —ñaxũmaā.

³⁹ Rū yexguma ga Pedru rū nawe narũxũ. Rū yexguma ĩnanguxgu, rū yema ucapu ga yema yueta nawa yexmaxũwa nanagagũ. Rū guxũma ga yutegũxũ rū Pedruxũ ĩnachomaēguāchi, rū nax-auxe, rū nũxũ nayawégũ ga yema naxchirugũ ga Tabita nũxũ ĩxũxũxũ ga yexguma namaũxgu.

⁴⁰ Rū Pedru rū dũxétũwa nanamugũ ga guxũma. Rū ĩnacaxāpũxũ, rū nayumũxē. Rū ñũxũchi ngĩxcèx nadauegu ga yema yuxcũ, rū ñanagũrũ: —Pa Tabitax, ĩÍrũda! —ñanagũrũ. Rū yexguma rū iyadauchixetũ, rū Pedruxũ idau, rū ĩírũto.

⁴¹ Rū yexguma ngĩxměxgu nayayauxāchi, rū ngĩxũ ĩnachixěē. Rū ñũxũchi naxcèx naca ga yema yaxõgũxũ rū yema yutegũxũ, rū maxũxcũ nũxũ ngĩxũ nawěx.

⁴² Rū guxũma ga yema duũxũgũ ga Yopewa yexmagũxũ rū nũxũ nacuáchigagũ ga yema. Rū Cori ga Ngechuchuaxũ nayaxõgũ ga muxũma.

⁴³ Rū muxũma ga ngunexũ Yopegu narũxāũx

ga Pedru napatagu ga Chimáũ ga naxchèxmüärü paxëewa puracüxũ.

10

Pedru rü Cornériuchiga

¹ Rü ñane ga Checharéawa nayexma ga wüxi ga yatü ga Cornériugu äegacü. Rü 100 ga Itáriaanecüãx ga churaragüarü capitáũ nixĩ.

² Rü nüma nixĩ ga wüxi ga yatü ga meãma Tupanaãxũ yaxõcü. Rü wüxigu namèxmaã rü naxácügümaã Tupanaxũ nangechaũgü. Rü mucüma ga norü dīerumaã nüxũ narüngüxëe ga duüxüğü ga Yudíugü ga tacü nüxũ taxuxũ. Rü guxüğüma nayumüxë rü Tupanamaã nidexa.

³ Rü wüxi ga ngunexũ ga yexguma tomaëxpüxarü orawa nanguxchaũgu ga yáuanecü, rü nangoxetü. Rü meãma nüxũ nadau ga wüxi ga Tupanaärü orearü ngeruũ ga daxücüãx ga yema ucapu ga nawa nayexmaxügu ücuxũ. Rü ñanagürü nüxũ: —Pa Cornériux —ñanagürü.

⁴ Natürü nüma ga Cornériu rü meãma nüxũ nadawenü, rü poraacü namuñácüma nüxna naca, rü ñanagürü: —¿Tacü cunaxwèxe, Pa Corix? — ñanagürü. Rü nanangãxũ ga yema orearü ngeruũ ga daxücüãx, rü ñanagürü: —Curü yumüxëgü rü Tupana marü cuxũ nüxũ naxĩnü, rü cumaã nataãe na ñuxácü nüxũ curüngüxëexũ i duüxüğü i tacü nüxũ taxuxũ.

⁵ —¡Rü chanaxwèxe i Yopewa cunamugü i ñuxre i yatüğü na naxcèx yacagüxücèx i wüxi i yatü i Chimáũ i Pedrugü äegaxũ!

⁶ —Rü to i Chimáũ i naxchèxmüärü paxëewa puracüxüpatawa nangëxma rü ngëxma nape. Rü

yima napata rü taxtü i taxücutüwa nangëxma — ñanagürü.

⁷ Rü yexguma nüxna iyanatauxgu ga yema ore-arü ngeruü ga namaã yéma idexaxü, rü Cornériu rü naxcèx naca ga taxre ga norü puracütanüxü rü wüxi ga churara ga meã naga İnüxü ga meã Tupanaãxü yaxõxü.

⁸ Rü namaã nüxü nixu ga guxüma ga yema nüxü nadauxü, rü ñuxüchi Yopewa nanamugü.

⁹ Rü moxüãcü ga yexguma namagu naxïyane rü marü Yopexü yangaicagügu ga yema duüxügü ga Cornériu yéma mugüxü, rü Pedru rü daxü naxï ga İpataétüwa na yéma nayumüxëxüçèx. Rü tocuchiarü oragu nixï ga yexguma.

¹⁰ Rü nataiya, rü nüxü nachixéga ga na nachibüxü. Rü yexguma norü õna İnaxügüyane, rü nangoxetü ga Pedru.

¹¹ Rü nüxü nadau ga na yangoxnaxü ga naãnetüwe, rü yéma İnarüxï ga wüxi ga naxchiru ga ñoma wüxi ga taxü ga naxchápenüürü ixixü. Rü norü ägümücüpëxewa naxätüxü rü yemaãcü İnarüçhüxüe ñuxmata ñaxtüanewa nangu.

¹² Rü yemagu İnarüçhüxüewetaxü ga nagüxüraüxü ga naëxügü, rü äxtapegü, rü werigü. Rü yema naxchápenüüwa nayexma ta ga tacü ga tama nangõxgüxü ga Yudügu.

¹³ Rü Pedru nüxü naxïnü ga Tupanaga ga nüxü ñaxü: —Pa Pedrux İnachi, rü ta imèx, rü nangõx! —ñaxü.

¹⁴ Rü Pedru nanangãxü rü ñanagürü: —Taxucürüwa nixï, Pa Corix, erü taguma chanangõx i tacü i toxcèx äüächixü —ñanagürü.

¹⁵ Rü yexguma ga yema Tupanaga, rü wenaxãrü

ñanagürü: —Ngẽma choma chamexẽẽxũ rü tama name i ãũãchi nüxũ cuwogü —ñanagürü.

16 Rü tomaẽxpüxcüna yemaãcü nangupetü. Rü yexguma wenaxãrũ daxũ nachüxnagü ga yema naxchápenüũ namaã ga guxũma ga nawa yexmagüxũ.

17 Rü poraãcü nagu narüxĩnü ga Pedru ga tacüchiga na yĩxũ ga yema nüxũ nadauxũ ga yexguma nangoxetügu. Rü yemagu ínaxĩnyane, rü guma ãpataẽxwa nangugü ga yema yatügu ga Cornériu yema mugüxũ ga naxcèx ícaetanüxũ ga Chimáũpata.

18 Rü yema naxcèx ínacagü rü aixcüma yexma nape ga wüxi ga yatü ga Chimáũ ga Pedrugu aëgaxũ.

19 Rü Pedru nagu írüxĩnyane ga yema nüxũ nadauxũ ga yexguma nangoxetügu, rü Tupanaãẽ i Üünexũ rü ñanagürü nüxũ: —Ngẽãgü nixĩ i tomaẽxpüx i yatügu i cuxcèx daugüxũ.

20 —¡Inachi, rü írüxĩ, rü tama cuxoegaãẽãcüma nawe rüxũ! Erü choma nixĩ i núma chanamugüxũ —ñanagürü.

21 Rü yexguma naxcèx ínarüxĩ ga Pedru, rü ñanagürü nüxũ ga yema yatügu: —Choma nixĩ i chauxcèx pedaugüxũ. ¿Rü tacüwa nuã pexĩ? —ñanagürü.

22 Rü nümagü nanangãxügü, rü ñanagürügü: —Capitáũ ya Cornériuxütawa ne taxĩ rü núma nixĩ i nuã toxũ namugüxũ. Rü wüxi ya yatü ya mecü nixĩ, rü Tupanaxũ nangechaũ. Rü guxũma i Yudíugü nüxũ nangechaũ i nümax. Rü wüxi ga Tupanaãrũ orearü ngeruũ ga daxüçũãx nanamu

na cuxcèx toxü yacaxëẽxücèx ga Cornériu rü napatawa cuxüxücèx rü nüxü na naxĩnücèx i curü ore –ñanagürügü.

23 Rü yexguma nanachocuxëẽ ga Pedru, rü yexma nanapegüxëẽ ga yema chütaxügu. Rü moxüãcü inaxĩãchi rü nawe narüxü ga Pedru. Rü ínayaxümücügü ga ñuxre ga Yopecüãx ga yaxögüxü.

24 Rü moxüãcü Checharéawa nangugü ga ngextá Cornériu ínanguxëẽxüwa namaã ga guxüma ga natanüxügü rü namücügü ga nüxü nangechaügüxü ga nüxna naxuxü.

25 Rü yexguma Cornériupatawa nanguxgu ga Pedru, rü íãxtüwa naxcèx naxü ga Cornériu, rü Pedrupëxegu nayacaxápüxü, rü nüxü nicuèxüü.

26 Natürü ga Pedru rü inanachixëẽ rü ñanagürü: –¡Inachi! Rü choma rü ta cuxrüü duüxümare chixĩ rü tama Tupana chixĩ –ñanagürü.

27 Rü nügümaã yadexagüãcüma wüxigu nichocu. Rü Pedru yéma namaã inayarüxü ga muxüma ga duüxügü ga yexma ngutaquëxegüxü.

28 Rü yexguma ga Pedru rü ñanagürü nüxü ga yema duüxügü ga yexma ngutaquëxegüxü: –Pema nüxü pecuèx i toma i Yudíugücèx rü nangëxma i torü mugü i toxna nachüxuxü na pemaã tangutaquëxegüxü, rü pepatagu na tachocuxü. Natürü Tupana choxü nangoxetüxëẽ rü choxü nüxü nadauxëẽ na tama namexü na ngëmaãcü nagu na charüxĩnücèx pemaã.

29 Rü ngëmacèx tama chaxoõcüma núma chaxü i ngëxguma chauxcèx pengemagu. Rü ñuxma rü chanaxwëxe i chomaã nüxü pixu na tacücèx chauxcèx pengemaxü –ñanagürü.

30 Rü Cornériu nanangãxü, rü ñanagürü:

—Marü ägümücü i ngunexü nangupetü ga ñüxgumaäcü ga tomaëxpüxarü oragu ga yáuanecü, rü nuã chopatawa chayumüxë erü guxüguma ngëmaäcü chanaxü. Rü yexguma chayumüxëgu rü changoxetü, rü chauxcèx nangox ga wüxi ga yatü ga iyaurachirucüüxü.

³¹—Rü ñanagürü choxü:

“Pa Cornériux, Tupana marü nüxü naxĩnü i curü yumüxë rü cumaã nataãe na ñuxäcü nüxü curüngüxëxü i duüxügü i tacü nüxü taxuxü.

³²—Rü Yopewa namugü i ñuxre i yatügü na naxcèx yacagüxcèx i Chimáü i Pedrugu äegaxü! Rü to i Chimáü i naxchëxmüärü paxëewa puracüxüpatagu pexü. Rü yima napata rü taxtü i taxücutüwa nangëxma”, ñanagürü choxü.

³³ Rü yemacèx rü yexgumatama paxa cuxcèx yéma chanamugü, rü cuma rü mexü toxcèx cuxü erü núma cuxü. Rü ñuxma i guxäma i toma rü Tupanapëxewa tangëxmagü. Rü nüxü taxĩnüëchaü i gux-üma i ngëma ore i Cori namaã núma cuxü muxü na tomaã nüxü quixuxcèx —ñanagürü ga Cornériu.

Pedru rü Cornériupatawa nüxü nixu ga Ngechuchuchiga

³⁴ Rü yexguma inanaxügü ga Pedru ga na yadexaxü, rü ñanagürü: —Ñuxma waxi nixĩ i nüxü chacuáxü na Tupanacèx nawüxiguxü i guxüma i duüxügü erü núma rü aixcüma guxäxüma nangechaü.

³⁵—Rü núma rü wüxichigü i nachiuãnewa nanade i ngëma duüxügü i nüxü ngechaügüxü rü mexü ügüxü.

36 –Rü nüma ga Tupana rü Yudíugütanüwaxíra nanamu ga norü ore rü marü nüxü nixu na tüxü nüxü nangechaüxü i tórü pecadugü i ngëxguma Cristu ya guxäärü Cori ixícüaxü yaxögügu.

37 –Pema rü meäma nüxü pecuèx na tacü ngupetüxü ga guxüwama ga Yudíugüarü naãnewa. Rü noxri ga Cuáü rü nüxü nixu na Tupana naxwèxexü na ínabaiüxü ga duüxügü. Rü yemawena ga Ngechuchu rü Gariréaanewa inanaxügü ga duüxügümaã nüxü na yaxuxü ga ore i mexü.

38 –Rü pema nüxü pecuèx ga ñuxäcü Tupana na naporaxëëxü ga Ngechuchu ya Nacharétucüãx yerü nüxna nanaxã ga Naãe i Üünexü. Rü nüma ga Ngechuchu rü mexü naxü ga yema íyaxügüxüwa, rü nanameëxëë ga guxüma ga yema duüxügü ga ngoxoãxgüxü. Rü yemaäcü nanaxü yerü Tupana nüxü narüngüxëë.

39 –Rü toma nixí ga nüxü tadaugüxü rü nüxü tixuchigaxü i guxüma ga naxüxü ga Ngechuchu ga Yudéaanewa rü Yerucharéüärü íãnewa. Rü yemawena rü nayamèxgü rü curuchawa nayapotagü.

40 –Natürü ga Tupana rü tomaëxpüx ga ngunexü ngupetügu rü wena nanamaxëë rü toxçèx nanangoxëë.

41 –Natürü tama guxü ga duüxügüçèx nangox. Rü toxçèxicatama nangox ga toma ga üpamama Tupana toxü dexe na nüxü tixuxüçèx i Ngechuchuchiga. Rü yexguma marü yuwa ínadaxguwena rü namaã tachibüe rü namaã taxaxegü.

42 –Rü nümatama ga Ngechuchu toxü nimugü

na duïxügümaã nüxü tixuxçèx na Tupana marü ãëxgacüxü yangucuchixëëxü na guxü i duïxügüarü ngugüruü na yïxüçèx. Rü nüma ya Ngechuchu nixi i tórü maxüxü nangugüxü, rü nüma tá nixi i guxü i duïxügü i maxëxü rü yuexüxü yacagüxü naxçèx i norü maxüchiga.

⁴³ –Rü üpamamatama guxüma ga Tupanaärü orearü uruügü rü Ngechuchuchiga nidexagü, rü ñanagürügü:

“Rü nüma tá nüxü nüxü nangechaü i norü
 pecadugü i guxüma i duïxügü i nüxü
 yaxögüxü”,
 ñanagürügü.

Tupanaãe i Üünexü rü yema duïxügü ga tama Yudíugü ixígüxütanüwa nangu

⁴⁴ Rü yexguma íyadexayane ga Pedru, rü Tupanaãe i Üünexü nüxna nangu ga guxüma ga yema yéma irüxñnüëxü ga yema ore.

⁴⁵ Rü yema yaxögüxü ga Yudíugü ga Pedrumaã yéma íxü, rü poraäcü nabaixächiãëgü yerü Tupanaãe i Üünexü rü nüxna rü ta nangu ga yema duïxügü ga tama Yudíugü ixígüxü.

⁴⁶ Rü nüxü naxñnüë ga to ga nagawachigü na yadexagüxü, rü Tupanaxü na yacuëxüügüxü.

⁴⁷ Rü yexguma ga Pedru rü ñanagürü: –¿Éxna nangëxmaxü i texé na nüxna nachuxuxü i na ínabaiüxü i ñaã duïxügü i marü taxrüü Tupanaãe i Üünexü nüxna nguxü? –ñanagürü.

⁴⁸ Rü nanamu na Ngechuchu ya Cristuégagu na ínabaiüxü ga yema duïxügü ga yexwaca

yaxõgüxü. Rü yexguma Pedruxü nacèèxügü na yexma naxãüxcèx ga ñuxre ga ngunexü.

11

Pedru rü Yerucharéüwa yexmagüxü ga yaxõgüxümaã nüxü nixu ga tacü na ngupetüxü ga Checharéawa

¹ Rü yema ngüexügü ga Ngechuchu imugüxü rü yema yaxõgüxü ga Yudeagugüxü, rü nüxü nacuáchigagü na yema tama Yudíugü ixíggüxü rü ta nayauxgüãxü ga Tupanaãrü ore.

² Natürü yexguma Yerucharéüwa nanguxgu ga Pedru, rü ñuxre ga Yudíugü ga yaxõgüxü rü Pedruxü nixugüe.

³ Rü ñanagürügü: —¿Rü tüxcüü natanüwa cuxü i ngëma tama Yudíugü ixíggüxü, rü namaã cuchibü? —ñanagürügü.

⁴ Rü Pedru meãma namaã nüxü nixu ga guxüma ga tacü na ngupetüxü, rü ñanagürü nüxü:

⁵ —Choma rü Yopearü ñãnewa chayexma, rü yexguma íchayumüxëyane, rü changoxetü. Rü nüxü chadau ga wüxi ga naxchápenüürü ixíxü ga norü ägümücüpëxewa ätuxüxü ga írüchüxüexü ñuxmata chauxütawa nguxü.

⁶ —Rü meãma nüxü chadawenü na nüxü chadauxcèx na tacü yexmaxü ga aixepewa. Rü nüxü chadau ga naxünagü ga ixägümücüparaxü rü naëxügü ga idüraexü, rü äxtapegü rü werigü. Rü yema naxchápenüüwa nayexma ta ga tacü ga tama ingõxü, erü taxcèx i yixema i Yudíugü rü naxãüãchi.

⁷ —Rü nüxü chaxñü ta ga Tupanaga ga choxü ñaxü:

“¡Inachi! Pa Pedrux. ¡Rü ta imèx, rü nangõx!”
ñaxũ.

⁸—Natürü choma chanangãxũ, rü ñacharügü:

“Taxucürüwa nixĩ, Pa Corix, erü taguma
chanangõx i tacü i toxcèx ãũãchixũ”, ñacharügü.

⁹—Rü yexguma wenaxãrũ ñanagürü choxũ ga
yema Tupanaga ga daxüwa inaxũxũ:

“Ngẽma choma i Tupana chamexẽẽxũ, rü tama
name i ãũãchi nüxũ cuwogü”, ñanagürü.

¹⁰—Rü tomaẽxpüxcüna yemaãcü nangupetü, rü
yexguma wenaxãrũ daxũ naçhüxnagü ga yema
naxchápenüũ namaã ga guxüma ga nawa yex-
magüxũ.

¹¹—Rü yexgumatama guma ï ga nawa chayex-
manewa nangugü ga tomaẽxpüx ga yatügü ga
Checharéawa ne mugüxũ ga chauxcèx daugüxũ.

¹²—Rü Tupanaãẽ i Üünexũ choxũ namu na nawe
charüxüxcèx woo tama Yudíugü na yixíngüxũ ga
yema duüxügü. Rü chomaã ta yéma naxĩ ga ñaã 6
ga yaxõgüxũ. Rü napatawa tangugü ga guma yatü
ga Cornériu, rü yexma tachocu.

¹³—Rü tomaã nüxũ nixu ga ñuxãcü na napatawa
nüxũ nadauxũ ga Tupanaãrũ orearü ngeruũ ga
daxüçüãx ga yexma chixũ ga ñaxũ nüxũ:

“¡Yopewa namugü i yatügü na naxcèx
yacagüxüçèx i Chimáú i Pedrugu ãegaxũ!

¹⁴—Rü nüma tá cumaã nüxũ nixu na ñuxãcü tá
cuma rü guxũ i cupatagugüxümaã penayaxuxũ i
perü maxũ i taguma gúxũ”, ñanagürü nüxũ.

¹⁵—Rü yexguma ichanaxügügu ga na chidexaxũ,
rü nüxna nangu ga Tupanaãẽ i Üünexũ, yexgu-
marüũ ga noxri tüxna nanguxgurüũ.

16 –Rü yexguma ga choma rü nüxna chacuèxãchi ga Cori ya Ngechucharü ore ga yexguma ñaxgu:

“Rü aixcüma nixĩ ga Cuáũ ga dexáwamare ínabaiũxẽẽãxũ, natürü i pema rü Tupanaãe i Üünexũ tá pexna nangu”, ñaxgu.

17 –Rü pema nüxũ pecuèx na ñuxãcü Tupana tüxna nanguxẽẽxũ ga Naãe i Üünexũ i yixema na Cori ya Ngechuchu ya Cristuaxũ yaxõgüxũ. Rü ñuxma na taxrüü Tupana yema duũxũgüna nanguxẽẽxũ ga Naãe i Üünexũ, ¿rü ñuxücürüwa i choma i nüxũ chaxoxũ na naga chaxĩnüxũ ya Tupana? –ñanagürü ga Pedru.

18 Rü yexguma yema orexũ naxĩnüëgu ga yema yaxõgüxũ ga Yerucharéüçüãx, rü nachianegümare. Rü Tupanaxũ nicuèxüüügü. Rü ñanagürügü: –Rü ngẽmawa nüxũ tacuèx na Tupana tüxũ dexũ ya yixema woo tama Yudiügü ixĩgüxe. Rü ngẽxguma nüxũ tarüxoegu i tümaãrü chixexũ rü Tupanacèx tadaugügu, rü nüma tüxna nanaxã i maxũ i taguma gúxũ –ñanagürügü.

Yaxõgüxũ ga Aũtioquíawa yexmagüxũchiga

19 Rü yexguma Etébaũxũ yamèxgüguwena, rü norü uwanügü poraãcü nawe ningèxũtanü ga yema yaxõgüxũ. Rü yemacèx nügü nawoone. Rü Peníchiawa, rü Chiprewa rü Aũtioquíawa nabuxmü. Rü yéma nüxũ nixugüe ga ore ga mexũ ga Ngechuchuchiga. Natürü Yudiügümaãxĩcatama nüxũ nixugüe ga yema ore rü tama ga togümaã.

20 Natürü yéma Aũtioquíawa nangugü ta ga ñuxre ga togü ga yaxõgüxũ ga Chípereçüãx, rü Chireneçüãx. Rü nümagü rü yema tama Yudiügü

ixīgüxümaã rü ta nüxü nixugüe ga ore i mexü i Cori ya Ngechuchuchiga.

21 Rü Tupana nüxü narüngüxëë, rü nanapo-raexëë. Rü yemacèx muxüma ga yema duüxügü rü nüxü narüxoe ga nuxcümaüxü ga nacümagü, rü Cori ya Ngechuchuaxü nayaxögü.

22 Rü yexguma yemaxü nacuáchigagügu ga yema yaxögüxü ga Yerucharéüwa yexmagüxü, rü Aütioquíawa nanamugü ga Bernabé.

23 Rü yexguma yéma nanguxgu ga Bernabé, rü nüxü nadau ga ñuxácü Tupana nüxü na rüngüxëëxü ga yema yaxögüxü ga Aütioquíacüãx, rü poraácü namaã nataãë. Rü nayaxucuxëgü ga guxüma na meãma Cori ya Ngechuchuwe naxĩãmaxücèx, rü taguma nüxü naxoexücèx.

24 Yerü nüma ga Bernabé rü wüxi ga yatü ga mecü nixĩ. Rü aixcüma Tupanaãë i Ünexü rü nawa nayexma, rü napora ga norü öwa. Rü yemacèx muxüchixüma ga duüxügü rü Cori ya Ngechuchucèx naxĩ rü nüxü nayaxögü.

25 Rü yemawena ga Bernabé rü Tarsuwa naxü na Chaurucèx yadauxücèx.

26 Rü yexguma nüxü iyangauxgu, rü Aütioquíawa nanaga. Rü wüxi ga taunecü wüxiwa yéma nayexmagü namaã ga yema yaxögüxü. Rü nanangüexëë ga muxüchixüma ga duüxügü. Rü Aütioquíawa nixĩ ga inaxügüxü ga duüxügü na Cristutanüxümaã na naxugüãxü ga yema yaxögüxü.

27 Rü yexgumaücüü Yerucharéüwa ne naxĩ ga ñuxre ga Tupanaãrü orearü uruügü rü Aütioquíawa naxĩ.

28 Rū natanūwa nayexma ga wūxi ga orearū uruū ga Agabu ga naega. Rū nanangutaquēxexē ga yema yaxōgūxū ga Aūtioquíawa yexmagūxū. Rū yema ngutaquēxewa rū inachi ga Agabu rū Tupanaã i Ūñexū nanamu ga na yadexaxū, rū ñanagürü: —Wūxi i taiya i taxū tá ínangu i guxū i ñaã nachiūñewa —ñanagürü. Rū aixcūma ínangu ga yema taiya ga yexguma Cáudiu ãēxgacū ixīxgu.

29 Rū yexguma ga yema yaxōgūxū ga Aūtioquíawa yexmagūxū, rū marū wūxigu nagu narūxīñüē na yéma ngīxū namugūxūcēx ga dīēru na nūxū nangūxēēgūxūcēx ga yema yaxōgūxū ga Yudéaanegu āchiūgūxū. Rū wūxichigū ngīxū inaxā ga dīēru yexgumarū ga ñuxre ga nūxū yexmacū.

30 Rū yemaācū nanaxūgū, rū Bernabé rū Chaurumaã yéma ngīxū namugū ga yema dīēru naxcēx ga yema yaxōgūxūārū ãēxgacūgū ga Yudéaanewa yexmagūxū.

12

Āēxgacū ga Erode rū Chaūtiáguxū nimēx rū Pedruxū napoxcu

1 Rū yexgumaūcūū inanaxūgū ga ãēxgacū ga Erode ga na ínayauxūāxū ga ñuxre ga yaxōgūxū ga Yerucharéūcūāx na napoxcuexūcēx.

2 Rū norū churaragūxū namu na taramaã Chaūtiágu ga Cuáñēneēxū yamēxgūxūcēx.

3 Rū yexguma nūxū nadēuxgu ga Erode ga norū me na yīxū ga Yudíugū ga yema na naxūxū, rū norū churaragūxū namu na Pedruxū rū ta yayauxgūxūcēx. Rū yema nangupetū ga

Yudíugüarü peta ga Üpetüchigagu ga yexguma pãũ ga ngearü puxẽẽruũãxũ nangõxgügu.

⁴ Rũ yexguma Pedruxũ yayauxgügu, rũ poxcupataũgu nayatèxcuchi. Rũ ñuxũchi ga Erode rũ nanamu ga ägümücütücümü ga norü churaragü na nüxna nadaugüxcèx. Rũ wüxitücumüwachigü rũ nayexma ga ägümücü ga churaragü. Rũ yemaãcü nanaxü ga Erode, yerü nagu narüxĩnü ga yema petawena guxũ ga duũxügüpèxewa na nagaãxücèx na yamèxgüãxücèx.

⁵ Rũ yemaãcü ga Pedru rũ poxcupataũwa nayexma rũ churaragü rũ meãma nüxna nadaugü. Natürü ga yema yaxõgüxũ ga Yerucharéüçüãx rũ poraãcü nayumüxëgü, rũ Tupanana naxcèx nacagü.

Tupana rũ Pedruxũ ínanguxuchixëẽ ga poxcupataũwa

⁶ Rũ yematama ga chütaxũgu naxũpa ga yema ngunexũ ga Erode duũxügüpèxewa nagaxchaũxũ, rũ taxre ga churaragüarü ngãxũwa nape ga Pedru. Rũ taxre ga cadenamaã ninèixgüchacüü. Rũ togü ga churaragü ga dauũtaexũ nüxna nadaugü ga poxcupataũãrũ ìãx.

⁷ Rũ ngürüãchi yema poxcupataũwa nangox ga wüxi ga orearü ngeruũ ga daxüçüãx ga Coriarü. Rũ poraãcü nangóone ga guma poxcupataũwa. Rũ yema orearü ngeruũ Pedruxũ nacuxagü, rũ nanabaixãchixëẽ. Rũ ñanagürü: —¡Paxama írüda! —ñanagürü. Rũ yexgumatama íniwëgü ga guma cadena ga Pedru namaã inèixgüchacüücü.

⁸ Rû Pedruxû ñanagürü ga yema orearü ngeruû:
 —¡Rû icuxcuchichiru rû nacuaixcu i curü chapatu!
 —ñanagürü. Rû yemaãcü nanaxü ga Pedru. Rû
 ñanagürü ta: —¡Rû icuxcuchi i curü gauxûchiru, rû
 chowe rûxû! —ñanagürü.

⁹ Rû nawe narûxû ga Pedru. Rû tama nüxû
 nacuèx ga aixcüma na yîixû ga yema orearü
 ngeruû namaã üxû. Rû naxcèx rû nangoxetümare.

¹⁰ Rû nüxû nachopetü ga nüxîraûxû ga
 dauxûtaexû, rû ñuxûchi ga yema to ga
 dauxûtaexû. Rû yexguma nawa nangugügu ga
 yema îãx ga áchumenèxãnaxcèx ga ítamûwaama
 üxû, rû nüèchama niwãxna. Rû ínachoxû. Rû
 yexguma marü wüxi ga ítamû inaxîxgu, rû nüxna
 inayarütaxu ga yema orearü ngeruû.

¹¹ Rû yexguma nüxû nicuèxãchi ga Pedru,
 rû nügümaã ñanagürü: —Ñuxma waxi i nüxû
 chacuáxû na aixcüma Cori ya Tupana núma
 namuxû i norü orearü ngeruû na Erodemèxêwa
 choxû napuxû, rû nawa choxû ínanguxuchixêxû
 i guxûma i ngêma chomaã naxügüchaûxû i ngêma
 Yudíugü i tama yaxõgüxû —ñanagürü.

¹² Rû yexguma yemaxû yacuèxãchigu ga Pedru,
 rû ngîpatawa naxû ga wüxi ga ngecü ga Maríagu
 ãegacü. Rû ngîma iyixî ga Cuáû Marcu naë. Rû
 yéma nangutaquèxegü ga muxûma ga duûxûgü ga
 yéma yumûxêgüxû.

¹³ Rû îãxtüarü poxeguxûârü îãxwa, rû: —Tu tu tu
 —ñanagürü ga Pedru. Rû wüxi ga pacü ga Rode ga
 ngîega îiyadau.

¹⁴ Rû yexguma nagawa nüxû nacuèxgu ga na
 Pedru yîixû, rû ngîrû taãemaã rû íyañamare na

nūxŭ yanaxuxŭ ga na Pedru yiixŭ ga iãxtüarŭ iãxgu chicü. Rŭ tama iyawãxna ga iãx.

¹⁵ Rŭ yema yexmagŭxŭ rŭ: —Cungẽãẽmare — ñanagŭrŭgŭ ngixŭ. Natŭrŭ ngĩma rŭ: —Aixcŭma nixĩ —ngĩgŭrŭgŭ. Rŭ yexguma ñanagŭrŭgŭ: — Maneca tama nŭma nixĩ. Rŭ norŭ dauruŭ i daxŭcŭãxmare nixĩ —ñanagŭrŭgŭ.

¹⁶ Natŭrŭ ga Pedru rŭ yoxni iãxwa: —Tu tu tu —ñanagŭrŭama. Rŭ yexguma naxcè x yawãxnaãgu rŭ nŭxŭ nadaugŭgu ga Pedru na yiixŭ, rŭ naãaixãchiãẽgŭ.

¹⁷ Natŭrŭ nŭma naxunagŭmẽxẽ, rŭ naxmẽxmaã nayanachianexẽẽgŭ. Rŭ namaã nŭxŭ nixu na ñuxãcŭ Cori ínanguxuchixẽẽxŭ ga poxcupataŭwa. Rŭ ñanagŭrŭ ta: —¡Chaŭtiágumaã rŭ ngẽma togŭ i yaxõgŭxŭmaã nŭxŭ pixu i ngẽma ore! —ñanagŭrŭ. Rŭ yexguma inaxŭãchi, rŭ toxnamana naxŭ.

¹⁸ Rŭ yexguma yangunegu, rŭ yema churaragŭ ga poxcupataŭwa dauxŭtaegŭxŭ rŭ poraãcŭ nanaxixãchiãẽgŭ yerŭ tama nŭxŭ nacuẽxgŭ ga ñacŭ na ngupetŭxŭ namaã ga Pedru.

¹⁹ Rŭ yemacèx ga Erode rŭ yema churaragŭxŭ namu na Pedrucèx yadaugŭxŭcèx. Rŭ yexguma taxuxŭma iyangaugŭgu, rŭ Erode rŭ yema churaragŭgutama nananguxẽẽ na nayuexŭcèx. Rŭ yemawena ga Erode rŭ ínaxŭxŭ ga Yudéaanewa, rŭ Checharéagu nayaxãchiŭ.

Nayu ga Erode

²⁰ Rŭ Erode rŭ namaã nanu ga Tirucŭãxgŭ rŭ Chi-dãŭcŭãxgŭ. Natŭrŭ ga yema Tirucŭãxgŭ rŭ Chidãŭcŭãxgŭ rŭ naxcèx nadaugŭ na ñuxãcŭ Erodexŭ nangŭxmŭxẽẽgŭxŭ, yerŭ

Erodechiiñewa nixĩ ga nayauxgüãxũ ga nabü. Rü yemacèx wüxi ga Erodearü duũxũ ga ãëxgacü ga Batumaã naxãmücügü na nüxũ nangũxëëxücèx na Erodemaã yadexagüxücèx.

²¹ Rü Erode rü namaã inaxuneta ga wüxi ga ngunexũ na namaã yadexaxücèx. Rü yexguma yema ngunexũ ga nagu inaxunetaxũwa nanguxgu, rü yema Tirucũãx rü Chidãucũãx rü Erodexõtawa nangugü. Rü nicuxcuchi ga Erode ga norü ãëxgacüchiru, rü norü tochicaxũwa narüto, rü duũxügümaã nüxũ nixu ga norü ore.

²² Rü yexguma ga guxũma ga yema duũxügü rü tagaãcü ñanagürügü: —Ñãã ãëxgacü rü tama duũxũärü dexarũ nixĩ i norü dexa, natürü ñoma Tupanaärü dexarũ nixĩ —ñanagürügü.

²³ Rü Erode rü yema duũxügüarü oremaã nataãë, rü tama Tupanaxũ nicuèxüüchaũ ga ñuxãcü Tupana nüxũ narüngũxëëxũ. Rü yemacèx wüxi ga Tupanaärü orearü ngeruũ ga daxücũãx rü yexgumatama Erodexũ nidaawexëë. Rü õxmigü nanangõx, rü yemamaã nayu.

²⁴ Natürü yema yaxõgüxũ rü yexeraãcü guxũwama nüxũ nixugüe ga Cori ga Tupanaärü ore. Rü muxũchixũ ga duũxügü nüxũ nayaxõgü.

²⁵ Rü yexguma marü yanguxëëãgu ga norü puracü ga Chauru rü Bernabé, rü Ínachoxũ ga Yerucharéüwa, rü wenaxãrü Aũtioquíacèx nawoegu. Rü nayagagü ga Cuáũ Marcu.

13

Bernabé rü Chauru rü inanaxügüe ga to ga nachiüñewa na nangegüãxũ ga Tupanaärü ore

1 Rŭ yema yaxōgŭxŭ ga Aŭtioquíawa yexmagŭxŭtanŭwa rŭ nayexma ga ñuxre ga yatŭgŭ ga Tupanaärŭ orearŭ uruŭgŭ, rŭ ñuxre ga yatŭgŭ ga Tupanaärŭ orewa nguxēētaegŭxŭ. Rŭ yematanŭwa nayexma ga Bernabé, rŭ Chimáũ ga Waxwegu āegaxŭ, rŭ Dúchiu ga Chirenecŭāx, rŭ Manaē ga wŭxigu āēxgacŭ ga Erodemaã yaexŭ, rŭ Chauru.

2 Rŭ wŭxi ga ngunexŭ ga yexguma Coricèx ínangutaquēxegŭgu rŭ tama nachibüēācŭma ínayumŭxēgŭguyane, rŭ Tupanaāē i Ūñexŭ rŭ ñanagŭrŭ nŭxŭ: —¡Choxna penamugŭ i Chauru rŭ Bernabé na naxŭgŭāxŭcèx i ngēma puracŭ i choma nawa chanamugŭchaŭxŭ! —ñanagŭrŭ.

3 Rŭ yexguma nŭxŭ nachauegu ga tama nachibüēācŭma na nayumŭxēgŭxŭ, rŭ Chauru rŭ Bernabéētŭgu naxŭmēxgŭ ga yema yaxōgŭxŭ, rŭ ñuxŭchi inanamuāchitanŭ na naxŭgŭāxŭcèx ga Tupanaärŭ puracŭ.

Chiprewa naxī ga Bernabé rŭ Chauru

4-5 Rŭ Tupanaāē i Ūñexŭ rŭ inanamuāchitanŭ ga Bernabé rŭ Chauru. Rŭ ñāne ga Cheúchiawa naxī, rŭ gumaärŭ türewa ínaxīāchi, rŭ capaxŭ ga Chiprewa naxī. Rŭ Cuáũ Marcu nawe narŭxŭ na nŭxŭ nangŭxēēxŭcèx. Rŭ yexguma Charamína ga ñāneärŭ türewa nangugŭgu, rŭ ínanaxŭgŭe ga nŭxŭ na yaxugŭxŭ ga Tupanaärŭ ore ga Yudíugŭarŭ ngutaquēxepataŭgŭwa.

6 Rŭ guxŭgu nixīāgŭtanŭ ga yema capaxŭwa ñuxmata Papu ga ñānewa nangugŭ. Rŭ yéma namaã inayarŭxī ga wŭxi ga Yudíu ga yuŭxŭ ga

Barechúgu ãegaxŭ. Rŭ nŭma rŭ wŭxi ga idoratèxáxŭ nixŭ yerŭ nŭgŭ yaxuxgu rŭ aixcŭma Tupanaãrŭ orearŭ uruŭ nixŭ.

⁷ Rŭ nayexma ga yema capaxŭãrŭ ãëxgacŭ ga Chérqui Paurugu ãegaxŭ. Rŭ nŭma nixŭ ga wŭxi ga yatŭ ga meã naãëxŭ cuácŭ. Rŭ yema yuŭxŭ rŭ guma ãëxgacŭarŭ ngŭxëëruŭ nixŭ. Rŭ nŭma ga ãëxgacŭ rŭ norŭ duŭxŭgŭxŭ namu na Chauru rŭ Bernabécèx yacagŭxŭcèx, yerŭ nŭxŭ naxŭnŭchaŭ ga Tupanaãrŭ ore.

⁸ Natŭrŭ yema yuŭxŭ ga Griégugawa Erimínugu ãegaxŭ, rŭ Chauru rŭ Bernabéna nayanuxŭ na Tupanaãrŭ orexŭ yaxugŭxŭ. Yerŭ tama nanaxwèxe na yaxŭõxŭ ga guma ãëxgacŭ.

⁹⁻¹⁰ Natŭrŭ ga Chauru ga Paurugu ta ãegaxŭ, rŭ aixcŭma Tupanaã i Ŭnëxŭ nawa nayexma. Rŭ nŭma ga Pauru rŭ meãma nŭxŭ nadawenŭ ga yema yuŭxŭ, rŭ ñanagŭrŭ nŭxŭ: —Pa Idoratèxáxŭ Pa ngoxo Nanex, cuma rŭ chixexŭxicatama cuxŭxchaŭ, rŭ naxchi cuxai i guxŭma i mexŭ. ¿Ñuxgura tá ta i nŭxŭ curŭxoxŭ na ícuyatóxëëxŭ i Cori ya Tupanaãrŭ ore i aixcŭma ixŭxŭ?

¹¹ —Ñŭxmatátama cuxŭ napoxcu ya Cori ya Tupana. Rŭ tá cungetŭ, rŭ ñuxre i ngunexŭgu rŭ tãŭtãma nŭxŭ cudau ya ũèxcŭ —ñanagŭrŭ. Rŭ yexgumatama naxcèx naxëãnëxŭchi ga yema yuŭxŭ, rŭ naxmëxmaã nadaugŭ na texé naxmëxgu yayauxãchixŭcèx rŭ namaã ítixŭxŭcèx.

¹² Rŭ yexguma yemaxŭ nadèŭxgu ga yema capaxŭãrŭ ãëxgacŭ rŭ nayaxŭ Tupanaãrŭ ore, yerŭ namaã naŭaixãchiãe ga yema Pauru rŭ Bernabé nŭxŭ ngŭxëëxŭ ga Cori ya Tupanachiga.

Pauru rü Bernabé rü Pichídiaanewa yexmane ga ñãne ga Aütioquíawa nangugü

¹³ Rû Papuwa inaxĩachi ga Pauru namüçügümaã rü nixãũ ga taxtü ga taxüwa. Rû Pérupe ga ñãnewa nangugü ga Paüpíriaanewa. Natürü yéma nüxna naxo ga Cuáũ Marcu, rü Yerucharéüçèx nataegu.

¹⁴ Rû Pérupewa inaxĩachi ga Pauru rü Bernabé rü ñãne ga Aütioquíawa nangugü ga Pichídiaanewa. Rü yéma rü ngüxchigaarü ngunexügu rü Yudíugüarü ngutaquëxepataũgu nachocu, rü yéma narütogü natanüwa ga yema íngutaquëxegüxü.

¹⁵ Rû yema ngutaquëxewa rü nüxü nadaumatügü ga Tupanaärü mugü ga Moíché ümatüxü rü yema ore ga Tupanaärü orearü uruügu ümatüxü. Rû yemawena, rü guma ngutaquëxepataũärü ãëxgacügü, rü Bernabé rü Pauruna nacagü, rü ñanagürügü: —Pa Toeneëgüx, ngëxguma pexü nangëxmagu i perü ore i taãëxëeruũ i toxçèx rü marü name i ñuxma tomaã nüxü pixu —ñanagürügü.

¹⁶ Rû yexguma inachi ga Pauru, rü naxu-nagümëxë na iyanachianexüçèx ga duüxügü. Rû yexguma duüxügümaã nidexa, rü ñanagürü: —Pa Duüxügü Pa Chautanüxügüx rü Guxãma i Pema i To i Nachiüãnecüãx Ixígüxex ya Tupanaxü Ngechaüğüxe, rü jiperüxĩnüë!

¹⁷ —Yima tórü Tupana i yixema i Yudíugü, rü tüxü nade ga nuxcümaüğüxe ga tórü oxigü na tüxü nangüxëëxüçèx. Rû poraãcü tüxü nimuxëë ga yexguma woo to ga nachiüãne ga Equituanewa tayexmagügu. Rû yemaãcü wüxi ga taxü ga nachiüãne tüxü nixígüxëë. Rû ñuxüchi yemawena, rü norü poramaã tüxü ínagaxü ga yema naãnewa.

18 –Rü dauxchitawa ga ngextá taxúema íxãpataxüwa tüxü nagagü. Rü yéma 40 ga taunecü Tupana yaxna tümamaã naxĩnü ga guxema tórü oxigü.

19 –Rü Tupana nanadai ga yema 7 ga ãëxgacügü ga Canaãñecüãxgü guxüma ga norü duüxügümaãchigü. Rü yemaãcü nanaxü na tórü oxigüna naxããxücèx ga yema naãne na tümaãrügüxüchi yïxücèx.

20 –Rü 450 ga taunecü rü yemaãcü tüxü narüngüxëë. Rü yemawena rü tüxna nanamu ga togü ga ãëxgacügü ga dauruügü ñuxmata Tupanaãrü orearü uruü ga Chamue ingucuchix.

21 –Rü yexguma ga duüxügü rü Tupanana naxcèx nacagü ga wüxi ga ãëxgacü ga rei na namaã inacuáxücèx. Rü Tupana rü nüxna nanamu ga Chaú ga Chiche nane ga Beyamítaa ixïcü. Rü nüma nüxna nadau ga duüxügü ga 40 ga taunecügu.

22 Rü yemawena ga Tupana rü ínanatèxüchi ga Chaú, rü Dabíxü naxuneta na guma norü ãëxgacü yïxücèx. Rü Dabíxü nixuchiga ga Tupana, rü ñanagürü:

“Nüxü chadau rü Dabí ya Ichaí nane rü wüxi ya yatü ya poraãcü choxü ngúchaücü nixĩ. Rü nüma tá nanaxü i guxüma i ngëma choma chanaxwèxexü”,

ñanagürü ga Tupana.

23 Rü nuxcüma ga Tupana rü marü inaxuneta rü wüxi i Dabítaa tá nixĩ i Cristu ixixü, rü tá nana-maxèxëë i Yudíugü. Rü Ngechuchu nixĩ ga guma maxèxëëruü ga tórü oxigümaã nüxü yaxucü ga Tupana.

24 Natürü naxüpa ga Ngechuchu na ínguxü, rü Cuáü ga baiüxëëruü rü guxüma ga Yudíugümaã nüxü nixuchiga ga ore i mexü rü ñanagürü:

“Rü name nixĩ i nüxü perüxoe i pecüma i chixexü, rü Tupanacèx pedaugü, rü ípebaiü”, ñanagürü.

25 Rü yexguma marü yangaicaxgu ga tá na nayuxü ga Cuáü, rü ñanagürü:

“Rü tama choma nixĩ i ngëma pema nagu perüxĩnüëxü i Cristu chíxü. Natürü choweama ne naxü i nüma ya aixcüma Cristu ixĩcü. Rü choma rü napëxewa taxuwama chame, rü bai i norü chapatucunüãrü wëgüwaxüra chame erü nüma rü wüxi i ãëxgacü i tacüxüchima nixĩ”, ñanagürü ga Cuáü.

26 Rü ñanagürü ga Pauru, —Pa Chautanüxügü i Abráütaagüx, rü Guxãma i Pema i To i Nachiüãnecüãx i Tupanaxü Ngechaügüxex, rü pexcèx nixĩ i ñãã ore i tüxü maxëxëëxü.

27 —Rü aixcüma yema Yerucharéücüãxgü ga duüxügü rü yema norü ãëxgacügü rü tama nüxü nacuëxgü ga Tupana Nane na yĩxü ga Ngechuchu. Rü tama meã nüxü nacuëxgü ga tacüchiga na yĩxü ga yema ore ga nuxcümaügüxü ga Tupanaãrü orearü uruügü ümatüxü i ñuxma perü ngutaquëxepataüwa nüxü pedamatügüxü i wüxichigü i ngüxchigaarü ngunexügu. Rü yemaãcü nümagütama ga yema duüxügü ga Ngechuchuxü imëxgüxü rü yexguma yamëxgüãgu rü nayanguxëë ga yema ore ga nuxcüma ümatüxü.

28 —Rü woo taxuüma ga tacü ga chixexü nawa inayangaugü na nayuxëëãxüçèx, natürü Piratuna naxcèx nacagü na yamáãxüçèx.

29 –Rü ningu ga guxūma ga yema ore ga Tupanaārū orearū uruūgū ūmatūxū ga Ngechuchuchiga ga ñuxācū tá na nayuxū. Rü yemawena rü nanayauxgū ga naxūne ga curuchawa, rü wūxi ga naxmaxūgu nayanaxūcuchigū.

30 –Natürū ga Tupana rü wena nanamaxēē ga woo marū na nayuxū.

31 –Rü nūma ga Ngechuchu rü muxūma ga ngunexū naxcèx nangox ga yema duūxūgū ga nawe rüxīxū ga yexguma Gariréaanewa ne naxūxgu rü Yerucharéūwa naxūxgu. Rü ngēma duūxūgū nixī i ñuxma i guxū i duūxūgūmaā nūxū ixugūxū i nachiga.

32-33 Rü ngēmaācū i toma rü nūma tangugū na pemaā nūxū tixuxūcèx i ngēma ore i aixcūma mexū. Rü dūcax, rü yema uneta ga nuxcūmaūgūxū ga tórū oxigūmaā nūxū yaxuxū ga Tupana, rü taxcèx nayanguxēē ga yexguma Ngechuchuxū wena namaxēēgu. Rü wiyaegūpanewa i norū taxre i capíturuwa rü ngēmachiga nūxū nixu i ngēxguma:

“Cuma nixī i Chaune, rü choma nixī i Cunatū chīxū”, ñaxgu.

34 –Rü Tupana rü nuxcūma rü marū nūxū nixu ga wena tá na namaxēēāxū ga Ngechuchu na tama yayixixūcèx ga naxūne. Rü norū orewa rü ñanagūrū:

“Rü choma tá pexcèx chayanguxēē ga yema un-etagū i ūūnegūxū i aixcūma ixīgūxū ga nuxcūma Dabímaā nūxū chixuxū”, ñanagūrū.

35 –Rü ngēmacèx toxnamana i Tupanaārū orewa rü ñanagūrū ta:

“Tama cunaxwèxe na yayixixü i naxüne ya Cune
ya üünecü,”

ñanagürü.

36 –Rü yexguma namauxgu ga Dabí, rü nüxü
narüngüxêê ga norü duuxüğü, yexgumarüü ga
ñuxácü Tupana namuxü. Natürü ñuxüchi nayu, rü
nanatü rü naëxütagu natèx ga naxüne, rü niyixi.

37 –Natürü guma Tupana wena namaxêêcü ga
Ngechuchu rü tama niyixi ga naxüne.

38 –Rü ñuxmax, Pa Chaueneëgüx, rü chanaxwèxe
i nüxü pecuèx rü yimatama Ngechuchugagu Tu-
pana tüxü nüxü nangechaü i tórü pecadugü
ngëxgumarüü i pemaã nüxü tixuxürüü.

39 –Rü ñuxma ya guxāma ya yixema nüxü yaxōgüxe,
rü Ngechuchugagu Tupana tüxü nüxü nangechaü
i guxūma ga yema pecadugü ga noxri taxucürüwa
tüxü nüxü nangechaüxü ga yexguma nagu taxixgu
ga yema mugü ga Moiché ümatüxü.

40 –Rü pexuãëgü na tama pegu nanguxücèx i
ngëma poxcu i Tupanaärü orearü uruüğü nüxü
ixuchigaxü ga yexguma ñagügu:

41 “Rü dücax, Pa Duuxüğü i Tupanaärü Orexü
Cugüexüx, rü tá pebaixāchie rü tá peyue erü
pema pemaxëyane rü tá chanaxü i tacü i
taxü. Rü pema rü tãütāma peyaxōgü i woo
texé pemaã nüxü ixuxgu”,

ñanagürü. Rü yexma nayacuèxêê ga Pauru ga norü
ore.

42 Rü yexguma guma ngutaquëxepataüwa
ínachoxügu ga Pauru rü namücüğü, rü yema
duuxüğü ga tama Yudíugü ixīgüxü rü nüxü
nacèèxüğü na to ga ngüxchigaarü ngunexügu
rü wenaxärü yematama orexü namaã yaxuxücèx.

43 Rū yexguma marū nūxū nachauegu ga na nangutaquēxegūxū, rū Pauru rū Bernabéwe narūxī ga muxūma ga Yudíugū rū mūxūma ga togū ga duūxūgū ga tama Yudíugū ixīgūxū natürü Yudíugürüü yaxōgūxū. Rū Pauru rū Bernabé rū namaã nidexagū rū nayaxucuxēgū na guxūguma nagu naxīnūēechaxūcèx ga ñuxācū Tupana nūxū ngechaūācūma na nadexū.

44 Rū yema to ga ngūxchigaarū ngunexūgu, rū wixgutaèx guxūma ga yema ñānecūāx nangutaquēxegū na inaxīnūēxūcèx ga Tupanaārū ore.

45 Natürü nayexma ga ñuxre ga Yudíugū ga tama ngutaquēxegu chocuxū. Rū yexguma nūxū nadaugūgu ga na namuxūchixū ga duūxūgū ga Paurucèx ngutaquēxegūxū rū poraācū nixāūxāchie. Rū inanaxūgūe ga na Pauruxū nachoxūgagūxū rū namaã naguxchigagūxū.

46 Natürü ga Pauru rū Bernabé rū tama namuūēācūma yema Yudíugūxū nangāxūgū, rū ñānagürügū: —Tupana nanaxwèxe na pemaāxīra nūxū tixuxū i norū ore. Natürü ñūxma na nūxū pexoexū i ngēma ore rū tama na penayauxgūchaūxū i maxū i taguma gūxū, rū ngēmacèx i ñūxmax i toma rū tá ngēma tama Yudíugū ixīgūxūtanūwa taxī.

47 —Yerū yemaācū toxū namu ga Cori, rū ñānagürü: “Duūxūgū i tama Yudíugū ixīgūxūārū ngóonexēēruū marū cuxū chixīxēē, na guxūwama i ñoma i nañewa cunangexūcèx i chorū ore i maxēxēēruū”, ñānagürü.

48 Rū yexguma yema orexū naxīnūēgu ga yema

duŭxügü ga tama Yudíugü ixīgüxü, rü nataãëgü rü ñanagürügü: —Rü namexëchi nixĩ i ñaã Cori ya Tupanaärü ore —ñanagürügü. Rü nayaxögü ga guxüma ga yema duŭxügü ga Tupana marü nüxü unetaxü na nayauxgüãxücèx i maxü i taguma gúxü.

⁴⁹ Rü yemaãcü guxüwama ga yema naãnewa nanguchigü ga Cori ya Tupanaärü ore.

⁵⁰ Natürü yema Yudíugü ga tama Ngechuchuaxü yaxögüchaüxü, rü chixexümaã nayaxuxcuxëgü ga ñuxre ga ngexügü ga mexügü ga Tupanaxü ngechaügüxü rü guma ñãneärü äëxgacügü na Pauru rü Bernabéxü ínawoxüxücèx. Rü yemacèx ínanawoxü ga yema naãnewa.

⁵¹ Rü yexguma ga Pauru rü Bernabé rü inapagücutü ga norü üxaxücutü na yemawa nüxü yacuèãchitanüxücèx ga norü chixexü ga yema ñãnecüãxgü ga duŭxügü. Rü ñuxüchi ga Pauru rü Bernabé rü ñãne ga Icúniüwa naxĩ.

⁵² Natürü yema yaxögüxü ga guma ñãne ga nawa ínachoxünewa yexmagüxü rü poraãcü Tupana-maã nataãëgü, rü Naãe i Üünexü rü aixcüma nawa nayexma.

14

Pauru rü Bernabé rü ñãne ga Icúniüwa nayexmagü

¹ Rü Icúniüwa rü wüxigu Yudíugüarü ngutaquëxepataügu nachocu ga Pauru rü Bernabé. Rü meãma nüxü nixuchiga ga Tupanaärü ore rü yemaãcü nayaxögü ga muxüma

ga duñxügü ga Yudíugü rü yema tama Yudíugü ixíngüxü rü ta.

² Natürü yema Yudíugü ga tama Ngechuchuaxü yaxōgüxü, rü chixexümaã nayaxucüxēgü ga yema tama Yudíugü ixíngüxü na yema yaxōgüxüchi nax-aiexücèx.

³ Rü yemacèx muxüma ga ngunexü yexma narücho ga Pauru rü Bernabé, rü tama namuñēācūma nüxü nixuchiga ga Cori ya Tupanaärü ore. Rü yema duñxügümaã nüxü nixu na ñuxācü Tupana poraācü tüxü nangechañxü. Rü nüma ga Cori rü yema duñxügüxü nüxü nadauxēē na namaã nataāñxü ga yema ore. Rü yemacèx Pauru rü Bernabéxü narüngüxēē na inawēxgüāñxücèx ga cuèxruügü rü na naxügüāñxücèx ga mexügü ga Tupanaärü poramaã naxügüxü.

⁴ Natürü ga guma ñānecüñx ga duñxügü rü ni-toye. Rü nümaxü rü yema Yudiugüwaama naxügü rü togü rü Pauru rü Bernabéwaama naxügü.

⁵ Rü yexguma ga yema Yudíugü, rü yema duñxügü ga tama Yudíugü ixíngüxü, rü guma ñāneärü ãñxgacügümaã wüxigu nagu narüxññüē na Pauruxü rü Bernabéxü yayauxgüxü na nutamaã inamuxüchigüāñxücèx.

⁶⁻⁷ Natürü yexguma nüxü nacuáchigagügu ga Pauru rü Bernabé, rü nibuxmü. Rü Dicóniññewa yexmane ga ñānegü ga Listra rü Derbewa naxí. Rü guma ñānegüwa rü guxüma ga yema naññewa ipeagüxü ga duñxügümaã rü ta nüxü nixuchigagü ga ore i mexü.

Nutagümaã Pauruxü inamuxüchigü ga Listrawa

8-9 Rû yéma Listrawa nayexma ga wüxi ga yatü ga ínapogücutüxü norü bucümatama. Rû yéma narüto rû inarüxĩnü ga yema Pauru nüxü ixuxü ga ore. Rû Pauru rû meãma nüxü nadawenü, rû nüxü nadau ga na nüxü nayexmaxü ga norü õ na naxcèx yataanexücèx.

10 Rû yexguma ga Pauru rû tagaãcü ñanagürü nüxü: —¡Inachi, rû meãma ínangacutü! —ñanagürü. Rû yexguma inayuxnagü ga guma yatü, rû inanaxügü ga na iyaxüxü.

11 Rû yexguma yema muxüma ga duüxügü nüxü daugügu ga yema na naxüxü ga Pauru, rû tagaãcü yema Dicóniügawa nidexagü, rû ñanagürügü: —Tupanagü i naduüxügüraüxü ínarüxígü, rû tatanüwa nangugü —ñanagürügü.

12 Rû Bernabé rû tupana ga Chéumaã nanaxüéagü. Rû Pauru rû Érememaã nanaxüéagü yerü nüma nixí ga yadexaxü.

13 Rû guma ñãne íxücuxüwa nayexma ga tupana ga Chéuarü tupauca ga taxüne. Rû guma tupaucaarü pai rû yéma nanagagü ga wocagü ga iyatüxü ga putüramaã ngèxãégüxü. Rû nüma ga pai rû ga duüxügü rû nanadaixchaü ga yema wocagü naxcèx ga Pauru rû Bernabé na yemamaã nüxü yacuèxüügüxücèx.

14 Natürü yexguma nüxü yacuèxãchitanügu ga Bernabé rû Pauru, rû norü gáuxüchirugu nagáugüe na yema duüxügü nüxü cuéxgüxücèx na tama namexü ga yema naxcèx naxüechaüxü. Rû yema muxüma ga duüxügütanüwa nabuxmü, rû ñaxümaã aita naxüe:

15 —Pa Yatügüx, ¿tüxcüü toxcèx penaxü i ngëma? Toma rû pexrüü duüxügümare tixígü. Rû nuã

taxĩ na pemaã nüxũ tayarũxuxũcèx na nüxũ perũxoexũcèx i ngẽma chixexũgũ i taxuwama mexũ rü naxcèx pedaugũxũcèx ya Tupana ya maxũcü ga naxũcü ga daxũguxũ i naãne, rü ñoma i naãne, rü taxtũ i taxũ, rü guxũma i nawa ngẽxmaxũ.

16 –Rü nuxcümayerü nixĩ ga Tupana ga yaxna namaã naxĩnüxũ ga duũxũgũ ga woo nũmagũ nanaxwèxegũxũ naxũgũgu.

17 –Natürü nüma ga Tupana rü taguma nüxũ narũchau na duũxũgũxũ nangũxẽẽxũ. Rü yemaãcü tüxũ nüxũ nacuèxẽẽ na Tupana yĩxũ i nümax. Rü nümatama nixĩ i núma namuãxũ ya pucũ rü meã pexũ nayaexẽxẽãxũ i penetũgũ. Rü nüma nixĩ i pexna naxããxũ i pewemũ na ngẽmaãcü petaãẽgũxũcèx –ñanagürũgũ ga Pauru rü Bernabé.

18 Natürü woo yema orexũ namaã na yaxugũxũ rü poraãcü nüxũ naguxcha ga Pauru rü Bernabé ga nüxna na nachogũxũ ga duũxũgũ ga tama naxcèx na nadaiãxũcèx ga yema wocagũ na yema-maã nüxũ yacuèxũgũxũcèx. Rü düxwa yemacèx tama naxcèx nanadai.

19 Natürü yexgumayane rü ínangugũ ga ñuxre ga Yudíugũ ga Aũtioquíawa rü Icúniũwa ne íxũ. Rü chixexũmaã nayaxucuxègũ ga yema muxũma ga duũxũgũ na tama Pauru rü Bernabéga naxĩnüèxũcèx, rü namaã nanuèxũcèx. Rü yemacèx ga yema duũxũgũ rü nutamaã Pauruxũ ínamuxũchigũ, rü ñãneãrũ íxpemawa nanatúchigũgũ, yerü nüma nüxũ nacuèxgũgu rü marũ nayu.

20 Natürü yexguma yema yaxõgũxũ naxũtawa ngutaquèxegu, rü inachi ga Pauru, rü wenaxãrũ nagu naxũcu ga guma ñãne. Rü moxũãcü inaxũãchi

ga yéma, rü Bernabémaã Derbewa naxũ.

²¹ Rü guma ãñewa nüxũ nixugüe ga ore ga mexũ. Rü nanangúexêê ga duũxũgü, rü muxũma Tupanaãxũ nayaxõgü. Rü yemawena rü wenaxãrũ naxcèx nawoegu ga Listra, rü Icúniũ, rü Aũtioquía.

²² Rü guma ãñegüwa rü yema yaxõgüxũxũ nixucuxêgü, rü nüxũ nanangúchaũxêêgü na guxũguma meã na yaxõgüãxũcèx. Rü namaã nüxũ nixugüe, rü ñanagürügü: —Ngêma Tupana ãëxgacü íxixũwa na ixücuxũcèx, rü tanaxwèxe na muëxpüxcüna guxchaxũgümaã yaxna ixĩnüëxũ i ñoma í nañewa —ñanagürügü.

²³ Rü Pauru rü Bernabé rü wüxichigü ga ãñewa rü nüxũ nixunetatanü ga ñuxre ga yatügü na yaxõgüxũãrũ ãëxgacügü yixĩgüxũcèx. Rü tama nachibüëãcüma naxcèx nayumüxêgü. Rü yemawena rü yima Cori ya Tupana ga nüxũ yaxõgüãcüna nanaxuaxũgü na guxũguma namaã inaxãũxũcèx rü meã nüxna nadauxũcèx ga yema yaxõgüxũãrũ ãëxgacügü.

Pauru rü Bernabé rü naxcèx nawoegu ga Aũtioquía ga Chíríiaanewa yexmane

²⁴ Rü Pichídiaanewa nichopetü, rü Paũpíríiaanewa nangügü.

²⁵ Rü Pérupe ga ãñewa nüxũ nixugüe ga Tupanaãrũ ore, rü ñuxũchi Atária ga ãñewa naxĩ.

²⁶ Rü yéma rü wüxi ga wapurugu nichoũ na Aũtioquíacèx nawoeguxũcèx. Rü guma ãñe ga Aũtioquíawa nixĩ ga noxri duũxũgü Tupanana namugüxũ ga Pauru rü Bernabé na naxügüãxũcèx ga yema puracü ga ñuxma marü yanguxêëgüxũ.

27 Rū yexguma ínangugügu ga Pauru rü Bernabé, rü nanangutaquëxexëë ga guxũma ga yema duũxũgü ga yaxõgũxũ. Rū namaã nüxũ nixugügu ga guxũma ga ñuxãcü Tupana poraãcü nüxũ na rüngũxëëxũ. Rū yexgumarũũ ta rü namaã nüxũ nixugügu ga ñuxãcü na yaxõgũãxũ ga yema duũxũgü ga tama Yudíugü ixíngũxũ, yerü Tupana nüxũ nanatauxchaxëë na yaxõgũãxũcèx.

28 Rū muxũma ga ngunexũgu yema yaxõgũxũtanüwa nayexmagü ga Pauru rü Bernabé.

15

Yerucharéüwa nangutaquëxegü

1 Rū yexgumaücüü rü nayexma ga ñuxre ga duũxũgü ga Yudeaanewa ne íxũ ga Aũtioquíawa ngugũxũ. Rū nümagü inanaxügüe ga tüxũ na nangúexëëxũ ga guxema yaxõgũxe ga Aũtioquíacũãx, rü ñanagürügü: —Ngëxguma tama pegü ípewiũchëxmüpëxechiraũgu yema Moíché tüxũ muxürũũ rü taxuacüma pexũ nangëxma i maxũ i taguma gúxũ —ñanagürügü.

2 Natürü ga Pauru rü Bernabé rü tama norü me nixí ga yema, rü yemacèx poraãcü nügü namaã nachoxũgagü ga yema duũxũgü ga Yudeaanewa ne íxũ. Rū düxwa Pauru rü Bernabé rü ñuxre ga togü ga Aũtioquíacũãx ga yaxõgũxũxũ naxunetagü na Yerucharéüwa naxĩxũcèx na yema ngúexũgü ga Ngechuchu imugũxũ rü yema yaxõgũxũãrũ aëxgacügümaã yamexëëgũãxũcèx ga yemachiga.

3 Rū yemaãcü ga yema yaxõgũxũ ga Aũtioquíacũãx rü Yerucharéüwa nanamugü ga yema yatügü na naxcèx íyacagũxũcèx rü

yamexêëgüãxücèx ga yema ore. Rü Peníchiaanewa rü Chamáriaanewa nachopetü ga Pauru rü Bernabé. Rü yéma rü duũxügümaã nüxü nixugüe ga ñuxácü yema tama Yudíugü ixígüxü rü nüxü na naxoexü ga nuxcümaũxü ga nacümagü na Tupanawe naxixücèx. Rü yema oremaã poraãcü nanataãêxêëgü ga guxüma ga yema yaxögüxü.

⁴ Rü Yerucharéüwa nangugü ga Pauru rü Bernabé. Rü guxüma ga yema yaxögüxü rü yema ngúexügü ga Ngechuchu imugüxü rü yema yaxögüxüãrü ãêxgacügü rü meãma nanayauxgü. Rü Pauru rü Bernabé namaã nüxü nixugügü ga guxüma ga ñuxácü Tupana poraãcü nüxü na rüngüêëxü na duũxügümaã nüxü yaxugüxücèx ga ore i mexü.

⁵ Natürü ñuxre ga Parichéugü ga Ngechuchuaxü yaxögüxü, rü inachigü, rü ñanagürügü: —Name nixí na nügü ínawiũchèxmüpêxechiraũgüxü i ngêma tama Yudíugü ixígüxü i ngexwaca yaxögüxü. Rü name nixí na naga naxĩnüêxü i ngêma mugü ga Moĩché ümatüxü —ñanagürügü.

⁶ Rü yexguma nangutaquêxegü ga yema ngúexügü ga Ngechuchu imugüxü rü yema yaxögüxüãrü ãêxgacügü na namexêëgüãxücèx ga yema ore.

⁷ Rü yixcama marü ñuxgumama nügümaã yéma yaporagatanücüügu, rü inachi ga Pedru, rü ñanagürü nüxü: —Pa Chaueneêgüx, pema nüxü pecuèx ga na üpamama Tupana choxü yaxuxü ga petanüwa na yema duũxügü i tama Yudíugü ixígüxümaã nüxü chixuxücèx i norü ore i mexü i maxêxêëruü, na nümagü rü ta Ngechuchuaxü yaxögüãxücèx.

8 –Rü yima Tupana ya guxããẽxũ cuácü rü tüxũ nüxũ nadauxẽẽ na nadeãxũ i ngẽma duũxũgü i tama Yudíugü ixĩgüxũ, yerü nüxna nanamu ga Naãẽ i Üünexũ yema tüxna namuãxürüũ.

9 –Rü Tupanapẽxewa rü yixema i Yudíugü rü namaã tawüxigu i ngẽma duũxũgü i tama Yudíugü ixĩgüxũ. Yerü nümagü rü ta Tupana nüxũ nüxũ nangechaũ ga norü pecadugü ga yexguma nüxũ yaxõgüãgu.

10 –¿Rü tüxcüũ tama namaã petaãẽ i ñuxma i ngẽma Tupana üxũ? ¿Rü tüxcüũ ngẽma ngexwacèx yaxõgüxũxũ penaxüxẽẽchaũ i ngẽma Moĩchearü mugü i guxchaxũ ga tórü oxigü rü taxuacüma naga taxĩnüexũ rü woo yixemagü rü ta taxuacüma inguxẽẽxũ?

11 –Rü tama ngẽma mugü nixĩ i tüxũ maxẽxẽẽxũ. Natürü yixema rü tayaxõgü na tórü Cori ya Ngechuchu tamaã mecümaxũgagu yĩxũ na tüxna naxãmareãxũ i maxũ i taguma gúxũ. Rü ngẽxgumarüũ ta nixĩ i naxcèx i nümagü i tama Yudíugü ixĩgüxũ –ñanagürü ga Pedru.

12 Rü inanaxügü ga Bernabé rü Pauru na yadexagüxũ. Rü guxũma ga yema duũxũgü rü inarüchianegü rü inarüxĩnüẽmare. Rü Bernabé rü Pauru rü namaã nüxũ nixugüe ga ñuxãcü Tupana na nüxũ rüngüxẽẽgüxũ na naxügüãxüçex ga mexũ ga taxũgü ga Tupanaãrü poramaã naxügüxũ natanüwa ga yema duũxũgü ga tama Yudíugü ixĩgüxũ.

13 Rü yexguma Bernabé rü Pauru igúegagügu, rü nüxĩxãrü nidexa ga Chaũtiágu, rü ñanagürü: –Pa Chaueneẽgüx, ¡choxũ iperüxĩnüẽ!

14 –Pedru i Chimáũ rü tamaã nüxũ nixu na ñuxãcü Tupana inaxügüxũ ga nüxũ na nangüxẽxũ ga yema duüxügü i tama Yudíugü ixĩgüxũ. Rü tamaã nüxũ nixu ta na ñuxãcü Tupana yema duüxügütanüwa nadeãxũ ga ñuxre ga duüxügü na noxrü yixĩgüxũcèx.

15 –Rü ngẽma Pedru nüxũ ixuxũ rü nawüxigu namaã ga yema ore ga nuxcümaügüxũ ga orearü uruügü ümatüxũ ga ñaxũ:

16 “Rü ngẽmawena rü tá chataegu, rü tá nüxũ charüngüxẽe i Dabítaagü i Yudíugü. Rü woo nawoonemare i ñuxmax, natürü wena táxarü wüxiwa chanaxĩxẽe, rü tá íchanadagüxẽe na noxrirüü naporaexũcèx.

17 Rü ngẽmaãcü tá nüxũ charüngüxẽe na ngẽma duüxügü i tama Yudíugü ixĩgüxũ rü chauxcèx nadaugüxũcèx, wüxigu namaã i guxũma i chorü duüxügü i Yudíugü i choma chadexũ.

18 Rü yemaãcü nüxũ nixu ga nüma ga Cori ya Tupana ga nuxcü mama tüxũ nüxũ cuèxẽecü ga yema”, ñanagürü ga yema ore ga nuxcüma ümatüxũ.

19 Rü ñanagürü ga Chaũtiágu: –Rü ngẽmacèx, Pa Chaueneẽgüx, rü chauxcèx rü tama name na guxũ i Moíché ümatüxũ i mugümaã nüxũ ichixewexũ i ngẽma duüxügü i tama Yudíugü ixĩgüxũ i nüxũ rüxoexũ i nuxcümaüxũ i nacümagü na Tupanawe naxĩxũcèx.

20 –Rü narümemaẽ nixĩ i naxcèx tanaxümatü i popera, rü ngẽmawa namaã nüxũ tixu:

(1) Rü tama name na nangõxgüãxũ i ngẽma naxũnagümachi i togü norü tupanetachicünèxãgücèx deĩxũ.

- (2) Rû tama name na naĩ i ngemaã rû
 êxna naĩ ya yatümaã inapexũ.
 (3) Rû tama name na nangõxgüãxũ i na-
 machi i ngẽma naẽxũ rû êxna naxũna i
 wẽxnaãxũ rû êxna natügu nguxũ.
 (4) Rû tama name na nangõxgüãxũ ya
 nagü.

Rû ngẽxĩcatama nixĩ i inaxwèxexũ na naxcèx
 naxümatüxũ.

²¹—Erü guxũne ya ãñewa nangẽxma ya Yudíugüarü
 ngutaquẽxepataũ i ngextá nuxcümama guxũ i
 ngüxchigaarü ngunexũgu nawa ínangúe rû nüxũ
 nixuchigagü i guxũma i ngẽma mugü ga Moĩché
 ümatüxũ —ñanagürü ga Chaũtiágu.

*Popera ga yema duixügu ga tama Yudíugü
 ixĩgüxüçèx ümatüxũ*

²² Rû yema ore rû norü me nixĩ ga yema
 ngüexügu ga Ngechuchu imugüxũ, rû yema
 yaxõgüxũãrü ãẽxgacügü, rû guxũma ga yema
 yaxõgüxũ. Rû nügümaã ñanagürügü: —¡Ngĩxã
 tatanüwa tanade ya taxre ya yatügü na
 Aũtioquíawa namugüxüçèx namaã ya Pauru rû
 Bernabé! —ñanagürügü. Rû nüxũ naxunetagü ga
 Yuda ga Barsabágu ãegaxũ rû Chira. Rû nümagü
 ga Yuda rû Chira rû ãẽxgacügü nixĩ ga natanüwa
 ga yema yaxõgüxũ ga Yerucharéüwa yexmagüxũ.

²³ Rû namaã yéma nanamugü ga popera, rû ñaã
 nixĩ ga yema ore ga nagu naxümatügüxũ:

“Pa Toeneëgü i Tama Yudíugü Ixĩgüxe i
 Aũtioquíagu rû Chíriaanegu rû Chiríchiaanegu
 Ñchiügüxe, rû toma i peeneëgü i Ngechuchu

toxü imügüxe rü toma i yaxõgüxüârü âëxgacügü ixîgüxex, rü pexü tarümoxëgü.

²⁴ Rü nüxü tacuáchigagü rü ñuxre ga duüxügü ga núma ne îxü rü woo tama toma yéma tana-mugü natürü nümagü rü yéma naxî rü Moïchéarü mugümaã pexü nachixewegü rü yemaãcü pexü ínatüexëë.

²⁵ Rü yemacèx guxãma ga toma rü wüxigu nagu tarüxînüë na totanüwa nüxü taxunetaxü ga taxre ga taeneëgü na pexcèx ngëma tanamugüxücèx namaã i taeneëgü i nüxü ingechaügüxü i Bernabé rü Pauru.

²⁶ Rü nümagü i Bernabé rü Pauru nixî ga poraãcü ãücümáxüwa nayexmagüxü naxcèx ga tórü Cori ya Ngechuchu ya Cristu.

²⁷ Rü ñuxma rü pexcèx ngëma tanamugü i Yuda rü Chira na nümagüxüchi pemaã nüxü yax-ugüxücèx rü pemaã nangoxëëgüãxücèx i guxüma i torü ore.

²⁸⁻²⁹ Erü Tupanaãë i Üünexücèx name, rü toxcèx rü ta name na tama muxüma i mugü pexna taxãgüxü. Rü ñaã ägümücü i mugüxícatama nixî i pexü tamuxü:

- (1) Rü tama name na penangõxü i naxünagümachi i togü norü tupananetachicünèxãgücèx dëixü.
- (2) Rü tama name na penangõxü i namachi i ngëma naxünagü i wëxnaãxü.
- (3) Rü tama name na penangõxü ya nagü.
- (4) Rü tama name na naï i ngemaã rü ëxna naï ya yatümaã ipepexü.

Rü mexü tá pexügü ega penaxauregu i ngëma mugü. Rü nuãma pexna", ñanagürü ga yema ore ga

naxümatügüxü.

³⁰ Rü natanüxüxü namoxëgüguwena, rü inaxiãchi ga yema yéma mugüxü, rü Aütioquíawa naxi. Rü yexguma yéma nangugügu rü nanangutaquëxexëë ga guxüma ga yema yaxögüxü ga duüxügü, rü nüxna nanaxägü ga yema popera.

³¹ Rü yexguma nüxü nadaumatügügu, rü poraãcü nataãgü namaã ga yema ucuxëgü ga nüxna naxägüxü.

³² Rü Yuda rü Chira ga Tupanaärü orearü uruügü na yixigüxü, rü muxüma ga oremaã nayaxucuxëgü ga yema yaxögüxü, rü nüxü narüngüxëë na yexeraãcü yaxögüãxüçex.

³³ Rü marü ñuxre ga ngunexü yéma nayexmagüguwena, rü ínixi. Rü yema yaxögüxü ga Aütioquíacüãx, rü taãëacüma Yuda rü Chiraxü narümoxëgü rü meãma ínayamugü na naxçex nawoeguxüçex ga yema Yerucharéüçüãx ga noxri natanüwa namugüxü.

³⁴ Natürü ga Chira rü nagu narüxñü na yexma Aütioquíagu naxãüxü, rü yemacèx Yudaxicatama Yerucharéüçex nataegu.

³⁵ Rü Pauru rü Bernabé rü ta yexma narücho. Rü wüxigu namaã ga muxüma ga togü, rü nanangüexëë ga duüxügü, rü namaã nüxü nixugügü ga Cori ya Tupanaärü ore i mexü.

Pauru rü wenaxärü inaxüãchi ga to ga nachüãnegüwa na nangeaxü ga Tupanaärü ore

³⁶ Rü yexguma marü ñuxre ga ngunexü ngu-petügu, rü ñanagürü ga Pauru Bernabéxü: —¡Ngixã wenaxärü natanügu tanaxiãne i ngëma yaxögüxü

i guxũne ya ããne ga ngextá nüxũ íxuchigaxũwa ga Cori ya Tupanaãrũ ore na nüxũ idauxũcèx na ñuxãcü nüxũ Ínangupetügüxũ! —ñanagürũ.

³⁷ Rũ Bernabé rũ nayagaxchaũ ta ga Cuáũ Marcu.

³⁸ Natürũ ga Pauru rũ tama nanaxwèxe ga na yagaãxũ, yerũ Paũpíriawa nüxna naxo ga noxri, rũ tama Ínayaxümücũ ga yema puracüwa.

³⁹ Rũ poraãcü nügümaã niporagatanücüü naxcèx ga yema, rũ düxwa nügüna nixĩgü. Rũ Bernabé nayaga ga Marcu, rũ Chiprearũ capaxũwa naxũ.

⁴⁰ Rũ yoxni ga Pauru rũ Chiraxũ niga. Rũ yema Aũtioquiãcüãx ga yaxõgüxũ rũ naxcèx nayumüxègü na Tupana nüxũ rüngüxèẽgüxũcèx. Rũ yexguma inaxĩãchi.

⁴¹ Rũ Chíríiaanewa rũ Chiríchiaanewa nachopetü, rũ yéma Tupanaãrũ oremaã nanataãèxèẽgü ga yema yaxõgüxũ.

16

Pauru rũ Chirawe narüxũ ga Timutéu

¹ Rũ Derbewa rũ Listrawa nangugü ga Pauru rũ Chira. Rũ yéma nayexma ga wüxi ga yaxõcü ga Timutéugu ãegacü. Rũ naẽ rũ wüxi ga Yudíu ga yaxõxcü iyixĩ. Rũ nanatü rũ wüxi ga Griégu tixĩ.

² Rũ guxũma ga yema yaxõgüxũ ga Listracũãxgü rũ Icúniücũãxgü rũ nüxũ nixugüe na mea maxücü yixĩxũ ga nüma ga Timutéu.

³ Rũ Pauru rũ nanaxwèxe na Timutéu íyaxümücüxũ. Natürũ naxüpa ga na yagaãxũ rũ Ínanawiechèxmüpèxechiraũ, yerũ yemaãcü nanaxwèxegü ga yema Yudíugü ga yema naãnewa

yexmagüxü. Yerü guxüma nüxü nacuèxgü ga na Griégu tîixü ga nanatü.

⁴ Rû guxünema ga guma îānegü ga nawa nachopetünewa, rû duüxügümaā nüxü nixugüetanü ga yema ucuxê ga yema Yerucharéüçüāx ga ngúexügü ga Ngechuchu imugüxü rû yema yaxōgüxüārü āēxgacügü nüxü ixugüxü.

⁵ Rû yemaācü yexeraācü meā nayaxōgü ga guxüma ga yema yaxōgüxü, rû guxü ga ngunexü rû yexeraācü nimuētanü ga yema yexwacèx yaxōgüxü.

Pauru nangoxetü rû wüxi ga yatü ga Machedóniācūāxü nadau

⁶ Rû Áchiaanewa naxīxchaü na yéma nüxü yaxugüxüçèx ga ore i mexü. Natürü Tupanaāē i Üünexü rû nüxna nanachuxu ga yema. Rû yemacèx Piríquiaanewa rû Gárataanewaama nachopetü.

⁷ Rû Míchiaarü naānewa nangugü, rû yéma nagu narüxīnüē ga na Bitíniāārü naānewa naxīxü. Natürü yéma rû ta Tupanaāē i Üünexü nüxna nanachuxu ga na yéma naxīxü.

⁸ Rû yemacèx Míchiaanewa nachopetümare rû îāne ga Tróawa nangugü.

⁹ Rû yema chütaxügu rû Pauru nangoxetü rû nüxü nadau ga wüxi ga yatü ga Machedóniācūāx ga napēxegu chicü. Rû nüxü nacèèxü, ñaxümaā: —¡Machedóniāwa naxü, rû toxü rüngüxēē! — ñaxümaā.

¹⁰ Rû yexguma yemaxü nadèuxgu ga Pauru, rû yexgumatama togü tamexēēgü na Machedóniāwa

taxĩxüçèx. Yerü nüxü tacuèxgü rü aixcümamaxüchi nixĩ ga Tupana toxçèx çaxü na yema duüxügümaã nüxü tixuxüçèx ga ore i mexü.

Piripuwa nayexmagü ga Pauru ru Chira

11 Rü Tróaarü türewa itaxĩächi, rü capaxü ga Chamotáchiucèx wëxgu taxĩ. Rü moxüãcü Neãporiwa tangugü.

12 Rü yéma rü dauxchitagu taxĩ rü Piripuwa tangugü. Rü guma nixĩ ya Dumacüãxgüarü ãne ga Machedóniããnegu naxügüne. Rü guma nixĩ ya guxüne ya ãneärü tamaëne ga yéma. Rü yéma tayexmagü ga ñuxre ga ngunexügü.

13 Rü ngüxchigaarü ngunexügu, rü guma ãne iyacuáxüwa taxĩ ga natüpechinüwa, yerü nagu tarüxĩnüëgu rü yéma nayexma ga Yudügüarü yumüxëchica. Rü yéma tarütogü, rü namaã tidexagü ga ñuxre ga ngexügü ga yéma ngutaquëxegüxü, rü namaã nüxü tixugü ga Tupanaärü ore.

14 Rü yéma iyexma ga wüxi ga ngecü ga Díria ga ngëga ga Tupanaxü icuèxüüxcü. Rü Tiatíra ga ãnecüãx iyixĩ. Rü dauxracharaxü ga naxchirumaã itaxe yerü yema nixĩ ga ngĩrü puracü. Rü ngĩma rü meãma yéma irüxĩnü, yerü nüma ga Cori ya Tupana rü ngixü nanangüchaüxëë na meã inaxĩnüxüçèx ga yema ore ga Pauru nüxü ixuxü.

15 Rü yemawena rü ñuxüchi íbaie wüxigu namaã ga guxüma ga ngĩtanüxügü. Rü yixcama rü toxü icèèxü ñaxümaã: —Ngëxguma pema choxü pedèuxgu na aixcüma nüxü chayaxõxü ya Cori ya Tupana, rü marü name ega chopatagu peyapegügu —ngĩgürügü. Rü yéma toxü ixixëë.

16 Rū wūxi ga ngunexūgu ga yexguma yumūxēwa taxīxgu ga tomax, rū yexma ngīxū tayangau ga wūxi ga pacū ga corigūxūtaxū ixīcū ga ngoxoāxcū. Rū yema pacū rū wūxi ga tacūxū cuēxcū iyixī, rū duūxūgūmaā nūxū iyaxu ga tacū tá yixcūra na ngupetūxū. Rū yemacèx ga duūxūgū rū dīērumaā ngīxū nanaxūtanū na nūxū yaxuxūcèx na tacū tá na ngupetūxū. Rū yemaācū poraācū dīēruxū itū naxcèx ga ngīrū corigū.

17 Rū ngīma towe ingē ga toma rū Pauru, rū tagaācū ngīgürügü: —Ŋaā yatügü rū Tupana ya tacūxūchimaārū duūxūgū nixī, rū pemaā nūxū nixu na ñuxācū tá penayaxuxū i maxū i taguma gūxū —ngīgürügü.

18 Rū yemaācū iyixī ga muxūma ga ngunexūgu. Rū dūxwa nūxū nawèxtümūxū ga Pauru, rū ngīxcèx nadauegu, rū ñanagürü nūxū ga yema ngoxo ga ngīwa yexmaxū: —Ngechuchu ya Cristuégagu cuxū chamu, na ngīwa ícuxūxūcèx —ñanagürü. Rū yexgumatama ngīwa ínaxūxū ga yema ngoxo.

19 Rū yexguma nūxū nadaugūgu ga ngīrū corigū ga marū tama ngīgagu dīeru ngīxū na nayauxgūxū, rū Pauru rū Chiraxū ínayauxū, rū āēxgacügüarū ngutaquēxechicawa nanagagū.

20 Rū āēxgacügüna nanaxuaxū ga yema ngīrū corigū, rū ñanagürügü: —Ŋaā Yudíugü rū tórü ñānewa nanachixeāēxēgü i duūxūgü.

21 —Rū tūxū nangúxēē na naxaurexūcèx i nacūmagū i tūxna chuxuxū i yixema i Dumacūāxgū —ñanagürügü.

22 Rū yexguma ga guxūma ga yema ñānecūāx, rū Pauru rū Chirana nayuxgü. Rū yema āēxgacügü

nanamu na ínacuḡũãxũcèx rü ngexchiruxüma naĩxmenèxãmaã yaçuaixgũãxũcèx.

²³ Rŭ yexguma marü poraãcü yaçuaixgũãguwena, rü poxcupataũgu nanawocu. Rŭ nüxna naxãga ga yema poxcupataũãrŭ dauruũ na meãma nüxna nadauxũcèx.

²⁴ Rŭ yexguma yemaxũ naxĩnũgu ga yema dauruũ, rü poxcupataũãrŭ aixepexguxũchixũ ga ucapugu nanawocu, rü meãma nayachotaparagũ.

²⁵ Natürŭ ngãxũcüũgu rü nayumũxëgũ ga Pauru rŭ Chira, rü nawiyaegũ, rü Tupanaxũ nicuèxũũgũ. Rŭ yema togũ ga poxcuexũ rŭ nüxũ naxĩnüẽ.

²⁶ Rŭ ngürũãchi poraãcü naxĩãxãchiane, rü ínayangogũtanũãchi ga guma poxcupataũãrŭ caxtagũ. Rŭ yexgumatama niwãxnagũ ga guxüma ga ããxgũ ga guma poxcupataũ. Rŭ guxüma ga yema poxcuexũãrŭ cadenaparagũ rŭ niwëgũ.

²⁷ Rŭ pewa nabaixãchi ga yema poxcupataũãrŭ dauruũ. Rŭ yexguma nüxũ nadèuxgu ga na yawãxnagũxũ ga ããxgũ ga guma poxcupataũ rŭ nanayaxu ga norü tara na nügũ yamáxũcèx, yerü nüma nüxũ nacuèxgu rŭ marü nibuxmü ga yema poxcuexũ.

²⁸ Natürŭ tagaãcü aixta naxü ga Pauru, rŭ ñanagürŭ nüxũ: —ĩTãxũ i cugũ quimáxũ! Rŭ guxãma i toma rŭ tanuxmagũ —ñanagürŭ.

²⁹ Rŭ yexguma ga yema poxcupataũãrŭ dauruũ rŭ naxcèx ínaca ga wüxi ga omü, rŭ inañaãchiãcüma yema duũxũgũ ípoxcuexũgu nayangaxi, rŭ yaduruxãcüma Pauru rŭ Chirapëxegu nayacaxãpũxü.

³⁰ Rŭ yexguma ããxtüwa Pauru rŭ Chiraxũ nagagũ, rŭ ñanagürŭ nüxũ: —Pa Corigũx, ¿Tãcũ tá

chaxūxŭ i choma na choxŭ nangēxmaxŭcèx i maxŭ i taguma gúxŭ? —ñanagŭrŭ.

³¹ Rŭ nŭmagŭ rŭ nanangāxŭgŭ rŭ ñanagŭrŭgŭ nŭxŭ: —¡Nŭxŭ yaxō ya Cori ya Ngechuchu, rŭ tá cuxŭ nangēxma i maxŭ i taguma gúxŭ i cuma rŭ guxŭ i cupatacŭāx! —ñanagŭrŭgŭ.

³² Rŭ namaã rŭ guxŭma ga yema napatacŭāxgŭmaã rŭ ta nŭxŭ nixugŭe ga Cori ya Tupanaãrŭ ore.

³³ Rŭ yematama oragu ga chŭtacŭ, rŭ nŭma ga yema poxcupataŭãrŭ dauruŭ nayayauxgŭ ga norŭ oxrigŭ ga Pauru rŭ Chira. Rŭ yemawena rŭ ñuxŭchi ínabaie ga nŭma wŭxigu tŭmamaã ga naxmèx rŭ naxacŭgŭ.

³⁴ Rŭ ñuxŭchi ga nŭma ga poxcupataŭãrŭ dauruŭ rŭ napatawa Pauruxŭ rŭ Chiraxŭ nagagŭ. Rŭ òna nŭxna naxã rŭ nataãe ga nŭma rŭ guxŭma ga napatacŭāxgŭ ta, yerŭ Tupanaãxŭ nayaxōgŭ.

³⁵ Rŭ moxŭãcŭ pèxmama rŭ yema ñãneãrŭ ãēxgacŭgŭ rŭ yema poxcupataŭãrŭ dauruŭxŭtawa nanamugŭ ga purichíagŭ na namaã nŭxŭ yanaxugŭxŭcèx na Pauru rŭ Chiraxŭ ínamuxŭxŭ.

³⁶ Rŭ yexguma ga yema poxcupataŭãrŭ dauruŭ rŭ ñanagŭrŭ Pauruxŭ: —Rŭ ngēma ãēxgacŭgŭ rŭ nuã nanamugŭ i ore na pexŭ íchamuxŭxŭcèx. ¡Rŭ ècŭ ípechoxŭ, rŭ meã ípixŭ! —ñanagŭrŭ.

³⁷ Natŭrŭ ga Pauru rŭ ñanagŭrŭ nŭxŭ ga yema purichíagŭ: —Marŭ chixri tomaã nachopetŭ i toma i Dumacŭāxŭchigŭ na tixŭgŭxŭ, rŭ tama toxna nacaxiraãcŭma toxŭ niçuaixgŭ ga napèxewa ga guxŭma ga duŭxŭgŭ, rŭ ñuxŭchi poxcupataŭgu toxŭ nawocu. Rŭ ñuxma rŭ

cúãcüma toxü ínamuxüchaü. Rü täütáma ngëmaãcü nixí. ¡Rü êcü nümatama núma naxí i ãëxgacügü na nümatama toxü íyamuxüxücèx! —ñanagürü ga Pauru.

³⁸ Rü yexguma ga yema purichíagü rü ãëxgacügümaã nüxü nayarüxugüe ga yema ore. Rü poraãcü nabaixãchiãëgü ga yema ãëxgacügü ga yexguma nüxü naxínüëgu ga na Dumacüãxüchi yixígüxü.

³⁹ Rü yéma naxí, rü Pauru rü Chirana nay-acagü na nüxü nüxü nangechaügüxücèx naxcèx ga yema namaã naxügüxü. Rü ínanamuxü, rü nüxü nacèèxügü na nawa ínachoxüxücèx ga guma ããne.

⁴⁰ Rü yexguma poxcupataüwa ínachoxügu ga Pauru rü Chira, rü Díriapatawa naxí. Rü yema yaxögüxümaã nangutaquëxegü, rü nayaxucüxëgü, rü Tupanaärü oremaã nanataãëxëëgü. Rü ñuxüchi yemawena rü inaxíãchi.

17

Pauru rü Chiramaã nanuë ga duüxügü ga Techarónicawa

¹ Rü ããnegü ga Aüfípori rü Aporóniãwa nachopetü ga Pauru rü Chira, rü ããne ga Techarónicawa nangugü. Rü yéma nayexma ga wüxi ga ngutaquëxepataü ga Yudíugüarü.

² Rü guma ngutaquëxepataüwa naxüüxü ga Pauru, yerü woetama yema nixí ga nacüma. Rü tomaëxpüx ga ngüxchigaarü ngunexügu rü Tupanaärü ore ga ümatüxüchiga yema Yudíugümaã yéma nidexa.

³ Rū meãma naxcèx nanangoxêẽ ga yema ore, rü namaã nüxũ nixu ga tacücèx na nayuxũ ga Cristu rü tüxcüũ wena na namaxũxũ. Rū ñanagürü: —Rü yima Cristu rü Ngechuchu nixĩ, rü nachiga nixĩ i pemaã nüxũ chixuxũ —ñanagürü ga Pauru.

⁴ Rū ñuxre ga yéma yexmagüxũ ga Yudíugü rü nayaxögü, rü Pauru rü Chiratanügu naxägü. Rü yexgumarüũ ta Ngechuchuaxũ nayaxögü ga muxüma ga Griégugü ga noxri Yudíugürüũ yaxögüxũ. Rü muxüma ga ngexügü ga dīeruãxgüxũ rü ta nayaxögü.

⁵ Rü yemacèx ga yema Yudíugü ga tama yaxögüxũ, rü nanuê rü nixãũxächigü yerü muxüma ga duũxügü nüxũ nayaxögü ga Pauru rü Chiraarü ore. Rü norü numaã nanaxĩtaquêxexêẽ ga ñuxre ga yatügü ga chixexügü ga taxuwama mexũ. Rü yemaxũ namugü na nanuêxêẽãxũ ga yema ãnecũãx ga duũxügü. Rü Yachãũpatawa nabuxmü ga yema chixexũ ga duũxügü na Pauru rü Chiracèx nadaugüxücèx, yerü yema muxüma ga duũxügüpêxewa nanagagüchaũ.

⁶ Natürü yexguma tama yexma nüxũ yangaugügu, rü Yachãũxũ niyauxgü, rü ñuxre ga yaxögüxũxũ rü ta ínayauxũ. Rü nayagauxütanü, rü guma ãneärü ãêxgacügüpêxewa nanagagü. Rü tagaãcü ñanagürügü: —Ngêma Pauru rü Chira i guxũ i naãnewa duũxügüxũ chixexêẽgüxũ, rü nūma rü ta nangugü.

⁷ —Rü Yachãũ nixĩ ga nayaxuxũ ga napatawa. Rü guxüma i nūmagü i ngêma yatügü rü tama naga naxĩnũêchaũ i tórü ãêxgacü ya Dumacũãxärü mugü, erü nüxũ nixugüe rü nangêxma i to i ãêxgacü i Ngechuchu —ñanagürügü ga yema chix-

exü ga duüxügü.

⁸ Rü yexguma nüxü naxĩnüëgu ga yema oregü, rü poraäcü nanuë ga yema muxüma ga duüxügü rü yema ãñeärü äëxgacügü ta.

⁹ Natürü ga Yachãü rü namücügü rü dñerumaã nügü naxütanügü, rü yemacèx nayangëxgü.

Pauru rü Chira rü Beréawa nayexmagü

¹⁰ Rü yematama ga chütaxügu rü yema yaxögüxü ga Techarónicacüãx rü ãñe ga Beréawa nanamugü ga Pauru rü Chira. Rü yexguma yéma nangugügu, rü Yudíugüarü ngutaquëxepataüwa naxĩ.

¹¹ Rü yema Yudíugü ga Beréacüãx, rü yema togü ga Yudíugü ga Techarónicawa yexmagüxüärü yexera narümemaëgü. Rü norü ngüchaümaã meãma nanayauxgü ga yema ore. Rü guxü ga ngunexügu rü Tupanaärü ore ga ümatüxüwa nangúe na meã nüxü nacüëxgüxüçèx ngoxi aixcüma yüxü ga yema ore ga Pauru rü Chira namaã nüxü ixuxü.

¹² Rü muxüma ga yema Beréacüãx ga Yudíugü rü Ngechuchuaxü nayaxögü. Rü yexgumarüü ta ga muxüma ga Griégugü ga Yatüxügü rü ngexügü ga äëxgacügü namèx ixígüxü, rü nayaxögü.

¹³ Natürü yexguma yema Yudíugü ga Techarónicacüãx nüxü cuáchigagügu ga na Beréawa rü ta nüxü na yaxuxü ga Tupanaärü ore ga Pauru, rü yéma naxĩ, rü nananuëxëë ga yema ãñecüãx ga duüxügü na Paurumaã chixri nachopetüxüçèx.

¹⁴ Natürü yexguma yemaxü nacuéchigagügu ga yema yaxögüxü, rü paxama Pauruxü ínaxüxüxëëgü ga guma ãñewa. Rü ñuxre ga yema yaxögüxü rü Pauruxü ínixümücügü. Rü

dauxchitagu naxĩ rü ñuxmata taxtüpechinüwa nangugü. Natürü ga Chira rü Timutéu rü Beréagu narüchooma.

¹⁵ Rü yema duüxügü ga Pauruxü íxümücügüxü, rü wapurugu ínayaxümücügü ñuxmata íãne ga Atenawa nangugü, rü ñuxüchi Beréacèx nawoegu. Rü Pauru rü yema duüxügüxü yéma namuga na paxa naxütawa naxĩxücèx ga Chira rü Timutéu.

Atenawa nayexma ga Pauru

¹⁶ Rü yexguma Pauru rü Atenawa Chira rü Timutéuxü nanguxêêgu, rü tama nataãcüraxü yerü nüxü nadau ga guma íãnewa ga na poraãcü naxchicünèxãmaãmare na natupanaãxgüxü.

¹⁷ Rü yemacèx ga Pauru rü Yudíugüarü ngutaquèxepataüwa Cristuchigaxü nixu namaã ga yema Yudíugü rü yema togü ga tama Yudíugü íxügüxü ga Tupanaxü icuèxüügüxü. Rü guxü ga ngunexügu ga íãneârü plaza ga taxüwa rü ta Cristuchigaxü nixu namaã ga yema duüxügü ga yéma ãmücüwa íxü..

¹⁸ Rü nayexmagü ta ga ñuxre ga yatügü ga Epicúriugüarü nguxêêtaewa ngüexü, rü togü ga Etóicugüarü nguxêêtaewa ngüexü. Rü nümagü rü inanaxügüe ga Paurumaã na yaporagatanücüxü. Rü ñuxre ga nümagü rü ñanagürügü: —¿Rü tacü nixĩ i nüxü yaxuxü i ñãã yatü i idexaechamarexü? —ñanagürügü. Rü togü nanangãxügü, rü ñanagürügü: —Maneca wüxi i to i nachiuãnecüãxârü tupanagüarü orearü uruü nixĩ —ñanagürügü. Rü yemaãcü nidexagü ga yema duüxügü, yerü Pauru rü nüxü nixu ga ore ga

mexŭ ga Ngechuchuchiga ga nuxãcŭ wena na namaxŭxŭ.

¹⁹ Rŭ dŭxwa norŭ ãĕxgacŭgŭarŭ ngutaquĕxechica ga Areópagu ãĕgaxŭwa nanagŭ. Rŭ yema nŭxna nacagŭ, rŭ ñanagŭrŭgŭ nŭxŭ: —Toma nŭxŭ tacuáxchaŭ na tacŭ rŭ nguxĕĕtae i ngexwacaxŭxŭ yŭxŭ i ngĕma namaã cunguxĕĕtaexŭ.

²⁰ Erŭ toxcĕx rŭ wŭxi i taguma nŭxŭ taxŭnĕxŭ nixŭ i ngĕma ore, rŭ nŭxŭ tacuáxchaŭ na tacŭchiga yŭxŭ i ngĕma nŭxŭ quixuxŭ —ñanagŭrŭgŭ.

²¹ Rŭ yemaãcŭ nidexagŭ, yerŭ guxŭma ga Atenacŭãxgŭ rŭ yema to ga nachiuãnecŭãxgŭ ga yexma ãchiŭgŭxŭ, rŭ woetama yexicagu narŭxŭnŭe ga na nŭxŭ yaxuxĕcĕx rŭ nŭxŭ naxŭnŭĕxĕcĕx ga yexwacaxŭxŭ ga oregŭ.

²² Rŭ yemacĕx ga Pauru rŭ inachi norŭ ngãxŭtanŭwa ga yema duŭxŭgŭ ga yema Areópaguwa ngutaquĕxegŭxŭ, rŭ ñanagŭrŭ: — Pa Atenacŭãxgŭx, nŭxŭ chadau na poraãcŭ perŭ tupanagŭgu perŭxŭnŭĕxŭ.

²³ —Erŭ ngĕxguma perŭ ngutaquĕxechicagŭwa chixŭpetŭchigŭgu, rŭ nŭxŭ chadau i naxchicŭnĕxãgŭ i nŭxŭ picuĕxŭŭgŭxŭ. Rŭ wŭxi i nachicawa namaã chayarŭxŭ i wŭxi i yumŭxĕchica, rŭ ngĕxma naxŭmatŭ i naĕga i ñaxŭ: “Tupana ya tama nŭxŭ icuácŭ”, ñaxŭ. Rŭ yima Tupana ya tama nŭxŭ pecuáãcŭma nŭxŭ picuĕxŭŭgŭcŭ nixŭ ya choma pemaã nŭxŭ chixuchigacŭ.

²⁴ —Rŭ guma Tupana ga naxŭcŭ ga guxŭma ga naãnegŭ rŭ guxŭma i nawa ngĕxmaxŭ, rŭ nŭma nixŭ i norŭ yora yŭxŭ i daxŭgŭxŭ i naãne rŭ ñoma i

naãne. Rũ ngẽmacèx nũma rũ tama duũxũgũ üxũne ya tupaucagũgu naxãchiũ.

25 –Rũ nũmatama ya Tupana rũ taxucèxma nanaxwèxe i duũxũgũarũ ngũxẽẽ na namaxũxúcèx i nũmax, erũ taxuũma nũxũ nataxu. Rũ nũmatama guxãna nanaxã i maxũ, rũ tũxna nanaxã ya buanecũ ya namaã ingũãtanücüücü. Rũ nũmatama tũxna nanaxã i guxũma.

26 –Nũma rũ wũxi ga duũxũwatama nanaxũ ga guxũma ga duũxũgũ na guxũ i naãnewa nangẽxmagũxúcèx. Rũ nũma inaxuneta i ñuxgu tá na nabuxũ i duũxũgũ rũ ngexta tá naxãchiũxũ i wũxichigũ.

27-28 –Rũ yemaãcü nanaxũ na naxcèx nadaugũxúcèx ga duũxũgũ rũ ñoma ãnèxũwa tacüçèx idaugũxũrũ nũxũ iyangaugũxúcèx. Natürũ nũma ya Tupana rũ woetama guxũguma tũxna nangaicamachirẽx, erũ nagagu nixĩ i imaxẽxũ rũ ixĩãxtanücüüxũ rũ ingẽxmaxũ, ngẽxgumarũ i ñuxre i perũ poperaarũ ümatũxũgũ naxũmatũxũrũ, rũ ñanagürũgũ:

“Rũ Tupanaxãcü tixĩgũ”, ñanagürũgũ.

29 –Rũ ñuxma na Tupanaxãcũgũ ixĩgũxũ, rũ tama name i nagu tarũxĩnũẽ rũ Tupana rũ wũxi i naxchicünèxã i uirumũwa rũ ãxna dñerumũwa rũ ãxna nutawa ixũxũrũ nixĩ. Erũ guxũma i ngẽma naxchicünèxãgũ rũ nũmatama i duũxũgũ nagu naxĩnũèxũãcũma nanaxũgũ.

30 –Rũ nuxcũma ga duũxũgũ rũ naẽchitamare ínatiue, natürũ nũma ga Tupana rũ namaã yaxna naxĩnũ. Natürũ i ñuxma ya Tupana rũ nanamu i duũxũgũ i guxũwama na naxcèx nadaugũxũ rũ nũxũ naxoexũ i nacũma i chixexũgũ.

³¹ Yerü nüma ga Tupana rü marü nüxŭ naxuneta i wüxi i ngunexŭ i nagu tá aixcūma guxŭ i ñoma i nañecŭāx i duŭxŭgüna naçaxŭ i norü maxŭchiga. Rü marü nüxŭ naxuneta ya wüxi ya yatü ya Ngechuchu, rü yima tá nixŭ ya duŭxŭgüna çacü. Rü Tupana rü guxāxŭma nüxŭ nacuèxēē ga yema ga yexguma Ngechuchuxŭ wena namaxēēgu — ñanagürü ga Pauru.

³² Rü yexguma yema wena na namaxŭchigaxŭ naxŭnŭēgu ga duŭxŭgü, rü ñuxre ga nümagü rü Pauruxŭ nacugüe. Natürü ga togü rü ñanagürügü: —Rü wenagu táxarü cuxŭ itarŭxŭnŭē i ngēmachiga —ñanagürügü.

³³ Rü yexguma ga Pauru rü ínaxŭxŭ ga natanüwa.

³⁴ Natürü ñuxre ga duŭxŭgü rü Pauruwe narŭxŭ, rü Ngechuchuaxŭ nayaxōgü. Rü natanüwa nayexma ga Diuníchiu ga wüxi ga Areópagutanŭxŭ, rü wüxi ga ngeçü ga Dámari ga ngēga. Rü ñuxre ga togü rü ta nayaxōgü.

18

Corŭtiuwa nayexma ga Pauru

¹ Rü yemawena rü inaxŭāchi ga Pauru ga Ate-nawa, rü ñāne ga Corŭtiuwa naxŭ.

² Rü yéma namañ inayarŭxŭ ga wüxi ga yatü ga Aquiru ga Pōtuanecŭāx ga yexwacèx Dumawa ga Itáriaanewa ne ŭxŭ namèx ga Prisilamaāx. Rü yéma Corŭtiuwa nayexma yerü Dumacŭāxgüarü āēxgacü ga Cáudiu nanamu ga na ínachoxŭxŭcèx ga guxŭma ga Yudíugü ga Dumawa. Rü Pauru rü naxŭtagu nanaxŭāne.

³ Rū yexma nape rū naxchirunaxcèx ga dūxenüärü üwa nügümaã napuracüe yerü woetama yema nixĩ ga norü puracü ga Pauru rū Aquiru rū Prisila.

⁴ Rū guxū ga ngūxchigaarü ngunexūgu rū Yudíugüarü ngutaquëxepataüwa naxūxū ga Pauru, rū duūxūgümaã nidexaxū, rū nayaxucuxëgūxū. Rū yexgumarüü ta nayaxucuxëgūxū ga yema duūxūgü ga tama Yudíugü ixīgūxū.

⁵ Rū yixcamaxūra ínangugü ga Chira rū Timutéu ga Machedóniãwa ne íxū. Rū yexguma inanaxūgü ga Pauru ga aixcūma poraãcü nüxū na yaxuxū ga Tupanaärü ore. Rū meãma Yudíugūxū nangúexëë na Ngechuchu rū Tupana Nane ya Cristu na yíxū.

⁶ Natürü nūmagü ga yema Yudíugü rū inanaxūgüe ga Paurumaã na nanuëxū, rū namaã naguxchigagūxū. Rū yexguma inapamüchiru ga Pauru, yerü yema nixĩ ga wüxi ga cuëxruü naxcèx ga yema duūxūgü na yemawa nüxū yacuëxãchitanüxūcèx ga norü chixexū. Rū ñanagürü nüxū: –Pegagu tátama nixĩ i na ipeyarütauxexū, rū marü tama chaugagu tá nixĩ. Rū ñomaücüü i choma rū tá ngëma tama Yudíugü ixīgūxütanüwa chaxū –ñanagürü ga Pauru.

⁷ Rū ínaxūxū ga guma ngutaquëxepataüwa. Rū yéma nayexma ga wüxi ga yatü ga Tíchiu ga Yuchugu äegaxū. Rū nūma rū Tupanaxū nangechaü rū yexma ngutaquëxepataücwagu naxāpata. Rū yemaxütawa naxū ga Pauru, rū yexma nape.

⁸ Rū Cripu ga ngutaquëxepataüärü äëxgacü rū namèx rū guxūma ga naxãcügü rū Cori ya

Ngechuchuaxŭ nayaxōgŭ. Rŭ yexgumarŭ ta rŭ muxŭma ga Corŭtiucŭāxgŭ rŭ nayaxōgŭ ga yexguma nŭxŭ naxīnŭēgu ga yema ore, rŭ ņuxŭchi Pauru ínanabaiŭxēē.

⁹ Rŭ wŭxi ga chŭtaxŭ rŭ nangoxetŭ ga Pauru. Rŭ Cori ya Tupana namaā nidexa, rŭ ņanagŭrŭ: —;Rŭ tãxŭ i cumuŭxŭ! ;Rŭ nŭxŭ ixuama i chorŭ ore! ;Rŭ tãxŭ i curŭchianexŭ!

¹⁰ —Erŭ choma rŭ chacuxŭtagu, rŭ taxŭetãma chixexŭ cumaā taxŭ. Erŭ daa íānewa rŭ choxŭ nangēxma i muxŭma i chorŭ duŭxŭgŭ —ñanagŭrŭ ga Tupana.

¹¹ Rŭ wŭxi ga taunecŭarŭ ngãxŭ Corŭtiuwa nayexma ga Pauru. Rŭ yēma yema duŭxŭgŭtanŭwa namaā nangŭexēētae ga Tupanaārŭ ore.

¹² Natŭrŭ yexguma Acayaaneārŭ āēxgacŭ yixŭgu ga Gariōŭ, rŭ yema Yudŭgŭ rŭ wŭxigu Pauruxŭ niyauxgŭ, rŭ āēxgacŭpēxewa nanagagŭ.

¹³ Rŭ ņanagŭrŭgŭ nŭxŭ ga guma āēxgacŭ: — Ńã yatŭ rŭ duŭxŭgŭxŭ naxucuxē na Tupanaxŭ yacuēxŭgŭxŭcēx rŭ tama naga na naxīnŭēxŭcēx i tachiŭāneārŭ mugŭ —ñanagŭrŭgŭ.

¹⁴ Rŭ Pauru marŭ nachonagŭchaŭ, natŭrŭ nŭma ga āēxgacŭ ga Gariōŭ rŭ yema Yudŭgŭxŭ nangãxŭ, rŭ ņanagŭrŭ: —Rŭ ngēxguma chi wŭxi i taxŭ i chixexŭ naxŭxgu, rŭ ēxna namãētagu, rŭ ngēxguma chi nixŭ i choma i pexŭ ichaxīnŭxŭ, Pa Yudŭgŭx.

¹⁵ —Natŭrŭ ngēma pecŭmachiga rŭ perŭ mugŭchiga rŭ perŭ nguxēētaechiga na yŭxŭ, rŭ choma rŭ tama nŭxŭ chacuáxchaŭ i ngēma. ;Rŭ pematama penamexēēx! Rŭ choma rŭ tama

ngëmachigaarü äëxgacü chixĩxchaũ —ñanagürü.

¹⁶ Rũ yexguma ínanawoxũ ga yéma.

¹⁷ Rũ yexguma guxũma ga yema duũxũgũ rũ Yudíugüarũ ngutaquëxepataũarũ äëxgacü ga Chótenegu äëgaxũxũ yexma niyauxgũ. Rũ yexmatama äëxgacü ga Gariõũpëxegu nanaçuaixgũ. Natürü nüma ga Gariõũ rũ taxu ñanagürüama.

Pauru rũ Aũtioquíacèx nataegu, rũ ñuxũchi we-naxãrũ inaxũãchi na norũ tomaëxpüxcüna to ga nachiuãnegüwa nangeaxũ ga Tupanaãrũ ore

¹⁸ Rũ yemawena rũ muxũma ga ngunexũ yéma Corĩtiüwa nayexma ga Pauru. Rũ yixcama nüxũ narümoxë ga yema yaxõgũxũ rũ nüxna inaxũãchi. Rũ ñãne ga Chëcreawa naxũ namaã ga Prisila rũ Aquiru. Rũ Chëcreawa nügũ nidüpüxüeru ga Pauru yerü marü nayanguxëë ga wüxi ga uneta ga Tupanamaã nüxũ yaxuxũ. [Rũ woetama yema nixĩ ga nacümagü ga Yudíugü ga yexguma yanguxëëgüãxgu ga wüxi ga uneta ga Tupanamaã nüxũ yaxuxũ.] Rũ ñuxũchi Chëcreaarü türewa rũ wüxi ga wapurugu nichoũ na Chíríaanewa naxĩxüçèx.

¹⁹ Rũ yexguma Epéchiüwa nangugügu, rũ Pauru nüxna nixügachi ga Prisila rũ Aquiru, rũ Yudíugüarũ ngutaquëxepataũwa naxũ. Rũ yéma namaã nidexa ga yema Yudíugü ga guma ngutaquëxepataũwa ngutaquëxegũxũxũ.

²⁰ Rũ yema Yudíugü, rũ muxũma ga ngunexũgũ nüxũ nacëëxũgü ga yexma na naxãũxüçèx, natürü ga nüma rũ tama nanaxwëxe.

²¹ Rũ yemacèx nüxũ narümoxëãma, rũ ñanagürü nüxũ: —Rũ ngëxguma Tupana naxwëxegu, rũ wena

táxarü pexcèx chataegu –ñanagürü. Rü yemawena rü Epéchiuarü türewa nayarüxüe, rü inaxüãchi.

22 Rü Checharéaarü türewa nangu, rü yéma ínaxüe. Rü ñuxüchi Yerucharéüwa naxü na nüxü yanamoxëxücèx ga guxüma ga yema yaxögüxü. Rü ñuxüchi Aütioquíawa naxü.

23 Rü yexguma marü ñuxre ga ngunexü yéma Aütioquíawa nayexmagu, rü wenaxârü inaxüãchi ga Pauru na wüxichigü ga ñãne ga Gárataanewa rü Fríyiaanewa yexmagünewa íyadauxücèx rü yataãxëëgüãxücèx ga guxüma ga yema yaxögüxü ga guma ñãnegüwa yexmagüxü.

Aporu rü Epéchiuwa nüxü nixu ga Tupanaârü ore

24 Rü yexgumaücüü rü Epéchiuwa nangu ga wüxi ga Yudíu ga Aporugu ãegaxü. Rü nüma rü ñãne ga Aleyãdríacüãx nixí, rü nüxü natauxcha ga duüxügüpëxewa na yadexaxü. Rü meãma nüxü nacuèx ga Tupanaârü ore i ümatüxü.

25 Rü nüma meã nüxü nacuèx ga Cuáü ga baiüxëëruñârü nguxëëtae ga Cori ga Ngechuchuchiga, rü nüxü nacuèx na ñuxãcü Cuáü duüxügüxü íbaiüxëëxü. Natürü yexicaxütama nacuèx ga Ngechuchuchiga. Natürü poraãcü nataãëãcüma nidexa rü aixcüma nanangüexëë ga duüxügü.

26 Rü nüma ga Aporu rü tama namuñãcüma inanaxügü ga na yadexaxü ga Yudíugüarü ngutaquëxepataüwa. Natürü yexguma Aporuxü naxíñüëgu ga Prisila rü Aquiru, rü napatawa nanagagü na yexeraãcü namaã inanguxüxëëãxücèx ga Ngechuchuchiga.

27 Rū yexguma Acayaanewa naxūxchaūgu ga Aporu, rū yema yaxōgūxū ga Epéchiucūāx nūxū narūngūxēēgū. Rū popera yéma namugū naxcèx ga yema yaxōgūxū ga Acayacūāx na meā Aporuxū nayauxgūxūcèx. Rū yexguma Acayawa nanguxgu ga Aporu rū poraācū nūxū narūngūxēē ga yema duūxūgū ga Tupanaārū ngechaūgagu Ngechuchuaxū yaxōgūxū.

28 Rū guxū ga duūxūgūpēxewa nūxū nūxū nacuèxēē ga poraācū na ínatūexū ga yema Yudíugū ga tama Ngechuchuxū cuáxchaūgūxū. Rū nūmagū ga Yudíugū rū taxucürüwama ñuxū ñanagürügū, yerü ga Aporu rū Tupanaārū ore ga ümatūxūwa meāma nūxū nanawèx ga na Ngechuchu rū aixcūma Tupana Nane ya Cristu na yīxū.

19

Epéchiuwa nayexma ga Pauru

1 Rū yexguma Corítiuwa nayexmayane ga Aporu, rū Pauru rū naxpūxanegu idaxū ga namawa nixūpetū, rū Epéchiuwa nangu. Rū yexma nūxū nayangau ga ñuxre ga yaxōgūxū.

2 Rū nūxna naca, rū ñanagürü nūxū: — ¿Marū penayaxuxū i Tupanaāē i Üünexū ga yexguma peyaxōgūgu? —ñanagürü. Rū nūmagū nanangāxū, rū ñanagürügū: —Tama. Taguma nūxū taxīnūēchiga na tacū yīxū i Tupanaāē i Üünexū —ñanagürügū.

3 Rū yexguma ga Pauru rū nūxna naca rū ñanagürü nūxū: —¿Texéaxū peyaxōgūxū ga yexguma ípebaiūgu? —ñanagürü. Rū nūmagū nanangāxū, rū ñanagürügū: —Toma nūxū tayaxō

ga yema Cuáũ ga baiũxẽẽruũãrũ nguxẽẽtae – ñanagürügü.

⁴ Rũ yexguma ga Pauru rũ ñanagürü nüxũ: – Cuáũ ínanabaiũxẽẽ ga yema duũxügü ga nüxũ rüxoexũ ga nacüma ga chixexũ rũ Tupanacèx daugüxũ. Natürü yema duũxügümaã nüxũ nixu ta na nüxũ yaxõgüãxücèx ga Ngechuchu ga naweama ãcü – ñanagürü ga Pauru.

⁵ Rũ yexguma yemaxũ naxĩnũegu ga yema duũxügü rũ ínabaiũ naegagu ga Cori ya Ngechuchu.

⁶ Rũ yexguma Pauru rũ yema yaxõgüxũetügu naxüméxgu, rũ nüxna nangu ga Tupanaãe i Üünexũ, rũ to ga nagawachigü nidexagü, rũ nüxũ nixugüe ga Tupanaãrũ ore.

⁷ Rũ maneca 12 ga yatü nixĩgü ga yema duũxügü.

⁸ Rũ tomaẽxpüx ga tauemacü yéma nayexma ga Pauru. Rũ Yudíugüarũ ngutaquẽxepataũwa naxũxũ rũ tama namuũãcüma nüxũ nixuuxũ ga Tupanaãrũ ore. Rũ nanangúexẽẽ na ñuxãcü ãẽxgacü na yĩxũ ya Tupana, rũ nüxũ nanangúchaũxẽẽ na Ngechuchuaxũ yaxõgüãxücèx.

⁹ Natürü nayexma ga ñuxre ga duũxügü ga tama nüxũ cuèxgüchaũxũ rũ tama yaxõgüchaũxũ. Rũ nümagü inanaxügüe ga na yema muxüma ga duũxügüpèxewa chixexũ yaxugüexũ nachigagu ga Cori ga Ngechuchu. Rũ yemacèx nüxna nixügachi ga Pauru, rũ toxnamana nanagagü ga yema yaxõgüxũ. Rũ guxũ ga ngunexügu namaã nüxũ nixuchiga ga ore nawa ga wüxi ga ngutaquẽxepataũ ga Tiranuãrũ ngúepataũ ga

naega.

¹⁰ Rû yemaãcü nanaxü ga taxre ga taunecü, rû yemaãcü guxüma ga Áchiacüãxgü ga Yudíugü rû Griégugü rû nüxü naxĩnüë ga Cori ya Tupanaãrû ore.

¹¹ Rû Tupana Pauruxü narüngüxëë ga na naxüãxü ga taxügu ga mexügu ga Tupanaãrû poramaã naxüxü.

¹² Rû èjxrüxü ga norü dechugü ga Pauru rû naxchirugü rû duüxügu rû yema idaaweexüxütawa nanangegü. Rû yexguma yema idaaweexü nüxü ingögügu ga yema naxchiru rû êxna dechu, rû naxcèx nitaanegü. Rû yema duüxügu ga ngoxoãxgüxü rû ta naxcèx nitaanegü.

¹³ Natürü nayexma ga ñuxre ga Yudíugü ga ñanegüwachigü ixĩetanüxü rû ngoxogüarü woxüwa puracüexü. Rû nüxü naxügu na Cori ya Ngechuchuégagu na ínawoxüãxü ga ngoxogü nawa ga yema duüxügu ga ngoxoãxgüxü. Rû ñanagürügü: —Ngechuchu ya Pauru nüxü ixuchigacüégagu pexü tamu na ípechoxüxücèx —ñanagürügü ga yema Yudíugü.

¹⁴ Rû yema 7 ga yema ügüxü, rû wüxi ga Yudíugüarü paigüarü ãëxgacü ga Echebaga äegaxü nanegü nixigü.

¹⁵ Natürü wüxi ga ngunexügu ga yexguma wüxi ga ngoxoxü ínatèxüchigüchaügu, rû yema ngoxo nanangãxü, rû ñanagürü: —Nüxü chacuèx ya Ngechuchu, rû nüxü chacuèx ya Pauru na texé yixü. ¿Natürü i pema rû texégü pixigü? —ñanagürü.

¹⁶ Rû yexguma ga yema yatü ga ngoxoãxü rû yema duüxügu ga ínatèxüchigüchaüxüna

nayuxu, rü nüxũ narüporamaẽ ga guxũma, rü ínanagáuũxũne. Rü yemaãcü ngexchiruxũma rü napíexũma nibuxmü ga guma ïwa.

¹⁷ Rü guxũma ga Yudíugü rü Griégugü ga Epéchiuwa yexmagüxũ rü nüxũ nacuáchiga ga yema. Rü poraãcü namuũẽ ga guxũma. Rü yemaãcü yexeraãcü natachiga ga Cori ga Ngechuchu ga yéma.

¹⁸ Rü muxũma ga yema yaxõgüxũ rü yéma ningugüetanü, rü guxũ ga duũxügüpëxewa nüxũ nixugüechigü ga nüma rü ta na nayuüechiréxũ, natürü tá nüxũ na naxoexũ ga yema.

¹⁹ Rü muxũma ga yema iyuüechiréxũ, rü yéma nanana ga norü poperagü ga yuüpane ga nawa nangúexũ, rü guxãpëxewa ínanagu. Rü yexguma nangugügüãgu ga natanü ga yema poperagü, rü maneca 50,000 tachinü ga díeru ga tatanüxũwa nangu.

²⁰ Rü yemaãcü ga Cori ya Tupanaãrü ore, rü yexeraãcü nixüchigü, rü yexeraãcü duũxügü nüxũ nadau na ñuxãcü naporaxũ ga yema ore.

²¹ Rü yemawena ga Pauru, rü nagu narüxĩnü ga Machedóniãñewa rü Acayaanewaxíra na naxũxũ, rü yéma ñuxüchi Yerucharéüwa na naxũxũ. Yerü yema ñanagürü: —Rü ngema Yerucharéüwa tá chaxũ, rü yixcama rü Dumawa rü tá ta chaxũ — ñanagürü.

²² Rü yemacèx nügüpëxegu Machedóniãñewa nanamugü ga taxre ga norü ngüxëëruũ ga Timutéu rü Eratu. Natürü nüma ga Pauru rü ñuxre ga ngunexũ Áchiagu narüxãũx.

Nanuẽ ga duũxügü ga Epéchiuwa

23 Rū yexgumaücüü rü Epéchiuwa rü nanaxixächitanüãë ga duüxügü, rü poraãcü nanuë nachigagu ga Cori ya Tupanaärü ore.

24 Rū yemaãcü naxüpetü nagagu ga wüxi ga yatü ga dïërumüwa puracüxü ga Demétriugu äëgaxü. Rū nüma rü ínanaxüxü ga norü tupana ga Atemíchaarü tupaucachicünëxägü ga dïërumünaxcëx. Rū nayexma ga muxüma ga norü puracütanüxü ga yemawa puracüexü. Rū guxüma poraãcü meã nüxü naxãtanü ga yema puracü.

25 Rū nüma ga Demétriü rü nanangutaquëxexëë ga guxüma ga puracütanüxü ga yemawa puracüexü, rü ñanagürü nüxü: —Pa Chomücügüx, meã nüxü pecuëxgü na ñaã tórü dïërumüärü puracügu na ngïxü iyaxuxü i tórü dïëru.

26 Rū marü nüxü pedaugü i ngëma Pauru rü nüxü pexïnüë na ñuxãcü yaxucuxëgüãxü i duüxügü, rü ñuxãcü namaã nüxü yaxuxü na tama aixcüma tupanagü yïxü i ngëma tupanagü i yixema ixügüxü. Rū ngëmaãcü muxüma i duüxügüxü nüxü narüxoexëë na tama tórü tupanagüaxü yaxögüãxücëx. Rū tama núma Epéchiuwaxicatama ngëxü nawagü natürü wixguxüchi taëx guxü i Áchiaanewa ngëmaãcü chixri nayaxucuxëgü i duüxügü.

27 Rū pema nüxü pecuëx rü tórü puracüçëx rü naxãücüma i ngëma. Rū wüxi i chixexü ta nixï i naxcëx i tórü tupana i Atemíchaarü tupauca ya taxüne. Rū ñuxma rü muxüma i duüxügü rü ngïxü nangechaü i Atemícha i guxü i Áchiaanewa rü guxü i naãnewa. Natürü ngëma Pauruarü ucuxëgagu rü düxwa taxuxütáma ngïxü nangechaü i duüxügü, rü

ngẽmaãcü düxwa inaãrüxo tá ta i tórü puracü — ñanagürü ga Demétriu.

28 Rû yexguma yemaxü naxĩnüëgu, rû poraãcü nanuê, rû tagaãcü ñanagürügü: —¡Namaxü i Epéchiucüãxgüarü tupana i Atemícha! — ñanagürügü.

29 Rû guxüma ga yema ñãnecüãxgü rû poraãcü yexma ínatüëãê. Rû ínanayauxü ga Gayu rû Arítarcu ga Machedóniããnecüãxgü ga Paurumücügü, rû guma í ga ñãneärü ngutaquëxepataüwa nana-gauxütanü.

30 Rû Pauru rû ta yexma naxücuchaü na yema duüxügümaã yadexaxüçèx, natürü yema yaxögüxü nüxna nanachuxu ga yexma na naxücuxü.

31 Rû yema Áchiaaneärü ãëxgacügütanüwa rû nayexma ga ñuxre ga Paurumücügü ixīgüxü. Rû nümagü rû ta Pauruxütawa namugagü na tama yema ngutaquëxechicagu naxücuxüçèx.

32 Rû yoxni ga duüxügü ga yema ínangutaquëxegüxüwa, rû nümaxü rû wüxi ga oremaã aita naxüe, rû togü ga to ga oremaã aita naxüe. Yerü poraãcü nanaxixãchiãëgü ga guxüma ga yema duüxügü ga yéma ngutaquëxegüxü. Rû muxüma rû tama nüxü nacüëxgü ga ñacüçèx na nangutaquëxegüxü.

33 Natürü yéma nayexma ga wüxi ga Yudíu ga Areyáüdrugu ãëgaxü. Rû yema togü ga Yudíugü rû namaã nüxü nixu ga ñacüçèx na nangutaquëxexü. Rû duüxügüpëxewa nanamugü na yadexaxüçèx rû naëtüwa nachogüxüçèx ga yema Yudíugü ga yéma yexmagüxü. Rû nüma ga Areyáüdrü rû nax-unagümëxë na iyanachianegüxüçèx ga duüxügü,

na namaã yadexaxüçèx.

³⁴ Natürü yexguma nüxü yacuèãchitanügu ga Aré rü Yudíu na yíixü, rü guxüma ga yema duüxügü rü wüxigu tagaãcü aita naxüe. Rü taxre ga ora ninge ga na tagaãcü ñagüxü: —¡Namaxü i Epéchiucüãxgüarü tupana i Atemícha! —ñagüxü.

³⁵ Rü düxwa yema ñãneärü ãëxgacü nanachiãchixëë ga yema muxüma ga duüxügü, rü ñanagürü nüxü: —Pa Epéchiucüãxgüx, guxüma i duüxügü nüxü nacuèx na Atemíchaarü tupauca ya taxüneärü dauruü na ixígüxü. Rü guxüma nüxü nacuèx na núma tüxü nangëxmaxü i Atemíchachicünèxã i daxüwa rüngüxü.

³⁶ —Rü ñüxma na guxüma nüxü na cuáxü na aixcüma yíixü i ngëma, rü name nixí na pechiãchixü, rü taxuüma i chixexü pexüexü.

³⁷ —Erü ñãã yatügü i nuã pegagüxü, rü taxuüma i chixexü ngímaã naxügü i tórü tupana, rü tama chixexü nixugüe ngíchigagu.

³⁸ —Rü ngëxguma chi Demétriu rü ngëma namücügü i namaã napuracüexü rü nüxü nangëxmagu i tacü i tama norü me ixíxü, rü nangëxma i ngutaquëxechicagü i ngextá ãëxgacügü duüxügüxü íicagüxüwa. Rü name nixí na ngëma ãëxgacügüpëxewa namexëëãxü i tacü i tama norü me ixíxü.

³⁹ —Rü ngëxguma nangëxmagu i tacü i to i perü guxchaxügü, rü name nixí i ñãneärü ãëxgacügüarü ngutaquëxewa penamexëë i ngëma.

⁴⁰ —Erü ñüxma rü taxãücümaxügügü rü ngürüãchi ãëxgacü ya tacü ya Dumawa ngëxmacü rü tüxna tá naxcèx naca i ngëma ñüxma ngupetüxü.

Erü aixcüma taxumaãma tanangãxüega i ãëxgacü, ega tüxna nacaxgu naxcèx i ñaã ngutaquëxe i nawa pexãügatanüxü —ñanagürü.

⁴¹ Rû yexguma marü yema ñaxguwena, rû ínayamugü ga yema duüxügü.

20

Machedóniãñewa rû Griégugüchiüñewa naxü ga Pauru

¹ Rû yexguma marü nangupetügu ga yema na íyacuxcuxü ga duüxügü, rû Pauru naxcèx nangema ga yema yaxögüxü na yaxucuxëgüãxüçèx. Rû yexguma marü namaã nüxü nachaugu, rû nüxü narümoxë, rû inaxüãchi ga Machedóniãñewa na naxüxü.

² Rû yexguma yema nañewa yaxüpetügu, rû taãëxü ga oremaã nayaxucuxëgü ga yema yaxögüxü ga wüxichigü ga ññewa yexmagüxü. Rû yemaãcü Griégugüchiüñewa nangu.

³ Rû yéma nayexma ga tomaëxpüx ga tauemacü. Rû yexguma marü inaxüãchichaügu ga Chíríiaanewa na naxüxü, rû tama wapurugu nixü yerü nüxü nacuáchiga ga na ñuxre ga Yudiügü yamëxgüchaüxü. Rû yemacèx nagu narüxñü ga dauxchitagu na nataeguxü, rû wenaxärü Machedóniãñewa na naxüpetüxü.

⁴ Rû ínayaxümücügü ga Chópate ga Beréacüãx ga Píru nane, rû Aritárcu rû Següdu ga Techarónicacüãxgü, rû Gayu ga Derbecüãx, rû Timutéu, rû Tíquicu, rû Turuquínu ga Áchiaanecüãxgü.

⁵ Rû yema yatügü rû nüxñra topëxegu naxägü, rû Tróawa toxü nayarünguxëëgü.

6 Rû nawena ga yema Yudiügüarü peta ga üpetüchiga ga pãu ga ngearü puxêẽruũãxü nagu nangõxgüxü, rû wapurugu Piripuwa itaxiãchi. Rû wüximêẽxpüx ga ngunexü ngupetügu, rû Tróagu nüxü tayangaugü ga yema topêxegu ägüxü. Rû yexma tarücho ga 7 ga ngunexü.

Tróagu nanaxüãne ga Pauru

7 Rû yema yüxüarü ngunexügu rû tangutaquêxegü namaã ga yema yaxõgüxü na tanangõxücèx ga pãu ga bücuxü yema Ngechuchu toxü ngüexêẽxürü. Rû yema yaxõgüxümaã nidexa ga Pauru. Rû nanamèxêẽ ga norü dexa ñüxmata ngãxücüwa nangu, yerü moxüãcü inaxüãchichaü.

8-9 Rû daxüwa ga guma ñpataarü tomaẽxpüxchiüwa yexmaxü ga ucapuwa tangutaquêxegü. Rû namu ga omü ga yéma naïgüxü. Rû nayexma ga wüxi ga ngextüxücü ga Eutícugu ägacü. Rû yéma wüxi ga yema ucaputapüxarü ñãxwa narüto. Natürü ga Pauruarü dexa, rû poraãcü namèx. Rû yemacèx ga guma ngextüxücü rû poraãcü nayaxta, rû düxwa nipeãchi rû yema ñãxwa narüngu, rû ñaxtüanegu nangu. Rû yéma yucüma nanayauxgü.

10 Rû ñnarüxï ga Pauru, rû nayanawüxüchi ga guma ngextüxücü, rû duüxügüxü ñnanagürü: — ¡Tãxü i pebaixãchiexü, erü namaxü nixï! — ñnanagürü.

11 Rû yexguma wenaxãrü daxü naxï, rû inan-abücu ga yema pãu, rû nanangõx. Rû wenaxãrü nidexa ñüxmata yangune, rû yexguma inaxüãchi.

12 Rū guma ngextūxücü rü maxücü napatawa nanagagü. Rū yemacèx poraãcü nataãëgü ga guxūma ga nūmagü.

Tróawa inaxūãchi ga Pauru rü Miretuwa naxū

13 Rū yexguma ga Pauru rü ñanagürü: — Dauxchitagu tá chixū ñuxmatáta ããne ya Achuwa changu na ngema pexū chixüexücèx —ñanagürü. Rū yemacèx ga toma rü wapurugu tichoŭ rü yoxni napëxegu taxĩ ñuxmata Achuwa tangugü.

14 Rū yexguma Achugu Paurumaã togü tayan-gauxgu, rü yéma toxū nixüe. Rū tachopetü ga yéma ñuxmata Miterénewa tangugü.

15 Rū yéma itaxĩãchi rü moxūãcü Quíuarü toxmèxtawa tachopetü. Rū yemaärü moxūãcü Chamowa tangugü. Rū yemaärü moxūãcüama Miretuwa tangugü.

16 Rū yemaãcü ítixĩ yerü ga Pauru rü tama Áchiaanegu nanuxcüchaŭ. Yerü nanaxwèxe ga paxa Yerucharéŭwa na nanguxū naxcèx ga Pëtecóstearü ngunexū. Rū yemacèx nagu narüxñü na tama Epéchiugu íyadauxū.

Yaxôgüxūãrü ãëxgacügü ga Epéchiucŭãxmaã nidexa ga Pauru

17 Natürü yexguma Miretuwa tangugügu rü Epéchiuwa naxcèx namuga ga Pauru na naxütawa naxixücèx ga yema yaxôgüxūãrü ãëxgacügü ga Epéchiucŭãx.

18 Rū yexguma Pauruxütawa nangugügu, rü ñanagürü nuxū: —Pema meã nuxū pecuèxgü ga ñuxãcü pepëxewa na chamaxūxū ga guxūgu ga yexguma noxritama nuã Áchiaanewa chaxūxgu.

19 Rū guxüguma ga yexguma petanüwa chayex-magu, rü meãma chanaxü ga Cori ya Tupanaãrū puracü, taguma chaugü chicuèxüüãcūma. Rū woo muëxpüxcūna poraãcū changechaügu, nagagu ga yema chixexü ga chomaã naxügüchaüxü ga Yudíugü, natürü naetüwa chanaxüama ga yema puracü.

20 Rū taguma íchayachaxãchi ga pemaã nüxü na chixuxü ga guxüma ga yema ore ga perü mexüçèx ixixü. Rū guxü ga duüxügüpëxewa, rü pepatagüwa rü ta pexü changúexëë ga yema ore.

21 Rū Yudíugümaã rü yema tama Yudíugü ixígüxümaã nüxü chixu na namexü ga na nüxü naxoexüçèx ga norü chixexügü rü Tupanaga naxĩnüëxüçèx, rü nüxü na yaxögüãxüçèx ga tórü Cori ya Ngechuchu.

22 Rū ñuxma rü Yerucharéüwa chaxü erü Tupanaãe i Üünexü rü ngema choxü namu. Natürü tama nüxü chacuèx na tacü tá choxü üpetüxü i ngema.

23 Rū ngema nüxü chacuáxü nixĩ i duüxügü tá choxü napoxcu rü guxchaxügü tá choxü naxüpetü i Yerucharéüwa. Rū ngëxĩcatama nixĩ i chomaã nüxü yaxuxü i Tupanaãe i Üünexü i guxüne ya ñane i ngextá íchixügüxüwa.

24 Natürü tama ngema äücümaxügu charüxĩnü erü nüetama nixĩ ega woo chayuxgu. Natürü ngema chanaxwëxexü nixĩ na taãëãcūma chapuracüamaxü na meã chayanguxëëxüçèx i ngema puracü ga tórü Cori ya Ngechuchu choxna äxü rü nüxü chixuxüçèx i norü ore i mexü na ñuxãcü Tupana tüxü ngechaüxü.

25 Rū ñuxma rü marü nüxü chacuèx rü tagutáma

wena choxũ pedaugü i pema ga marü pemaã nüxũ chixuxe na ñuxãcü ãëxgacü na yĩixũ ya Tupana.

26 Rũ ngẽmacèx i ñoma i ngunexũgu rü pemaã nüxũ chixu rü marü tama chaugagu nixĩ ega texé petanüwa iyarütauxgu.

27 Erü marü meãma pemaã nüxũ chixu i guxũma i ngẽma Tupana pexũ naxwèxexũ, rü taxuũma ichicux.

28 Rũ ngẽmacèx i ñuxma rü penaxwèxe na pexuãëgüxũ rü meã nüxna pedaugüxũ i guxũma i yaxõgüxũ i petanüwa ngëxmagüxũ. Erü ngẽma nixĩ i Tupanaãxẽ i Üünexũ nagu pexũ mugüxũ na nüxna pedaugüxüçèx i ngẽma Tupanaãrü duũxügü i yaxõgüxũ i Ngechuchu nagümaãtama naxcèx taxexũ.

29 Choma nüxũ chacuèx rü ngëxguma íchixüxgu, rü chowena tá pexcèx nuã naxĩ i togü i duũxügü. Rũ tá nanachixexëëchaũ i ngẽma yaxõgüxũ ñoma airugü i idüraexũ i carnerugüxũ ngĩächixëëxürüũ.

30 Rũ woo petanüwatátama nangëxmagü i nümaxũ i tá doramaremaã nangúexëëxũ i ngẽma yaxõgüxũ na nügüwe naxĩxëëãxüçèx.

31 ¡Pegüna pedaugü, rü nüxna pecuèxãchie na ñuxãcü tomaëxpüx ga taunecügu rü ngunecü rü chütacü rü taguma íchayachaxãchixũ ga pexcèx chaxauxãcüma na pexũ chixucuxëgüxũ ga wüxichigü!

32 Rũ ñuxmax, Pa Chaueneëgüx, rü Tupanana pexũ chamugü. Rũ chanaxwèxe i naga pexĩnüë i norü ore i tüxũ nüxũ cuèxëëxũ na ñuxãcü poraãcü tüxũ nangechaũxũ. Erü ngẽma norü ore tá pexũ naporaexëë na tórü Coricèx pemaxëxüçèx rü pexũ nangëxmaxüçèx i pechica namaã i guxũma i

duŭxügü i Tupana dexü.

³³ Choma rü taxuguma chaugücèx chanaxwèxe ga texéarü dîêru rü texéchiru.

³⁴ Rü pematama rü meã nüxü pecuèx ga ñuxãcü daa choxmëxmaã na chapuracüxü naxcèx ga yema choxü rü chomücügüaxü taxuxü.

³⁵ Rü guxüguma meã pexü changúexëë na ngëmaãcü pepuracüexü na nüxü perüngüxëëxüçèx i ngëma duŭxügü i nüxü nataxuxü. Rü name nixĩ na nüxna pecuèxãchiexü i Cori ya Ngechucharü ore ga nümatama ñaxü:

“Rü narümemaë nixĩ i pema na toguena penaxãxü rü tama i tüma pexna tanaxãxü”, ñaxü.

³⁶ Rü yexguma yema ñaxguwena ga Pauru, rü inacaxãpüxü namaã ga guxüma, rü nayumüxë.

³⁷ Rü guxüma poraãcü naxauxe, rü Pauruna nanèixãchigü, rü nüxü nachúxgü.

³⁸ Yerü poraãcü nangechaüë naxcèx ga yema ore ga namaã nüxü yaxuxü ga:

“Marü tagutáma wena choxü pedaugü” ñaxü. Rü nümagü ínayaxümücügü ñuxmata wapuruwa nangu.

21

Yerucharéüwa naxü ga Pauru

¹ Rü yexguma nüxna itaxĩãchi ga yema yaxõgüxü, rü wapurugu tichoü. Rü capaxü ga Coscèx noxtacüma tixaü. Rü moxüãcü rü Rodawa taxĩ. Rü yéma itaxĩãchi, rü Pátarawa tangugü.

² Rü yexma nüxü tayangau ga wüxi ga wapuru ga Peníchiawa üxüne. Rü nagu tichoü, rü itaxĩãchi.

³ Rü yixcamaxüra nüxü tadaugü ga Chipre. Rü torü toxwecüwawaama naxü, rü nüxü tachopetü.

Rü itañaxwetaxũ ñuxmata Chíríaanewa tangugü. Rü Tíruwa ítachoũ, yerü yéma nixĩ ga Ínanuũãcuxũ ga guma wapuru.

⁴ Rü yexma nüxũ tayangau ga yémacũãx ga yaxõgũxũ, rü 7 ga ngunexũ yéma natanüwa tayexmagü. Rü Tupanaãe i Üünexũ nayadexagüxëe ga yema yaxõgũxũ, rü Pauruxũ ñanagürügü: —¡Tãxũ i Yerucharéüwa cuxũxũ! —ñanagürügü.

⁵ Natürü yexguma nangupetügu ga yema 7 ga ngunexügü, rü itaxĩãchi. Rü yema yaxõgũxũ rü towe narüxĩ. Rü naxmèxmaãchigü rü naxãcügümaãchigü toxũ Ínixümücügü ga guxüma ñuxmata guma ñañechipenüwa tangugü. Rü yexma naxnücügu tacaxgüãpüxü, rü tayumüxëgü.

⁶ Rü yexguma ga toma rü nüxũ tarümoxëgü, rü tichoũ ga wapuruwa. Rü nümagü rü napatacèx nawoegu.

⁷ Rü toma rü Tíruwa itaxĩãchi rü Turemáídawa tangugü. Rü yéma ítachoũ, yerü yexma nayacuèx ga wapurugu na taxĩxũ. Rü nüxũ tarümoxëgü ga yema yaxõgũxũ ga yéma yexmagüxũ, rü wüxi ga ngunexũ natanügu tarücho.

⁸ Rü moxũãcü itaxĩãchi ga yéma, rü Checharéawa tangugü. Rü Piripi ga Tupanaãrü orearü uruũpatawa taxĩ. Rü nüma rü yema 7 ga ngüxëeruügü ga tupaucana daugüxũtanüxũ nixĩ. Rü yexma naxütagu tapegü.

⁹ Rü nüma nüxũ iyexma ga ãgümücü ga naxãcügü ga taguma ixãtecü ga Tupanaãrü orexũ ixugüecü.

¹⁰ Rü yexguma marü ñuxre ga ngunexũ yéma tayexmagügu, rü Yudéaanewa ne naxü ga wüxi ga Tupanaãrü orearü uruũ ga Agabugu ãegaxũ.

¹¹ Rū yexguma toxūtawa nanguxgu ga Agabu, rū nanayaxu ga Pauruarū goyexū. Rū namaã nügü ninèixgücutü, rū nügü nináimëx, rū ñanagürü: –Tupanaãe i Ünexū marü chomaã nidexa rū ñanagürü:

“Rū ñaãcü tá nayanèixgü i Yudíugü i Yerucharéüwa i ñaã goyexūârü yora. Rū ngëma duüxügü i tama Yudíugü ixīgüxūna tá nanamugü”, ñanagürü.

¹² Rū yexguma yema orexū taxīnūëgu, rū toma rū yema Checharéacūãxgümaã Pauruxū tacèexügü ga tama Yerucharéüwa na naxūxücëx.

¹³ Natürü nūma ga Pauru rū toxū nangāxū rū ñanagürü: –¿Tūxcüū pexauxe rū choxū pengechaūxëë? Choma rū íchamemare na chináixū. Rū ngëxgumarūū ta rū marü íchame na Yerucharéügu chayuxū naxcëx ya Cori ya Ngechuchu –ñanagürü.

¹⁴ Rū yexguma marü taxuacüma tanachuxugu, rū tachianemare, rū ñatarügü: –¡Ëcü yangu i Cori ya Tupanaârü ngúchaū! –ñatarügügü.

¹⁵ Rū yemawena rū togü tamexëëgü, rū Yerucharéüwa taxī.

¹⁶ Rū towe narüxī ga ñuxre ga yaxōgüxū ga Checharéacūãxgü, rū Machōūpatawa toxū nagagü. Rū nūma nixī ga wüxi ga Chíperecūãx ga ũpamama woetama yaxōxū. Rū naxūtagu tapegüxū.

Chaütiáguxūtagu nanaxūãne ga Pauru

¹⁷ Rū yexguma Yerucharéüwa tangugügu, rū yema yaxōgüxū rū taãëacüma toxū nayauxgü.

¹⁸ Rū moxūãcü ga Pauru rū tomaã Chaütiáguxūtagu nanaxūãne. Rū yéma

nangutaquëxegü ga guxüma ga yaxögüxüärü äëxgacügü.

19 Rû nüxü narümoxë ga Pauru, rü ñuxüchi meäma namaã nüxü nixu ga guxüma ga yema Tupana üxü ga yexguma yema tama Yudíugü ixíngüxümaã nüxü yaxuxgu ga Tupanaärü ore.

20 Rû yexguma Pauruarü orexü naxĩnüëgu ga nümagü, rü Tupanaxü nicuëxüügü. Rû ñanagürügü Pauruxü: —Dücèx, Pa Toeneëx, cuma nüxü cucuëx rü nangëxma i muxüchixü i Yudíugü i yaxögüxü. Rû guxüma i nümagü rü nanaxwëxegü na nagu naxixü i ngëma mugü ga Moïché ümatüxü.

21 Natürü ga togü ga tama yaxögüxü rü marü namaã nüxü nixugügü na cuma rü cunangüexëëxü i guxüma i Yudíugü i togü i nachiüñanewa ngëxmagüxü, na tama naga naxĩnüëxüçèx i ngëma mugü ga Moïché ümatüxü. Rû marü namaã nüxü nixugügü na cunangüexëëxü na tama tüxü ínawiüchëxmüpëxechiraüxüçèx ya nanegü, rü na tama naga naxĩnüëxüçèx i tacümagü ga Moïché tüxü muxü.

22 ¿Tacü tá ixüexü i ñuxmax? Erü ngëma Yudíugü i yaxögüxü rü aixcüma tá nüxü nacuëxgü na marü nuã cunguxü.

23 ¡Rü ngëmacèx name nixĩ na cunaxüxü i ngëma tá cumaã nüxü tixuxü! Nuã totanüwa nangëxma i ägümücü i yatügü i yanguxëëchaüxü i wüxi i uneta i Tupanamaã nüxü yaxuxü.

24 ¡Ngëma tupauca ya taxünewa nagagü, rü wüxigu namaã yanguxëë i ngëma tacüma ga Moïché tüxna äxü, rü Tupanapëxewa pegü peyamexëëgü! ¡Rü nüxü naxütanü i ñuxregu nüxü

naxãtanü na yadüpüxüerugüxüçèx i ngẽma yatügü na ngẽmaãcü yanguxẽẽgüãxüçèx i norü unetagü! Rû ngẽmawa rû guxüma i ngẽma Yudíugü rû tá nüxü nacuèxgü na aixcüma cuma rû ta naga cuxĩnüxüxü i ngẽma mugü ga Moĩché úmatüxü rû tama aixcüma na yĩxü ga yema ore ga cuchiga ga nüxü yaxugüexü.

²⁵ Rû ñuxüchi ngẽma yaxõgüxü i tama Yudíugü ixĩgüxü, rû marü naxcèx tanaxümatü ga torü ore na tama nangõxgüãxüçèx i tacü i namachi i marü togü norü tupanenetachicünèxãgüxü namaã icuèxüügüxü, rû tama na nangõxgüãxüçèx ya nagü, rû tama nangõxgüãxüçèx i naèxügü rû èxna naxünagü i wèxnaãxü, rû tama naĩ i ngemaã rû èxna naĩ ya yatümaã inapexüçèx –ñanagürügü.

Tupaucu ga taxünegu Pauruxü niyauxgü

²⁶ Rû yexguma ga Pauru rû yéma tupaucu ga taxünewa nanagagü ga yema ägümücü ga yatügü. Rû moxüãcü rû Tupanapëxewa nügü namexëe ga Pauru wüxigu namaã ga yema yatügü. Rû ñuxüchi guma tupaucu ga taxünegu namaã naxücu na paimaã nüxü yaxuxüçèx na 7 ga ngunexügu tá yĩxü na yanguxẽẽgüãxü ga yema norü uneta ga Tupanamaã nüxü yaxugüxü, rû yemawena rû tá na inaxãmaregüãxü ga norü ämaregü ga Tupanaxü namaã yacuèxüügüxü ga wüxichigü.

²⁷ Rû yexguma marü nagúxchaügu ga yema 7 ga ngunexü, rû ñuxre ga Yudíugü ga Áchiaanecüãxügü rû Pauruxü nadaugü ga tupaucu ga taxünewa. Rû yema Yudíugü rû duüxügüxü nanuèxëe na Pauruxü yayauxgüxüçèx. Rû yemacèx Pauruna nayuxgü.

28 Rū tagaãcü aita naxüe ñaxũmaã: — Pa Tomücügü Pa Yudíugüx, ¡Paxa toxũ perüngüxëẽx! Ñaã nixĩ i ngẽma yatü i guxũwama yangúexëẽchigüxũ i duũxügü na taxchi naxaixüçèx i yixema i Yudíugü, rü naxchi na naxaixüçèx i ngẽma mugü ga Moĩché umatüxũ rü daa tupauca ya taxũne. Rü naetüwa i ñuxmax rü nuxa daa tupauca ya taxũnegu nanamucu i ñuxre i duũxügü i tama tacümagu íxũ, rü ngẽmaãcü nanaxüxaxëẽ i ñaã nachica i üünexũ —ñanagürügü.

29 Rü yema ñanagürügü yerü ũpaacü Yerucharéüwa Paurumaã nüxũ nadaugü ga Turuquínu ga wüxi ga Epéchiucũãx ga tama Yudíu ixĩxũ. Rü nüxũ nacuèxgügu rü Pauru marü yexma nanaxücuxëẽ ga tupauca ga taxũnegu.

30 Rü guxũma ga yema ãnecũãxgü rü poraãcü nanuẽ. Rü tupauca ga taxũnecèx nibuxmü, rü Pauruxũ niyauxgü, rü tupaucaarü ãxtüwa nanatúchigügü. Rü yexguma paxa nanawãxtagü ga guma tupauca ga taxũneãrũ ãxgü.

31 Rü yexguma Pauruxũ yamèxgüchaũgu ga duũxügü, rü Dumacũãx ga churaragüarü ãëxgacüxütawa nanguchiga ga ore na guxũwama ga Yerucharéüwa rü na nanuëxũ ga duũxügü.

32 Rü yexgumatama ga guma churaragüarü ãëxgacü rü nanangutaquëxexëẽ ga yema norü capitãügü namaã ga norü churaragü, rü paxa yema duũxügü íyexmagüxüwa naxĩ. Rü yexguma guma ãëxgacüxũ rü yema churaragüxũ nadaugügu ga duũxügü, rü ínayachaxãchigü ga na Pauruxũ yamèxgüxũ.

33 Rü yexguma ga guma ãëxgacü rü Paurucèx

nixũ rü nayayaxu. Rü nanamu na taxre ga cade-namaã na yanèixgüãxücèx. Rü nüxna naca na texé yĩxũ, rü tacü naxũxũ.

³⁴ Natürü yema muxüma ga duũxügü rü toxica ga oremaã aita naxüe ga wüxichigü. Rü yexguma taxuacüma meã nüxũ nacuèxgu ga tacücèx na nanuèxũ, rü guma ãëxgacü rü nanamu na chur-aragüpatawa Pauruxũ nagagüxũ.

³⁵⁻³⁶ Rü yexguma churaragüpataarü toxõnewa nanguxgu ga Pauru, rü churaragü nayangetaügü naxchaxwa ga yema muxüma ga duũxügü, yerü nanuèxũchi rü nawe nicaetanü rü ñanagürügü: — ¡Yamèxũchi! —ñanagürügü.

Pauru rü duũxügüpëxewa nügüétüwa nidexa

³⁷ Rü yexguma marü churaragüpatagu yamucuchigüchaũãgu rü Pauru rü Griégugawa guma ãëxgacüna naca rü ñanagürü: —¿Cuxũ namexũ na cumaã nüxũ chixuxũ i wüxi i ore? —ñanagürü. Rü nüma ga ãëxgacü nanangãxũ rü ñanagürü: —Ëxna nüxũ cucuèx na Griégugawa quidexaxũ.

³⁸ ¿Tama ëxna cuma yĩxũ i Equitucüãx ga üpaxüra rü duũxügüxũ cunuèxëèxũ na ãëxgacümaã nügü nadèixücèx rü dauxchitawa ga taxüema íxãpataxüwa cunagagüxũ ga 4000 ga yatügü ga máëtaxügü? —ñanagürü.

³⁹ Rü yexguma ga Pauru rü nanangãxũ, rü ñanagürü: —Choma rü Yudíu chixĩ, rü Tarsucüãx chixĩ. Rü Chiríchiaanewa rü yima nixĩ ya wüxi ya ñãne ya taxüchine. Rü ngëxguma curü me yixĩgu, rü cuxna chaca na duũxügümaã chidexaxücèx —ñanagürü.

40 Rû yexguma ga guma âëxgacü rû: —Ngü — ñanagürü. Rû nüma ga Pauru, rû churaragüpataarü toxõnegu nachinagü, rû naxunagümëxë na nachiâchixüçèx ga duüxügü. Rû yexguma nachiâchiegu, rû Yudíugawa nidexa, rû ñanagürü nüxü:

22

1 —Pa Chautanüxügüx, jrü choxü iperüxĩnüë i ngëma ñuxma tá pemaã nüxü chixuxü na chaugüétüwa chidexaxüçèx! —ñanagürü.

2 Rû yexguma nüxü naxĩnüëgu ga na Yudíugawa namaã yadexaxü, rû yexeraäcü inayarüchianegü. Rû yexguma namaã yadexagu ga Pauru, rû ñanagürü:

3 —Choma rû Yudíu chixĩ, rû Chiríchiaaneärü ñãne ga Tarsugu chabu. Natürü doma ñãne ya Yerucharéüwa chaya, rû Gamaniéu nixĩ ga chorü nguxëëruü. Rû meãma nawa changux ga guxüma ga mugü ga nuxcümaügüxü ga tórü oxigü nagu ìxü. Rû guxüguma naxcèx chadau na guxüma i chorü ngúchaümaã Tupanaãxü chapuracüxü, ngëxgumarüü i guxãma i pema i ñuxmax.

4 —Rû choma ga üpa rû poraäcü nawe chingëchigü ga yema Ngechuchuaxü yaxögüxü na chanadèixüçèx. Rû íchanayauxü, rû chanapoxcue ga muxüma ga yema yaxögüxü ga yatüxügü rû ngexügü.

5 —Rû nüma ya paigüeru rû guxüma i tupauca ya taxüneärü âëxgacügüerugü rû nüxü nacüëxgü na aixcüma yïxü i ñaã chorü ore. Yerü nümagü rû choxna nanaxägü ga popera na choxü nangüxëëgüxüçèx ga tatanüxügü ga Yudíugü ga

Damacuwa yexmagüxü. Rū yéma Damacuwa chaxü na naxcèx chayadauxü-cèx ga yema Ngechuchuaxü yaxõgüxü, rü nuã Yerucharéüwa na chanagagüxcèx rü nuxã chayapoxcuexüçèx.

Pauru nüxü nixu na ñuxãcü Ngechuchuaxü yaxõõxü

⁶ –Natürü yexguma namagu chixüyane rü marü chingaicaxgu ga Damacuwa na changuxü, rü meãma tocuchigu nixi ga yexguma. Rü ngürüãchi wüxi ga omü ga poraxü ga daxüwa ne baxixü rü choxü nabaxi.

⁷ –Rü ñaxtüanegu chayangu, rü nüxü chaxĩnü ga wüxi ga naga ga ñaxü choxü:

“Pa Chaurux, ¿tüxcüü i chowe quingëchigüxü?” ñaxü.

⁸ –Rü yexguma ga choma rü chanangãxü, rü ñacharügü:

“¿Rü texé quixi Pa Corix?” ñacharügü. Rü nüma ga yema naga rü choxü nangãxü, rü ñanagürü:

“Choma nixi i Ngechuchu ya Nacharétucüãx, rü chorü duüxügü nixi i ngëma nawe quingëchigüxü”, ñanagürü choxü.

⁹ –Rü yema chomücügü rü nüxü nadaugü ga yema omü, rü nabaixãchiãgü, natürü tama nüxü naxĩnüë ga yema naga ga chomaã idexaxü.

¹⁰ –Rü nüxna chaca, rü ñacharügü ga chomax:

“¿Rü tacü tá chaxüxü, Pa Corix?” ñacharügü. Rü yexguma ñanagürü choxü ga Cori:

“¿Írüda, rü inachi, rü Damacuwa naxü, rü ngema tá cumaã nüxü nixu ya wüxi ya yatü na tacü tá cuxüxü!” ñanagürü ga nüma ga Cori.

11 –Rü yexguma ga choma rü chixoxetü yema omüēmamañ, rü yemacèx ga yema chomücügü rü choxmëxgu yangïgüäcüma choxü nigagü, rü yemaäcü Damacuwa changu.

12 –Rü yéma nayexma ga wüxi ga yatü ga Ananíägu äegacü. Rü nüma nixï ga wüxi ga yatü ga aixcüma Tupanaga ñnücü, rü nüma rü meäma nayanguxëë ga yema mugü ga Moïché ümatüxü. Rü guxüma ga Yudíugü ga Damacuwa yexmagüxü, rü meã nachiga nidexagü.

13 –Rü nüma ga Ananíã rü choxü ínayadau. Rü yexguma chauxütawa nanguxgu rü ñanagürü choxü:

“Pa Chaueneë Pa Chaurux, ¡wenaxärü ingoxnaxëtü!” ñanagürü. Rü yexgumatama wenaxärü chingoxnaxëtü rü meäma nüxü chadau.

14 –Rü yexguma ñanagürü ta:

“Yima Tupana ya nuxcümaügüxü ga tórü oxigüarü Tupana cuxü naxuneta na nüxü cucuáxücèx i norü ngúchaü, rü na nüxü cudauxücèx ya yima Cristu ya mecü, rü naãxwatama nüxü cuxñnüxücèx i naga.

15 –Erü cuma tá nixï i guxü i duüxügümañ nüxü quixuchigaxü ga ñuxäcü na Tupanaxü cudauxü rü cumañ yadexaxü.

16 –¡Rü ñuxma rü marü taxuüma ícunanguxëë! ¡Rü írüda rü ínabaie! ¡Rü Cori ya Ngechuchuégagu naxcèx ínaca na cuxü nüxü nangechaüxücèx i curü pecadugü!” ñanagürü choxü.

Pauru nüxü nixu na ñuxäcü Tupana namuxü na yema tama Yudíugü ixïgüxütanüwa naxüxücèx

17-18 –Rü yexguma Yerucharéüçèx chataeguxgu, rü tupauca ga taxünewa chaxü na yéma chayumüxèxüçèx. Rü changoxetü, rü nüxü chadau ga Cori ya Tupana. Rü ñanagürü choxü:

“¡Napaxaãë, rü inaxüãchi i nuã Yerucharéüwa, erü duüxügü rü täütáma naga naxĩnüë i ngëma ore i chauchiga nüxü quixuxü!” ñanagürü.

19 –Rü choma chanangãxü, rü ñacharügü:

“Pa Corix, nüma i duüxügü rü nüxü nacuèxgü ga choma na yĩxü ga guxüne ga ngutaquëxepataügüwa chaxüxü rü íchanayauxüxü rü chanapoxcuexü rü chayaçuaixgüxü ga yema cuxü yaxögüxü.

20 –Rü yexguma yamèxgüãgu ga guma curü duüçü ga Etébañ ga curü orearü uruü, rü chomatama yéma chayexma, rü chorü me nixĩ ga na yamèxgüãxü. Rü choma nixĩ ga nüxna chadauxü ga naxchiru ga yema yamèxgüxü”, ñacharügü nüxü.

21 –Natürü nüma ga Cori rü ñanagürü choxü:

“¡Rü paxa cugü namexëë rü inaxüãchi! Erü yaxügüxü i nachiüãnegüwa i ngëma duüxügü i tama Yudíugü ixīgüxütanüwa tá cuxü chamu” – ñanagürü.

Churaragüarü ãëxgacümëxëwa nayexma ga Pauru

22 Rü yexguma Pauru yema ñaxgu rü yexma nayacuèxëëgü ga na meã nüxü inaxĩnüëxü ga yema duüxügü. Rü yexguma aita naxüëãcüma ñanagürügü: –¡Noxtacüma peyamá! Rü name nixĩ i na nayuxü rü ngëxma na yanaxoxü –ñanagürügü.

23 Rū yexguma aita naxüegu, rü norü gáuxŭchirumaã nibuatanücüü, rü ätēxeanexŭ daxŭ niwogŭtanücüü.

24 Rū yexguma yemaxŭ nadèuxgu ga churaragŭarŭ äëxgacü, rü nanamu ga churaragŭpatagu na yamucuchigŭãxŭcèx ga Pauru. Rŭ nanamu na poraãcü naçuaixgŭãxŭcèx na yadexaxŭcèx na nüxŭ nacuaŭcèx ga tŭxcüü yŭxŭ na yemaãcü nachigamaã aita naxüexŭ ga duŭxŭgŭ.

25 Rū yexguma marŭ yanèixgŭãgu na naçuaixgŭãxŭcèx, rü Pauru nüxna naca ga yema capitáŭ ga yéma yexmaxŭ, rü ñanagŭrŭ: —¿Éxna pexmèxwa nangèxma na penaçuaixŭ i wŭxi i Dumacŭãx ega tama nüxna pecaxiragu? — ñanagŭrŭ.

26 Rū yexguma yemaxŭ naxŭnŭgu ga capitáŭ, rü guma churaragŭarŭ äëxgacŭxŭtawa naxŭ, rü namaã nüxŭ nixu, rü ñanagŭrŭ: —¿Tacü tá cuxŭ? Erŭ ñaã yatŭ rŭ Dumacŭãx nixŭ —ñanagŭrŭ.

27 Rū yexguma ga guma churaragŭarŭ äëxgacü, rü Paurucèx nixŭ, rü nüxna naca rŭ ñanagŭrŭ nüxŭ: —¿Aixcŭma yŭxŭ na Dumacŭãx quiŭxŭ i cumax? —ñanagŭrŭ. Rŭ nüma ga Pauru nanangãxŭ, rŭ: —Ngŭ —ñanagŭrŭ.

28 Rū yexguma ga guma churaragŭarŭ äëxgacü rŭ nanangãxŭ, rŭ ñanagŭrŭ: —Choma rŭ poraãcü choxŭ naxãtanŭ na Dumacŭãx chaugŭ chixŭxèxŭ —ñanagŭrŭ. Rŭ yexguma nachonagŭ ga Pauru, rŭ ñanagŭrŭ: —Natŭrŭ i choma rŭ woetama chorŭ bucŭma Dumacŭãx chixŭ —ñanagŭrŭ.

29 Rū yexgumatama nüxna nixŭgachi ga yema

Pauruxü cuaixgüchaüxü. Rü nümatama ga yema churaragüarü ãëxgacü rü ta namuü ga yexguma nüxü nacuèxgu ga Dumacüãx na yïixü ga Pauru, yerü marü cadenamaã nayanëixchirëx.

Yudíugüarü ãëxgacügütücumüpëxewa nayexma ga Pauru

³⁰ Rü yema churaragüarü ãëxgacü meãma nüxü nacuáxchaü ga tüxcüü na ínaxuaxüügüãxü ga yema Yudíugü. Rü yemacèx ga moxüácü rü nanamu na nangutaquëxegüxüçèx ga paigüarü ãëxgacügü rü guxüma ga yema ãëxgacügütücumü ga Yudíugüarü. Rü nayawëgü ga Pauruarü cadena rü yéma ãëxgacügüpëxewa nanagagü.

23

¹ Rü Pauru meãma nüxü nadawenü ga yema ãëxgacügü, rü ñanagürü nüxü: —Pa Chautanüxügüx, chomatama nüxü chacuèx rü guxüguma meã chamaxü ga Tupanapëxewa ñüxmata ñoma i ngunexüwa nangu —ñanagürü.

² Rü yexguma ga yema paigüeru ga Ananíã rü nanamu ga yema Pauruarü ngaicamana yexmagüxü na naãxwa tayamèxgüxüçèx.

³ Rü yexguma ga Pauru rü ñanagürü nüxü: —Tupana tá cuxü napéax, Pa ãëxgacüx. Cuma rü düxétüwaxica cume natürü aixepena rü nachixe i curü maxü. Rü ñüxma rü ngema curüto na Moïché ümatüxü i mugü nüxü ixuxüácüma choxna cuçaxüçèx. Natürü wüxi i chixexü cuxü erü cumatama rü tama naga cuxĩnü i ngëma Tupana tüxü muxü erü cunamu na choxü napéaxüçèx —ñanagürü ga Pauru.

4 Rū yexguma ga yema yexmagüxü rü ñanagürügü: —¿Tüxcüü i ngēmaãcü tacü namaã quixugüxü i paigüeru ya Tupana nüxü unetacü? —ñanagürügü.

5 Rū Pauru nanangãxü, rü ñanagürü: —Tama nüxü chacuèx, Pa Chautanüxügüx, na paigüeru yïixü. Erü Tupanaârü ore i ümatüxüwa nüxü tadau rü ñanagürü:

“¡Tama curü ãëxgacümaã chixexü quixugü!”
ñanagürü.

6 Rū yexguma nüxü nacuèxgu ga Pauru ga na Chaduchéugü yïixü ga togü, rü na Parichéugü yïixü ga togü, rü yema ãëxgacügüpëxewa tagaãcüma ñanagürü: —Pa Chautanüxügüx, choma rü Parichéu chixi, rü Parichéu nane chixi. Rū ngēmacèx choxna pecagü i ñuxmax, erü chayaxõ i wena tá na namaxëxü i yuexü —ñanagürü.

7 Rū yexguma yema ñaxgu ga Pauru, rü yema Parichéugü rü Chaduchéugü rü inanaxügüe ga nügümaã na iyaporagaexü, rü yexma nügü nitoye ga yema ngutaquëxewa.

8 Erü ngēma Chaduchéugü nagu rüxînüëgu rü tama wena namaxë i ngēma yuexü, rü nataxuma i orearü ngeruügü i daxüçüãx, rü nataxuma i naãëgü —ñanagürügü. Natürü ngēma Parichéugü rü nayaxõgü na nangëxmaxü i guxüma i ngēma.

9 Rū yemacèx guxüma aita naxüe. Rū ñuxüchi ñuxre ga ngüexëëruügü ga Moïchëarü mugüwa nguxëëtaegüxü ga Parichéugütücümüwa ügüxü rü inachigü, rü ñanagürügü: —Toxcèx rü taxuüma i chixexü naxü i ñaã yatü. Bexmana wüxi i tacü rü naãë namaã nidexa rü ëxna wüxi i orearü ngeruü i daxüçüãx —ñanagürügü.

10 Rū yexeraãcü norü numaã nanaxixãchiãëgü ga yema duũxügü. Rū yemacèx naxoegaãë ga guma churaragüarü ãëxgacü ga na Paurugu nagaugügüchaũxü. Rū norü churaragüxü namu na yéma duũxügütanüwa Pauruxü napugüxücèx rü wena churaragüpatawa na nagagüãxücèx.

11 Rū moxüãcüarü chütaxügu Paurucèx nangox ga Cori ga Tupana, rü ñanagürü nüxü: —¡Rü nataãë! Rū ngëxgumarüü i núma Yerucharéüwa choxü na quixuchigaxü, rü ngëxgumarüü tá ta nixĩ i Dumawa na choxü quixuchigaxü —ñanagürü ga Tupana.

Yudíugü naxcèx nadaugü na ñuxãcü Pauruxü yamèxgüchaũxü

12 Rū moxüãcü, rü ñuxre ga Yudíugü rü nügümaã inaxunetagü ga tãütáma na nachibüexü rü naxaxegüxü ñuxmatáta Pauruxü yamèxgü. Rū ñanagürügü: —Tachixexügügü tá ega tacü ingõxgügu naxüpa na yamáxü i Pauru — ñanagürügü.

13 Rū 40 arü yexera ga yatügü nixĩ ga yema nügümaã ixunetagüxü.

14 Rū paigüarü ãëxgacügütanüwa rü Yudíugüarü ãëxgacügügütanüwa naxĩ, rü ñanagürügü nüxü: — Marü togümaã itaxuneta rü tachixexügügü tá ega tacü tangõxgügu naxüpa na tayamáxü i Pauru.

15 Rū name nixĩ i pema rü ngëma togü i pexrüü ãëxgacügütücümüwa ügüxü, rü churaragüarü ãëxgacüna naxcèx peyacagü i ñuxma na moxü wena pepëxewa nagagüãxücèx i Pauru. ¡Rü namaã nüxü pixu na penaxwèxegünetaxü na meã nüxü pecuáxchaũxü i nachiga! Rū toma rü tá

marü ítamemare na namagu tayamáxücèx naxüpa na ínanguxü —ñanagürügü.

16 Natürü ngíne ga Paurueyèx rü nüxü nacuáchiga ga Pauruxü na yamèxgüchaüxü, rü yemacèx churaragüpatawa naxü na Paurumaã nüxü yanaxuxücèx.

17 Rü Pauru naxcèx naca ga wüxi ga capitáü, rü ñanagürü nüxü: —¡Curü ãëxgacüxütawa naga i ñaã ngextüxüxü, erü nüxü nangëxma i ore i namaã nüxü yaxuxchaüxü! —ñanagürü.

18 Rü yema capitáü rü ãëxgacüxütawa nanaga ga yema ngextüxüxü. Rü ñanagürü nüxü: —Ngëma poxcuxü i Pauru rü chauxcèx naca, rü choxna naca na nuã cuxütawa chanagaxücèx i ñaã ngextüxüxü, erü nüxü nangëxma i ore i cumaã nüxü yaxuxchaüxü —ñanagürü.

19 Rü naxmëxgu yayauxãchiãcüma toxnamana nanaga ga ãëxgacü, rü yéma nüxna naca rü ñanagürü: —¡Tacü yíxü i ngëma chomaã nüxü quixuxchaüxü? —ñanagürü.

20 Rü nüma ga ngextüxüxü nanangãxü, rü ñanagürü: —Ngëma Yudíugü, rü nügümaã inaxunetagü na cuxna naxcèx nacagüxücèx na moxü Yudíugüarü ãëxgacügütücümüpëxewa na cunagaxücèx i Pauru. Rü tá cumaã nüxü nixugü na meã nüxü nacuèxgüchaüxü i nachiga.

21 —¡Naturü täütáma nüxü cuyaxõ! Erü 40 arü yexera i yatügü rü marü nügümaã inaxunetagü, rü ñanagürügü:

“Tachixexügugü tá ega tacü ingõxgügu rü ëxna ixaxegügu naxüpa na yamáxü i Pauru”, ñanagürügü. Rü ñuxma rü marü ínamemare, rü

namagu nananèixgü, rü curü orexicatama nixĩ i ñuxma ínanguxèẽgüxũ —ñanagürü.

²² Rũ yexguma ga ãëxgacü rü ínayamu ga yema ngextüxüxũ, rü nüxna naxãga na taxúemaã nüxũ yaxuxüçèx ga na namaã nüxũ yaxuxũ ga yemachiga.

Ãëxgacü ga Perixütawa Pauruxũ namu

²³ Rũ yexguma ga guma ãëxgacü rü taxre ga norü capitáüçèx naca, rü ñanagürü nüxũ: — ¡Penamexèẽ i 200 i churaragü i nacutümaãmare ixĩxũ, rü 70 i churaragü i cowarutagu íxũ, rü 200 i churaragü i wocaxemaã ixãxnexũ na 9 arü oragu i chütacü Checharéawa naxĩxüçèx!

²⁴ —¡Rũ ngëxgumarüũ ta penamexèẽ i ñuxre i cowarugü i Paurucèx na tórü ãëxgacü i Perixütawa naxüxüçèx rü na taxuüma nüxũ üpetüxüçèx i namawa! —ñanagürü.

²⁵ Rũ yema capitáügümaã yéma nanamu ga wüxi ga popera ga ñaxũ:

²⁶ “Choma i Cláudiu Díchiu, rü cuxũ charümoxè Pa
Ãëxgacü ya Mecüxüchi Pa Perix.

²⁷ Rũ yima yatü ya cuxcèx ngema chanamucü, rü Yudíugü nayayauxgü rü wixguxüchi taèx nayamèxgü. Natürü yexguma nüxũ chacuáchigagu na Dumacüãx na yíxũ, rü yéma chaxü chorü churaragümaã, rü nüxna chanapu.

²⁸ Rũ nüxũ chacuáxchaũ ga tacü ga chixexümaã na ínaxuaxügüãxũ, rü yemacèx Yudíugüarü ãëxgacügütücumüpèxewa chanaga.

²⁹ Rũ yexguma nüxũ chacuèx ga na Yudíugüarü muchigacèxmare na ínaxuaxügüãxũ. Natürü

taxuŋma ga chixexŋ naxü na tüxcüŋ yamáxüçèx rü napoxcuxüçèx.

³⁰ Natürü yexguma nüxŋ chacuáchigagu ga na nügümaã inaxunetaxŋ ga Yudíugü ga na yamèxgüãxüçèx, rü yexgumatama nagu charüxñnü na cuxütawa chanamuxŋ. Rü yema ínaxuaxüğüxŋ, rü namaã tá nüxŋ chixu na cuxütawa naxixŋ rü cumaã nüxŋ na yanaxugüxüçèx na tacüçèx ínaxuaxüğüãxŋ”, ñanagürü.

³¹ Rü yema chütaxügu inaxiãchi ga yema churragü, yexgumarüŋ ga norü ãëxgacü na namuxürüŋ. Rü Pauruxŋ nigagü ñuxmata Aütípatiwa nangugü.

³² Rü moxüãcü rü nawoegu ga yema churragü ga nacutümaãmare ixixŋ rü naxpataüwa naxĩ. Rü yema churragü ga cowarutagu ixŋ, rü Paurumaã inaxiãma.

³³ Rü yexguma Checharéawa nangugügu, rü ãëxgacü ga Perina nanaxã ga yema popera, rü Pauruxŋ rü ta inamugü.

³⁴ Rü yexguma nüxŋ nadaumatügu ga popera ga ãëxgacü ga Peri, rü Pauruna naca ga ngextácüãx na yixŋ. Rü yexguma nüxŋ nacüèxgu ga na Chiríchiaanecüãx yixŋ, rü ñanagürü nüxŋ:

³⁵ –Cuxŋ tá icharüxñnü i ngëxguma ínangugügu i ngëma cuxŋ íxuaxüğüxŋ –ñanagürü. Rü yexguma nanamu ga churragü na wüxi ga ucapu ga ãëxgacü ga Erodepatawa yexmaxüwa nüxna na nadaugüxüçèx.

24

Pauru rü ãëxgacü ga Peripëxewa nügüétüwa

nidexa

¹ Rū wüximēxpūx ga ngunexū ngupetügu, rü Yerucharéüwa ne naxū ga paigüeru ga Ananiã, namaã ga ñuxre ga Yudíugüarü ãëxgacügüerugü rü wüxi ga yatü ga meãma dexaxū cuáxū ga Téturu ga naega. Rū nümagü rü ãëxgacü ga Perixütawa naxī na namaã nüxū yanaxugüxücèx ga tüxcüü Pauruxū na ínaxuaxūgüxū.

² Rū yexguma Pauruxū yéma nagagügu, rü inanaxügü ga Téturu ga nüxū na yaxuxū, rü ñanagürü:

—Moxēxūchima i cuma Pa ãëxgacü Pa Perix, erü cugagu nixī i meãma toxū naxüpetüxū i nuã. Rū cugagu nixī i nuã i ñoma i nachiüñewena na toxū nangëxmaxū i muxūma i mexügü.

³ Rū moxē cuxna taxã erü guxūwama rü guxüguma cuxütawa tanayauxgü i guxūma i ngëma mexügü Pa ãëxgacüxūchima, Pa Perix.

⁴ Natürü tama yexeraãcü cuxū chachixewechaü. Rū ngëmacèx cuxna chaca na paxaãchi meã toxū icurüxñüxū.

⁵ Rū ñuxma rü wüxi i orexū cumaã chixuxchaü. Rū marü nüxū tatau i ñaã yatü rü wüxi i ñaaweanerüü na yīxū, erü chixexūmaã nayaxucuxëgü i Yudíugü i guxū i nañewena na nügü yatoyexücèx. Rū nüma nixī i norü ãëxgacü i ngëma duüxügü i nüxū yaxōgüxū i Ngechuchu i Nacharétucüñax.

⁶ Rū toma tayayauxgü i ñaã yatü ga yexguma tupauca ga taxüne naxüxaxëëchaügu. Rü torü mugü tomaã nüxū ixuxüñcüma nüxna tacagüchaü.

⁷ Natürü ínangu ga churaragüarü ãëxgacü ga Díchiu, rü muxūma ga norü churaragümaã toxna

nanapu. Rū toma i ínaxuaxŭgŭxe, rū toxŭ namu na cuxŭtawa taxŭxŭcèx.

⁸ Rū ñuxma rū marū name i cumatama nŭxna cuca i ngēma Pauru na nŭxŭ cucuáxŭcèx na aixcŭma yŭixŭ i guxŭma i ngēma naxcèx ítanaxuaxŭgŭxŭ i tomax –ñanagŭrŭ.

⁹ Rū yema togŭ ga Yudíugŭ rū ta, rū ñanagŭrŭgŭ: –Rū aixcŭma nixŭ i ngēma ore –ñanagŭrŭgŭ.

¹⁰ Rū yexguma ga guma ãëxgacŭ ga Peri rū naxmëxmaã Pauruxŭ naxuneta na yadexaxŭcèx. Rū yexguma ga Pauru, rū ñanagŭrŭ: –Chorŭ taãemaã cupëxewa chaugŭcèx chidexa, erŭ nŭxŭ chacuèx na mucŭma ga taunecŭ ñoma i nachiuãneãrŭ ãëxgacŭ quiixŭ.

¹¹ Marŭ name i cumatama naxcèx ícuca, erŭ 12 i ngunexŭxŭicatama nangupetŭ ga na Yerucharéŭwa changuxŭ na Tupanaxŭ chayarŭcuèxŭxŭcèx.

¹² Rū bai ga tupauca ga taxŭnewa, rū bai ga ngutaquëxepataŭgŭwa, rū bai ga ngŭrŭanewamare ga ñãnewa choxŭ nadaugŭ ga Yudíugŭ ga na texémaã íchioragacŭxŭ, rū na chananuëxëxŭ ga duŭxŭgŭ.

¹³ Rū ñuxma i ñãã duŭxŭgŭ i choxŭ íxuaxŭgŭxŭ, rū bai i wŭxiwaxŭra cuxcèx nanangoxëëgŭ na aixcŭma yŭixŭ i ngēma naxcèx choxŭ ínaxuaxŭgŭxŭ.

¹⁴ Natŭrŭ cumaã nŭxŭ chixu, rū nuxcŭmaŭgŭxŭ ga chorŭ oxigŭarŭ Tupanaãxŭ nixŭ i chapuracŭxŭ ngëxgumarŭ i choxŭ na nanaxwèxexŭ ya Ngechuchu ya Cristu ya nŭxŭ chayaxŭcŭ. Rū ngēma nixŭ i nŭmagŭ i Yudíugŭ naxugŭãgu rū na:

“Tomare i ore”, ñagŭxŭ. Rū aixcŭma nŭxŭ chayaxŭ i guxŭma i Tupanaãrŭ mugŭ ga Moïché ũmatŭxŭ rū guxŭma i Tupanaãrŭ ore

ga nuxcümaügüxü ga norü orearü uruügü ümatügüxü.

15 Rü choma rü ta yema nuxcümaügüxürüü Tupanaãxü chayaxõ. Rü naxrüü chayaxõ rü tá wena na namaxëxü i ngëma yuexü i mexügü rü chixexügü.

16 Rü ngëmacèx nixi i guxüguma meã chaugüna chadauxü na chauãëwatama nüxü chacuáxücèx na chamexü i Tupanapëxewa rü duüxügüpëxewa.

17 Rü dücax, Pa ãëxgacüx, rü ñuxre ga taunecü togü ga nachiuãnegu chixügü, rü düxwaxarü chauchiüãnecèx wena chataegu na nuã chanangexücèx ga dïeru ga namaã nüxü charüngüxëëchaüxü i chautanüxügü i Yudíugü i nüxü nataxuxü, rü nuã Tupanana chanaxãxücèx i chorü ãmaregü.

18-19 Rü yema ngunexügu rü tupauca ya taxünewa Tupanana íchanaxã ga chorü ãmaregü, nawena na chaugü chamexëëxü ga Tupanapëxewa. Rü tama muxü ga duüxügümaã chayexma, rü tama chananuëxëë ga duüxügü ga yexguma ñuxre ga Yudíugü ga Áchiaanecüãx choxü daugügu ga yéma tupauca ya taxünewa. Rü ngëmagü chi nixi i ñuxma nuã íxü na choxü ínaxuaxügüxücèx ega tacü nüxü ngëxmagu i chauchiga.

20 Rü ngëxguma tama tacü nüxü ngëxmagu ga yema tupauca ya taxünewa choxü daugüxü, jrü êcü ñaã ñuxma nuxmagüxü cumaã nüxü ixügü na tacü ga chixexüxü chowa nadaugüxü ga yexguma Yudíugüarü ãëxgacügütücumüpëxewa chayexmagu!

21 Rū ñaxũxĩcatama nixĩ ga chorü ore ga tagaãcü namaã chachonagũxũ ga yexguma yema ãẽxgacügüpẽxewa chayexmagu:

“Rū ñuxma rü choxna pecagü erü choma chayaxõ i wena tá na namaxẽxũ i yuexũ”, ñacharügü ga yexguma –ñanagürü ga Pauru.

22 Natürü ga Peri rü meã nüxũ nacuèx ga yema Cristuaxũ yaxõchiga. Rü yemacèx ga yexguma Pauruaru orexũ naxĩnũgu, rü ínayachaxãchi ga na nüxna naçaxũ, rü ñanagürü Yudíugũxũ: – Ngẽxguma churaragüarü ãẽxgacü ya Díchiu núma ũxgu, rü tá meãma nüxũ chacuèx i ngẽma naxcèx ípenaxuaxũxũ –ñanagürü.

23 Rü yexguma ga Peri rü norü capitáũxũ namu ga na Pauruna nadauxçèx. Natürü tama nanapoxcuxüchi, rü tama nanachuxu ga na naxũtagu naxĩãneãxũ ga namüçügü, rü nüxũ na nangũxẽẽgũxũ.

24 Rü ñuxre ga ngunexũ marü ngupetügu rü wena yéma naxũ ga Peri ngĩmaã ga naxmèx ga Drusíla ga Yudíu ixícü. Rü Paurucèx nayacaxẽẽ, rü nüxũ naxĩnü ga yema ore ga Pauru namaã nüxũ ixuxũ ga Cristuaxũ na yaxõxũchiga.

25 Natürü yexguma Pauru meãma namaã nüxũ ixuxgu na ñuxãcü Tupana naxwèxexũ na meã imaxũxũ rü ñuxãcü nanaxwèxexũ na tórü maxũmaã meã icuáxũ rü ñuxãcü tá tũxna naçaxũ i tórü maxũchiga, rü poraãcü nabaixãchiãẽ ga Peri. Rü düxwa ñanagürü nüxũ: –jËcü íixũ i ñuxmax! Rü ngẽxguma ñuxguacü icharũxãũxmaregu, rü wena táxarü cuxcèx changema –ñanagürü.

26 Yerü Peri ínananguxẽẽ na Pauru chi dǐeru nüxna ixãxũ na yangéãxçèx, rü yemacèx

muēxpüxcüna naxcèx nangemaxü, rü namaã nidexaxü.

²⁷ Rü taxre ga taunecü yemaãcü nixîgü. Rü ínanguxuchi ga Peri ga na ãēxgacü yîixü, rü nachicüü ningucuchi ga Pórchiu ga Festu. Natürü núma ga Peri, rü Yudíugümaã nügü namecümáxēēchaü, rü yemacèx tama ínananguxuchixēē ga Pauru.

25

Ãēxgacü ga Festupēxewa nayexma ga Pauru

¹ Rü Checharéawa nangu ga Festu na yéma ãēxgacüxü yaxücuxücèx. Rü marü tomaēxpüx ga ngunexü yéma nayexmagu, rü wenaxârü ínaxüãchi, rü Yerucharéüwa naxü.

² Rü yéma Yerucharéüwa rü yema paigüarü ãēxgacügü rü Yudíugüarü ãēxgacügü rü Pauruxü ínaxuaxügü Festupēxewa.

³ Rü naxcèx ínacagü ga Yerucharéüwa Pauruxü na namuxücèx. Yerü nümagü rü nagu narüxîñüē na namagu yacüxéügüãxü na yexma yamèxgüãxücèx.

⁴ Natürü ga Festu rü nanangãxü, rü ñanagürü: –Checharéagu napoxcu i Pauru, rü choma rü tá paxa ngema Checharéawa chaxü.

⁵ Rü ngēmacèx name nixî i perü ãēxgacügü rü chowe narüxî i Checharéawa, rü ngēxguma tacü rü chixexü naxüxgu i ngēma yatü, rü ngema tá nixî i chomaã nüxü pixugüxü –ñanagürü.

⁶ Rü maneca 8 rü ēxna 10 ga ngunexü Yerucharéüwa nayexma ga Festu, rü ñuxüchi Checharécèx nataegu. Rü yexguma ínanguxguarü

moxüãcü rü yema nachica ga ngextá duüxügüna ínacaxüwa naxü, rü yéma nayarüto norü tochicaxüwa. Rü Paurucèx nangema na yéma napêxewa nagagüãxücèx.

⁷ Rü yexguma yexma yaxücuxgu ga Pauru, rü yema Yudíugü ga Yerucharéüwa ne íxü, rü naxcèx naxí. Rü muxüma ga chixexügümaã ínanaxuaxügü. Natürü taxuwama nüxü nüxü nadauxêê na aixcüma yíixü ga yema naxcèx ínanaxuaxügüãxü.

⁸ Rü yexguma ga Pauru rü nanangãxü, rü ñanagürü: —Pa ãêxgacüx, taxuüma ga chixexü namaã chixugü ga yema mugü ga Moíché ümatüxü, rü bai ga tupauca ya taxünemaã, rü bai ga ãêxgacü ya Chécharumaã —ñanagürü.

⁹ Natürü nüma ga Festu rü Yudíugümaã nügü namecümaxêêchaü, rü yemacèx Pauruna naca, rü ñanagürü nüxü: —¿Cunaxwèxexü na Yerucharéüwa cuxüxü na ngema cuxna chaçaxücèx naxcèx i guxüma i ngêma naxcèx cuxü ínanaxuaxügüxü? —ñanagürü.

¹⁰ Rü yexguma ga Pauru rü nanangãxü, rü ñanagürü: —Choma rü cupêxewa changêxma na choxna cuçaxücèx, erü cuma nixí i cuxü naxunetaxü i ãêxgacü ya tacü ya Chécharu na ãêxgacü quiixü i núma. Rü ngêmacèx chanaxwèxe i nuã choxna cuca. Erü taxuüma i chixexü chaxü i Yudíugümaã, ngêxgumarüü i cuma meãma nüxü cucuèx.

¹¹ Ngêxguma chi tacü i chixexü chaxüxgu rü marü name na naxcèx choxü yamèxgüxü, rü marü name i na chayuxü. Natürü ngêxguma nataxuxguma i tacü i aixcüma íxixü i ngêma

naxcèx choxü ínaxuaxüğüxü, rü taxuacüma texé Yudíügüna choxü tamu. Rü naxcèx íchaca na nümatama ya äëxgacü ya tacü ya Chécharu choxna naçaxüçèx –ñanagürü ga Pauru.

¹² Rü yexguma ga Festu rü norü ucuxëruüğü ga äëxgacügümaã nidexa, rü ñuxüchi ñanagürü Pauruxü: –Marü naxcèx ícuca na äëxgacü ya tacü ya Chécharu cuxna çaxüçèx. Êcü, ñuxma rü naxütawa tá cuxü chamu –ñanagürü.

Äëxgacü ga Agripapëxewa nayexma ga Pauru

¹³ Rü ñuxre ga ngunexü ngupetügu, rü Checharéawa nangugü ga Yudíügüarü äëxgacü ga Agripa rü naëyèx ga Bereníche, na Festuxü yanamoxëğüxüçèx.

¹⁴ Rü marü ñuxre ga ngunexü yéma nayexmagügu, rü Agripamaã nüxü nixu ga Festu ga Pauruchiga, rü ñanagürü: –Nuã nangëxma i wüxi i yatü i poxcuxü ga Peri tama ínguxuchixëëxü.

¹⁵ –Rü yexguma choma Yerucharéüwa chayexmagu, rü paigüarü äëxgacügü rü Yudíügüarü äëxgacügüerugü rü ínanaxuaxüğü, rü naxcèx ínacagü na namaã chanaxueguxüçèx rü na yamëxgüãxüçèx.

¹⁶ –Rü choma chanangãxü, rü tama tocüma nixí i toma i Dumacüãxgü i na tayamáxü i wüxi i duüxü ega tama nügüétüwa yadexaxíragu napëxewa i ngëma ínaxuaxüğüxü.

¹⁷ –Rü yemacèx ga yexguma núma nangugügu ga yema Yudíügü, rü yexgumaärü moxüãcü rü chorü tochicaxüwa chitocuchi na nüxna chaçaxüçèx nachiga ga yema, rü yéma naxcèx changema ga yema yatü.

18 –Natürü ga yema Yudíugü ga ínaxuaxügüxü, rü taxuüma ga tacü ga chixexü ga choma íchananguxêëxüxü nixugü.

19 –Natürü norü Tupanachiga rü wüxi ga yatü ga Ngechuchuchiga nixí ga yema nagu yadex-agüxü. Rü nüma ga Yudíugü nüxü nixugü ga na nayuxü ga yema Ngechuchu, natürü Pauru nüxü ixuxgu rü marü wena namaxü.

20 –Rü yexguma ga choma ga tama na nüxü chacuáxü ga ñuxácü tá chanamexêëxü ga yema guxchaxü, rü yemacèx nüxna chaca ga Pauru ngoxi nanaxwèxe ga Yerucharéüwa na naxüxü, na yéma nüxna chaçaxüçèx.

21 –Natürü nüma ga Pauru naxcèx ínaca ga na ãëxgacü ya tacü ya Chécharupëxewa naxüxü na nümatama ya Chécharu nüxna çaxüçèx. Rü yemacèx chanamu na meã nüxna nadaugüxüçèx ñuxmata choma ãëxgacü ya Chécharuxütawa chanamux –ñanagürü.

22 Rü yexguma ga Agripa rü ñanagürü Festuxü: –Choma rü ta nüxü chaxñüchaü i norü ore i ngëma yatü –ñanagürü. Rü Festu nanangãxü rü ñanagürü: –Moxü tátama nüxü cuxñü –ñanagürü.

23 Rü moxüácü yema ucapu ga ãëxgacügü íngutaquëxegüxüwa nangugü ga Agripa rü Bereniche rü poraácü nangëxãëgü. Rü namaã ínangugü ta ga churaragüarü ãëxgacügü rü yema ñãnecüãxgü ga corigüxüchi ixíngüxü. Rü ñuxüchi Paurucèx nangema ga Festu na yema ãëxgacügüpëxewa nagagüãxüçèx.

24 Rü ñanagürü ga Festu: –Pa ãëxgacü Pa Agripax, rü Pa Guxãma i Pema ya Nuxmagüxe, ñaã

nixĩ i ngẽma yatü i nachigamaã yadexagüxũ i guxũma i Yudíugü. Rü chopẽxewa ínanaxuaxüğü ga Yerucharéüwa rü núma rü ta. Rü guxüğüma tagaãcüma choxna naxcèx nacagü na nayuxũ.

²⁵ —Natürü i choma rü taxuũma i tacü i chixexũ i naxüxũ nawa chadau na naxcèx yamáxũ. Natürü nüma ga Pauru rü naxcèx ínaca na ãëxgacü ya tacü ya Chécharu nüxna çaxũ, rü ngẽmacèx nagu charüxĩnü na ngẽma chanamuxũ.

²⁶ —Natürü taxuũma i ore i aixcüma ixĩxũ i nachiga choxũ nangẽxma na chorü ãëxgacü ya Chécharucèx chanaxümatüxüçèx. Rü ngẽmacèx chanamu na nuã pepẽxewa nagagüãxüçèx, rü cuxcèx türü nixĩ, Pa ãëxgacü Pa Agripax, na nüxna cuçaxüçèx, na nüxũ chacuáxüçèx i tacü tá na chaxümatüxũ naxcèx ya ãëxgacü ya Chécharu.

²⁷ —Erü chauxcèx rü tama name na ngextá namuxũ i wüxi i poxcuxũ ega tama naxümatüxíragu nachiga na tacüçèx ínanaxuaxüğüãxũ.

26

Pauru rü ãëxgacü ga Agripapẽxewa nüğüétüwa nidexa

¹ Rü yexguma ga Agripa rü ñanagürü Pauruxũ: —Marü name i ñuxma i cugüétüwa quidexa —ñanagürü. Rü yexguma naxunagümẽxẽ ga Pauru, rü ínanaxüğü ga nüğüétüwa na yadexaxũ, rü ñanagürü:

² —Chataãë, Pa ãëxgacü Pa Agripax, erü cupẽxewa chidexa i ñuxma na chaugüétüwa chachogüxüçèx i guxũma i ngẽma choxũ na ínanaxuaxüğüxũ i ngẽma chautanüxũ i Yudíugü.

³—Rü yexeraãcü chataãẽ erü cuma nüxũ cucuèx i guxũma i tocüma i toma i Yudíugü, rü guxũma i Moíché ümatüxũ i mugü i naxcèx yadexagüxũ i chautanüxũgü. Rü ngẽmacèx cuxna chaca na meã choxũ icurüxĩnũxũcèx.

Paaurarü maxũ naxũpa ga Ngechuchuaxũ na yaxõõxũ

⁴—Rü guxũma i ngẽma chautanüxũgü i Yudíugü rü nüxũ nacuèxgü ga ñuxãcü na chamaxũxũ ga natanüwa ga chauchiũãnewa rü Yerucharéüwa ga yexguma changextüxüüragu.

⁵—Rü ngẽxguma chauchigaxũ yaxugüechaũgu, rü nüma nüxũ nacuèxgü ga choma rü woetama Parichéu na chiĩxũ. Rü toma i Yudíugü i Parichéugü na tixígüxũ, rü toma nixĩ i guxũma i totanüxũ i Yudíugüarü yexera na poraãcü tanaxaurexũ i ngẽma tocüma.

⁶—Rü ñuxma i ngẽma chautanüxũgü i Yudíugü rü nuã pepèxewa choxũ nagagü erü chayaxõ na Cristugagu nangẽxmaxũ i maxũ i taguma gúxũ, yema Tupana nuxcümaũgüxũ ga torü oxigümaã inaxunetaxũrüũ.

⁷—Rü guxũma i totanüxũgü i Yudíugü rü ínananguxêégü na nüxũ nadaugüxũ rü tá na yanguxũ i ngẽma uneta. Rü ngẽmacèx Tupanaxũ nicuèxüũgü rü guxũguma i ngunecü rü chütacü rü Tupanaãxũ napuracüe. Rü choma rü ta íchananguxêẽ na nüxũ chadauxũ rü tá na yanguxũ i ngẽma uneta, rü ngẽmacèx nixĩ, Pa Ñẽxgacüx, i ñuxma i choxũ ínaxuaxũgüxũ i ngẽma chautanüxũgü i Yudíugü.

⁸ –¿Rü tüxcüŭ tama peyaxōgü na Tupana wena namaxēxēxü i ngēma yuexü?

Pauru rü nüxü nixu ga ñuxācü yema yaxōgüxüwe na yangēchigüxü

⁹ –Rü choma nagu charüxñügu ga noxri rü name ga muxüma ga chixexü namaã na chaxüxü ga yema Ngechuchu ya Nacharétucüãxāxü yaxōgüxü.

¹⁰ –Rü yemacèx nawe chingēchigü ga Yerucharéüwa. Rü paigüarü ãëxgacügüxütawa naxcèx íchaca ga popera na chanapoxcuexücèx ga yema yaxōgüxü. Rü yexma chanapoxcue ga muxüma. Rü yexguma chautanüxü ga Yudiügu nadaixgu ga yema yaxōgüxü, rü choma rü chorü me nixü.

¹¹ –Rü muëxpüxcüna rü chanapoxcuexü na nüxü naxoexücèx ga yema na yaxōgüãxü. Rü yemaãcü chanaxü ga guxünema ga ngutaquëxepataüğüwa. Rü poraãcü naxchi chaxaxichi ga yema yaxōgüxü, rü yemacèx nawe chingēchigü ñuxmata to ga nachüãnegune ga ñānegüwa.

Pauru rü wenaxärü nüxü nixu ga ñuxācü na yaxōxü ga noxrix

¹² Rü ñanagürü ga Pauru: –Rü yema yaxōgüxüxü na chapoxcuexücèx nixü ga Damacuwa chaxüxü. Rü yemacèx ga paigüarü ãëxgacügü rü choxü namugü rü choxna nanaxāgü ga popera ga nawa choxna naxāgagüxü na chanapoxcuexücèx ga yema yaxōgüxü.

¹³ –Rü yexguma namagu taxiyane, Pa ãëxgacüx, rü yexguma meãma tocuchiwa nanguxgu, rü nüxü

chadau ga wüxi ga omü ga daxüwa ne üxü ga üëxcüarü yexera ixixü ga choxü baxixü rü yema chomücügüxü rü ta baxixü.

14 –Rü guxâma ga toma rü ñaxtüanegu tayayi. Rü choma rü nüxü chaxñü ga wüxi ga naga ga Yudíugawa choxü ñaxü:

“Pa Chauru Pa Chaurux, ¿tüxcüü i chowe quingêchigüxü? Poraâcü cugütama cuchixexê ñoma wüxi i tacü i âmaguxügu cucuxgüxrüü”, ñanagürü choxü.

15 –Rü choma chanangâxü, rü ñacharügü:

“¿Texé quixi, Pa Corix?” ñacharügü. Rü nüma ga Cori rü ñanagürü choxü:

“Choma nixi i Ngechuchu rü chorü duüxügü nixi i ngêma nawe quingêchigüxü.

16 –¡Natürü írüda rü inachi! Rü marü cuxcèx changox i ñuxmax, erü cuxü chamuxchaü na choxü cupuracüxcèx rü nüxü quixuchigaxüçèx i ngêma ñuxma na choxü cudauxü rü ngêma yixcüra tá chauxütawa nüxü cudauxü.

17 –Rü cuxna tá chadau i natanüwa i cutanüxügü i Yudíugü rü ngêma tama Yudíugü ixigüxü i ñuxma tá natanüwa cuxü chamuxü.

18 –Rü ngema cuxü chamu na ngêma duüxügüxü choxü cucuèxêxüçèx rü nüxü naxoexüçèx i nacüma i chixexügü rü chauga naxñüèxüçèx. Rü ngema tá cuxü na Chatanámêxêwa ícunanguxüxêxüçèx i ngêma duüxügü na chowe naxixüçèx rü choxü yaxögüâxüçèx na choma rü nüxü nüxü changechaüxüçèx i norü pecadugü, rü nüxü nangëxmaxüçèx i nachica namaã i guxüma i chorü duüxügü i üünegüxü”, ñanagürü choxü ga Cori.

Pauru rü naga naxĩnü ga yema Ngechuchu namaã nüxũ ixuxũ

19 –Rü yemacèx ga chomax, Pa ãëxgacü Pa Agripax, rü naga chaxĩnü ga yema ore ga Ngechuchu chomaã nüxũ ixuxũ ga yexguma choxũ nabaxixgu ga yema omü ga daxũwa ne üxũ.

20 –Natürü noxri rü Damacucüãxgümaã nüxũ chixuchiga ga Tupanaãrü ore. Rü yixcama ga Yerucharéüçüãxgümaã, rü yemawena rü guxũ ga Yudéaanewa, rü ñuxũchi yema tama Yudíugü ixĩgüxũmaã nüxũ chixu. Rü ñacharügü:

“¡Nüxũ perüxoe i pecüma i chixexügü, rü Tupanacèx pedaugü, rü meã pemaxë na duüxügü nüxũ daugüxüçex na aixcüma peyaxögüxũ!” ñacharügü.

21 –Rü yemacèxtama nixĩ ga tupauca ya taxünegu choxũ yayauxgüxũ rü choxũ yamëxgüchaũxũ ga chautanüxügü i Yudíugü.

22-23 –Natürü Tupana choxũ narüngüxëë rü ngëmacèx taguma íchayachaxãchi na guxũma i duüxügümaã nüxũ chixuxũ rü woo buxũ rü yaxũ. Rü namaã nüxũ chixu ga yema ore ga nuxcümaügüxũ ga Tupanaãrü orearü uruügü rü Moíché nüxũ ixugüxũ na ñuxãcü tá nüxũ nangupetüxũ ga Cristu rü ñuxãcü tá na nayuxũ, natürü yemawena rü nüma tá yĩxũ ga nüxĩra yuwa ínadxũ. Rü namaã nüxũ chixu ta ga yema nuxcümaügüxũãrü ore ga ñaxũ:

“Rü Cristu rü tatanüxũ i Yudíugümaã rü ngëma to i duüxügü i tama Yudíugü ixĩgüxũmaã tá naxunagüãxũ i ore i tüxũ maxëxëëxũ”, ñaxũ. Rü yemachigaxũxĩcatama nixĩ ga namaã chixuxũ –ñanagürü ga Pauru.

Pauru rü Agripaaxü nanangúchaixē na yaxōōxūcèx

24 Rū yexguma yemaãcū nügüétüwa yadeaxgu ga Pauru, rü ñanagürü ga Festu tagaãcūma: — Cungēãmare Pa Paurux. Rū ngēma na yeŭcürü cungúechaŭ, rü düxwa nawa cungēãē —ñanagürü.

25 Natürü ga Pauru rü nanangãxü, rü ñanagürü: —Tama changēã Pa Ñëxgacüxüchi, Pa Festux. Erü ñaã ore i nüxü chixuxü, rü aixcūmaxüchima nixī.

26 —Rü daa ãëxgacü ya Agripa rü meãma nüxü nacuèx i guxüma i ngēma pemaã nüxü chixuxü. Rū ngēmacèx tama chamuŭãcūma chorü taãemaã napëxewa nüxü chixu, erü nüxü chacuèx na nüma rü ta nüxü nacuáxü i tacüchiga na yïxü i guxüma i ñaã ore. Erü tama ngextámare cúãcū naxüpetü i ngēma.

27 —¿Cuyaxōxü, Pa Agripax, i ngēma Tupanaãrü orearü uruŭgü nüxü ixuxü? Choma nüxü chacuèx rü cuyaxō —ñanagürü ga Pauru.

28 Rū Pauruxü nangãxü ga Agripa, rü ñanagürü: —¿Éxna cuma nagu curüxñügu rü ngēmaãcū noxre i curü oremaã na choxü cuyaxōxēxü? —ñanagürü.

29 Rū ñanagürü ga Pauru: —Woo noxre i oremaã rü woo muxü i oremaã rü Tupana nanaxwèxe na cuyaxōxü. Rū tama i cuxicatama, natürü guxüma i ñaã nuã choxü ñnüëxü rü ta, rü Tupana nanaxwèxe na chauxrüŭ yixīgüxü, natürü tama chauxrüŭ daa cadenagümaã na yanëixgüxü —ñanagürü ga Pauru.

30 Rū yexguma inachigü ga Agripa, rü Festu, rü Bereniche, rü guxüma ga yema namaã yéma rütogüxü.

31 Rū yexguma ga nümagü rü noxrüwama naxī

na yéma nügümaã Pauruchiga yadexagüxüçèx. Rû ñanagürügü: —Rû ngēma yatü, rû taxuüma i chixexü naxü na naxcèx yamáxü rû éxna naxcèx napoxcuxü —ñanagürügü.

³² Rû Festuxü ñanagürü ga Agripa: —Ngëxguma chi tama nümatama naxcèx ínacaxgu na Chécharu nüxna çaxüçèx, rû chi ítananguxuchixëẽ —ñanagürü.

27

Pauruxü Dumawa namugü

¹ Rû yema äëxgacügü rû düxwa nagu narüxĩnüë na norü äëxgacü ga Chécharu ga Itáriaanewa yexmacüxütawa na toxü namugüxü. Rû norü churragüarü capitáüna nanamu ga Pauru namaã ga ñuxre ga togü ga poxcuexü na Chécharuxütawa nagagüãxüçèx. Rû guma capitáü rû Yúriu nixĩ ga naëga, rû norü churragütücümü rû Chécharuarü Dauruüügü nixĩ ga naëga.

² Rû nagu tichoü ga wüxi ga wapuru ga buanecümaã ixüxüne ga Adamíchiuwa ne üxüne ga Áchiaarü ñãnegüwa üxchaxüne. Rû towe ta nixüe ga Aritárcu ga Machedóniãñecüãx ga Techarónicawa ne üxü.

³ Rû moxüãcü rû Chidãüärü türewa tangugü. Rû Paurumaã namecüma ga capitáü ga Yúriu. Rû ínanaxüexëẽ na yémacüãx ga namücügüxütagu naxüãneãxüçèx ga Pauru, na nümagü nüxü nangüxëëgüxüçèx.

⁴ Rû yéma itaxĩãchi. Rû Chiprearü capaxüärü tocüwaguama taxĩ, naxchaxwa ga buanecü, yerü towaama nabu.

⁵ Rû yéma Chiprewa tixãü ga taxtü rû Chiríchiaanecütüwa tarüyicu. Rû yemacutügu

taxĩ, rü Paüpíriaanewa tachopetü rü ñuxmata Díchiaanewa yexmane ga ñãne ga Mirawa tangugü.

⁶ Rü yema capitáũ yexma nüxũ nayangau ga wüxi ga wapuru ga Aleyãdríawa ne üxũne ga Itáriaanewa üxũne. Rü gumagu toxũ nichoũxẽẽ, rü tomaã inaxũãchi.

⁷ Natürü írarüwatama itañaxwetaxũ ga muxüma ga ngunexügu, rü guxchaãcüma Guíduarü toxmèxtawa tangugü. Natürü towaama nabuema ga buanecü, rü yemacèx capaxü ga Chamonaãrü toxmèxtawa tachopetü rü capaxü ga Crétaxũ ítachoeguãchi.

⁸ Rü guxchaãcüma nacutügu taxĩ ga yema capaxü, rü wüxi ga nachica ga Mexũ ga Türegu äegaxüwa tangugü. Rü ñãne ga Dácheaarü ngaicamãna nayexma.

⁹ Natürü marü poraãcü namagu tanuxcü ga na itaxĩxũ, rü marü naxãücüma ga na itaxĩãmaxũ yerü marü nawa nangu ga guma tauemacügü ga nagu nagáuanecü. Rü yemacèx ga Pauru rü nayaxucuxẽ ga duũxügü, rü ñanagürü:

¹⁰ —Pa Chomücügüx, nüxũ chacuèx i ngëxguma chi ixĩãmagu, rü tá naxãücüma. Rü daa wapuru rü tá inayarütaxu namaã i guxüma i naãcu. Rü ngürüãchi i yixema rü tá ta tayue —ñanagürü.

¹¹ Natürü yema churaragüarü capitáũ rü yexeraãcü guma wapuruarü yoragaama naxĩnü, rü marinerugüarü capitáũgaama naxĩnü, rü tama aixcüma Pauruga naxĩnü.

¹² Natürü yema türe rü tama name ga yéma na tanangupetüxẽẽxũ ga gáuanexũ. Rü yemacèx wixguxüchi guxüma ga duũxügü nagu narüxĩnüẽ rü narümemaẽ nixĩ ga na itaxĩãchixũ ga yéma. Rü

nanaxwèxegü ga chi Cueníchwewa na tangugüxü na yéma tanangupetüxëëxü ga gáuanexü, yerü yema nixí ga wüxi ga Crétaarü türe ga mexü ga tama poraãcü buanecü ga taxü nawa nguxü.

Taxtüarü ngãxütügu nüxü naxü ga buanecü ga tacü

¹³ Rû inanaxügu ga na meãma topëxewaama nabuxü ga buanecü, rû yemacèx ga nümagü ga marinerugü rû nüxü nacuèxgügu rû chi meã ítangugü ga yema ítaxixüwa. Rû yemacèx itaxíãchi, rû nacutüarü ngaicamagu taxí ga yema Crétaarü capaxü.

¹⁴⁻¹⁵ Rû natürü ngürüãchi yixcamaxüra rû wüxi ga buanecü ga taxüchicü ga capaxüârü tocüwawa ne üxcü ngãxütüwaama nanacue ga guma wapuru. Rû taxuacüma itixütaü nawaama ga buanecü. Rû yemacèx düxwa ítayachaxãchi ga na tanatochinüxü, rû toxü ínicuetaü.

¹⁶ Rû wüxi ga capaxüxãcü ga Caudagu ãegaxüârü tocüwawaama tachopetü ga ngextá tama poraãcü íyabuaxüwa. Rû yéma poraãcü tapuracüe na guma wapurugu tanatúnagüxü ga norü ngue ga yatúchigüne.

¹⁷ Rû yexguma marü natúnagügüãgu ga guma ngue, rû napanaxãgü ga tanütaxümaã nayanèixgütüwe ga guma wapuru. Rû ñuxüchi nayawëgü ga yema naxchirutachinügü ga namaã yacuetaüxü ga noxrix, yerü namuüë ga na Chírutearü naxnücüwa yanangaixtaügüxü. Rû yema buanecü toxü nicuetaümare.

¹⁸ Rû moxüãcü ga buanecü rû tama nangupetüéga, rû yemacèx inanaxügu ga na

ínawoũãcuãxũ.

19 Rũ norũ tomaẽxpũx ga ngunexũgu, rũ naxmẽxmaãtama ínanawoũ ga yema natũxũgũ ga guma wapuru, rũ guxũma ga to ga norũ yemaxũgũ.

20 Rũ muxũma ga ngunexũgu, rũ tama nangox ga üèxcü rũ ãxtagũ, rũ tama nangupetüéga ga guma buanecü ga taxüchicü. Rũ düxwa nagu tarũĩnüè ga marũ tãütãma na tamaxẽxũ.

21 Rũ yexguma marũ muxũma ga ngunexũ tingegũgu ga tama na tachibüexũ, rũ yexguma guxũma ga yema duũxũgütanüwa inachi ga Pauru, rũ ñanagürü: –Narũmemaẽ chi nixĩ, Pa Chomücügũx, ga chauga na pexĩnüèxũ, rũ tãũ chima na ixĩãchixũ ga Crétawa, rũ tãũ chima ñuxmarũũ tüxũ naxüpetü i ñãã ãücũmaxũ rũ taxuxũ chima i chixexũ tüxũ nangupetü.

22 –Natürü ¡petaãégũ! erü wapuruxica tá inayarütaxu, natürü i yixema rũ taxüetãma tayue.

23 –Erü ngewèxarü chütaxũgu ya Tupana ya nüxũ chapuracücü ya chorü cori ixĩcü rũ núma nanamu i wüxi i norũ orearü uruũ i daxüçũãx i chauxcèx ngóxũ.

24 –Rũ ñanagürü choxũ:

“¡Tãxũ i cumuũxũ, Pa Paurux! Erü ãëxgacü ya Chécharupẽxewa tá cingu, rũ cugagu tá Tupana nanamaxẽxẽè i guxũma i ngẽma cumücügũ i cumaã ngẽxma wapurugu íxũ”, ñanagürü choxũ.

25 –Rũ ngẽmacèx, Pa Chomücügũx, ¡rũ petaãégũ! erü choma rũ aixcüma Tupanaãxũ chayaxõ, rũ aixcüma tá nixĩ i ngẽmaãcü tá nangupetüxũ ngẽxgumarũũ i ngẽma chomaã nüxũ yaxuxũ.

26 –Natürü wüxi i capaxüwa tá tayarücüxcuchitaüğü –ñanagürü ga Pauru.

27 Rû yexguma taxre ga yüxü tingexgu ga na itaxixü, rû taxü ga taxtü ga Ariaticuwa tayexmagü, yerü ga buanecü rû núxica toxü nacuetäü. Rû ngäxücüügu nüxü nicuèxächitanü ga yema marinerugü ga na dauxchitacutüwa tangugüchaüxü.

28 Rû ínanataegü ga norü ngugütamaxü rû 36 ga metru nixi ga norü mátama. Rû yexguma marü írarüwa yaxüguxüra itaxixgu rû wenaxärü nanangugütamagü, rû 27 ga metru nixi ga norü mátama ga yexgumax.

29 Rû namuñe ga na nutamañ yanañataügüxü ga naxānacüwa, rû yemacèx guma wapuruchinüwa ínanawoñ ga āgümücü ga aüclagü ga achugünaxcèx ga napanaxāmañ ixātüxüxü na yemaäcü iyachaxāchigüxēñxücèx ga guma wapuru. Rû nayumüxégü ga paxa na yangunexücèx.

30 Natürü ga yema marinerugü rû nibuxmüchaü ga guma wapuruwa, rû yemacèx nanawāixégü ga guma wapuruarü ngue, rû ñanagürügü: –Ngēma wapurupèxearü aüclagü tá ítawoñ na nataixücèx ya wapuru –ñanagürügüneta.

31 Natürü ga Pauru rû churaragüarü capitáümañ rû norü churaragümañ nüxü nixu rû ñanagürü: –Ngèxguma ñañ marinerugü rû tātütama nuxā wapurugu nachoxgu, rû guxāma i pema rû tá peyue –ñanagürü.

32 Rû yexguma ga yema churaragü rû nayadaecunügü ga guma ngue, rû inananguxēégü.

33 Rû yexguma marü yangunechaügu, rû Pauru nayaxucüxégü ga guxüma na nachibüexücèx,

rü ñanagürü: –Taxre i yüxü nixĩ i ñuxma na taguma aixrügumarüŭ pechibüexŭ, rü bai i ƭacü na pengõxŭ yerü poraãcü pexoegaãëgü.

³⁴ Rü ñuxma rü pemaã nüxŭ chixu na pechibüexŭ na peporaexüçèx, rü taxuŭma pexŭ üpetüxüçèx. Erü taxúetáma itayarütaxu rü bai i wüxi i peyaexüra inayarütaxu –ñanagürü.

³⁵ Rü yexguma marü yema ñaxgu, rü nanayaxu ga wüxi ga pãũ, rü Tupanana moxê naxã napêxewa ga guxŭma. Rü inanabücu ga yema pãũ, rü inanaxügü ga na nangõõxŭ.

³⁶ Rü yexguma nataãëgü ga guxŭma, rü nümagü rü ta nachibüe.

³⁷ Rü 276 tixĩgü ga guxãma ga toma ga guma wapuru gu ìxê.

³⁸ Rü yexguma marü nangãxëgu, rü ínanawoŭ ga yema trigu ga wapuru namaã ããcuxŭ na nangünagüãchixüraxüçèx ga guma wapuru.

Inangu ga guma wapuru

³⁹ Rü yexguma yangunegu, rü yema marinerugü tama nüxŭ nacuáane ga yéma. Natürü nüxŭ nadaugü ga wüxi ga axcuchixŭ ga naxnücüpechinüãxŭ, rü nagu narüxĩnüë ga yéma na yanangaixëëgüãxŭ ga wapuru.

⁴⁰ Rü yexguma nanadaŭ ga norü ngaxŭxŭ ga aŭclagü, rü yéma nanawogü. Rü nayawëgü ga norü toxchinüxŭãrü nëixruŭgü, rü inananga ga yema napêxewa üxŭ ga naxchirutachinü ga namaã iticuetaŭxŭ. Rü itanaxügü ga nüxŭ na tingaicaxŭ ga yema naxnücüpechinü.

⁴¹ Natürü wüxi ga naxnücüarü nuxtamaxŭwa tayarüngaixtaŭ. Rü yéma naxnücüwa

nayarūwápēxe ga guma wapuru rü marü tama yéma itaxĩāchi. Rū yoxni ga nachinüwa, rü yuape nayapuxēē.

⁴² Rū yema churaragü rü nagu narūxĩnūē ga na nadaiāxū ga yema poxcuexū na taxuūma iñaxūcèx ga yexguma naxānacüwa nangugügu.

⁴³⁻⁴⁴ Natürü yema norü capitáũ ga churaragü, rü Pauruxū namaxēēchaũ, rü yemacèx tama nanaxwèxe ga na nadaiāxū ga yema poxcuexū. Natürü nanamu na yema ixānūxū rü nūxĩra ínayuxgūxū na naxānacüwa nawēxgūxūcèx, rü yema togü rü mürapewagügu rü ěxna yema wapurutūchigügu meã na ínachoūxūcèx. Rū yemaãcü guxāma meãma naxānacüwa tangugü.

28

Capaxū ga Mártaŵa nayexma ga Pauru

¹ Rū yexguma meãma naxānacüwa tangugügu ga guxāma rü yexguma nūxū tacuèxgü na Márta na yĩixū ga naega ga yema capaxū.

² Rū yema yémacuūāxgü ga duūxūgü rü meãma toxū nayauxgü ga guxāma. Rū nanangixtagü ga wūxi ga üxü ga taxūne. Rū toxcèx nacagü ga guxāma na yéma togü tanaĩxūgūxūcèx, yerü napu rü nagáuane.

³ Rū Pauru nanadetaquēxe ga ñuxre ga naĩchacüügü, rü üxūxetüwa nayawocu. Natürü yexguma yéma yawocuāgu, rü üxüarü naĩēmaxūchaxwa inayago ga wūxi ga āxtape. Rū Paurumēxēwa nayuxu, rü yéma nayarütuāchi.

⁴ Rū yexguma yema yémacuūāxgü nūxū daugügu ga yema āxtape ga Paurumēxēwa na natuxū, rü

nügümaã ñanagürügü: –Ñãã yatü rü maneca wüxi i máētaxũ nixĩ. Rũ woo taxtüwa yuwa na yañaxũ, natürü Tupana tama nanamaxēēchaũ – ñanagürügü.

⁵ Natürü guma üxüxetügu nanamaxũ ga yema äxtape, rü taxuũma nüxũ naxüpetü ga Pauru.

⁶ Natürü guxũma ga yema duũxũgü rü ínananguxēēgü rü ngoxi tá nachamé rü ēxna nayux. Rũ marü nuxcũxürama ga yema nüxũ na nadaunüxũ rü taxuũma nüxũ na üpetüxũ, rü düxwa togu narüxĩnüē rü inanaxügüe ga na ñagüxũ: –Maneca wüxi ya tupana nixĩ –ñagüxũ.

⁷ Rũ yema nachicaarü ngaicamana nayexma ga norü naãne ga yema capaxũärü äēxgacü ga Púbiru ga naega. Rũ nüma meãma toxũ nayaxu, rü yexma toxũ napegüxēē ga tomaēxpüx ga ngunexũ. Rũ tomaã namecũmaxũchi.

⁸ Rũ guxema Púbiru nanatü rü ngürücarewa tayexma, yerü tixaxüne rü taduũ. Rũ yéma tümamaxütawa nangu ga Pauru, rü tümamaã nayumüxē, rü tümaetügu naxüxmēx, rü tüxũ narümexēē.

⁹ Rũ yexguma yemaxũ nadaugügu, rü Paurucèx yéma naxĩ ta ga guxũma ga togü ga idaaweexũ ga yema capaxũcũãx, rü narümeē.

¹⁰ Rũ nümagü rü muxũma toxna naxãmaregü. Rũ yexguma itaxĩächigu, rü toxna nananagü ga guxũma ga tanaxwèxexũ ga torü namawaũ ga ñna.

Dumawa nangu ga Pauru

¹¹ Rũ tomaēxpüx ga tauemacü yéma capaxüwa tayexmagü. Rũ ñuxũchi nagu tichoũ ga wüxi

ga wapuru ga yema capaxüwa gáuanexü ngu-petüxëxene. Rü Aleyãdríacüãx nixi ga guma wapuru. Rü napëxeraüwa nayexmagü ga taxre ga norü tupanachicünëxãgü ga Catu rü Porugu äegagüxü.

¹² Rü Chiracúchaarü türewa tangugü, rü tomaëxpüx ga ngunexü yéma tayexmagü.

¹³ Rü yéma itaxiãchi, rü nacutüarü ngaicamagu taxí ñuxmata Dequíuwa tangugü. Rü moxüãcü ínangu ga wüxi ga buanecü ga itaxixüwaama bucü rü toxü inicuetã. Rü yemaãrü moxüãcüama rü Puteriwa tangugü.

¹⁴⁻¹⁵ Rü yexma nüxü tayangau ga ñuxre ga duüxügü ga yaxögüxü. Rü toxna naxu na wüxi ga yüxü yexma naxütagu tarüchoxücèx. Rü marü wüxi ga yüxü ngupetügu rü itaxiãchi na namagu Dumawa taxixücèx. Rü marü toxü nacuáchigagü ga yema yaxögüxü ga Dumagugüxü. Rü yema nama ga Ápiugu äegaxügu naxí na yexma toxü yangaugüxücèx. Rü ñuxre rü yema nachica ga Tomaëxpüx ga Taxepataügu äegaxüwa toxü nayarünguxëëgü Rü togü rü nachopetü ñuxmata yema nachica ga Ápiuarü Ngüëchicagu äegaxüwa nangugü. Rü yexguma Pauru nüxü dèuxgu ga yema yaxögüxü, rü Tupanana moxë naxã rü porãcü nataãë. Rü yemaãcü Dumawa tangugü.

¹⁶ Rü yexguma Dumawa tangugügu rü wüxi ga ípatawa nananguxëëgü ga Pauru nüxíca namaã ga wüxi ga churara ga nüxna dauxü.

Dumawa nayexma ga Pauru

¹⁷ Rü tomaëxpüx ga ngunexü marü yéma nayexmagu, rü Pauru naxcèx nangema ga yema

Yudíugüarü ãëxgacügü ga Dumawa yexmagüxü. Rü yexguma nangutaquëxegügu, rü ñanagürü ga Pauru nüxü: —Choma, Pa Chaueneëgüx, rü taxuüma i chixexü chaxü namaã i tatanüxügü, rü bai i nuxcümaügüxü i tórü oxigücümagümaã. Natürü Yerucharéügu choxü niyauxgü ga tatanüxügü, rü Dumacüãx ga churaragüna choxü namugü.

¹⁸ Rü yexguma marü choxna nacagüegu ga Dumacüãxgü, rü choxü ningëxgüchaü, yerü taxuüma ga tacü ga chixexü chowa nadaugü na choxü yamëxgüxücëx.

¹⁹ Natürü yema tatanüxügü ga Yudíugü rü nayamuëtanü na tama choxü yangëxgüxücëx, rü yemacëx düxwa naxcëx íchaca na nümatama ya ãëxgacü ya Chécharu choxna çaxücëx. Natürü tama tatanüxügüxü na íchaxuaxüxücëx nixĩ ga yemacëx íchaçaxü.

²⁰ Rü ngëmacëx nixĩ i pexcëx nuã changemaxü na pexü chadauxücëx rü pemaã chidexaxücëx. Pema nüxü pecuëx rü yixema i Yudíugü rü ítananguxëë i na ínanguxü ya Cristu. Rü yima Cristucëx nixĩ i choma i ñuxma i daa cadenamaã chináixü —ñanagürü.

²¹ Rü nümagü nanangãxügü, rü ñanagürügü: —Toma rü taxuüma i popera i Yudéawa ne muxü i cuchigagu ümatüxü tayauxgü. Rü ngëma taeneëgü i ngëma ne íxü rü núma ngugüxü rü bai i wüxi i nüxü ixuxü i tacü rü ore i chixexü i cuchiga.

²² Rü cuxütawa nüxü taxĩnüëchaü rü ¿ñuxü ñacuxü i cumax? Erü nüxü tacuëxgü rü guxüwama i Yudíugü rü chixri nachiga nidexagü i ngëma ore i ngexwacaxüxü i Ngechuchuchiga —ñanagürügü.

23 Rû yexguma Paurumaã inaxunetagü ga wüxi ga ngunexü, rû napatawa naxĩ ga muxüma ga duïxügü. Rû Pauru namaã nüxü nixu ga Tupanaärü ore ga ñuxäcü âëxgacü na yiïxü ya Tupana. Rû pëxmama inanaxügü, rû ñuxmata nachütaxü rû nüxü nanangúchaüxëë ga yema duïxügü na Ngechuchuaxü yaxögüãxücèx. Rû yemacèx Moïché ümatüxü ga mugüwa rû nuxcümaügüxü ga Tupanaärü orearü uruügü ümatüxü ga orewa namaã nüxü nixu ga Ngechuchuchiga.

24 Rû nümaxü rû nayaxögü ga yema Pauru namaã nüxü ixuxü natürü ga togü rû tama nayaxögü.

25 Rû yexguma tama wüxigu naxĩnüëgu ga yema duïxügü, rû inanaxügü ga na íyaxïxü. Rû yemacèx ga Pauru rû ñanagürü nüxü: —Meã perü oxigümaã nidexa ga Tupanaãë i Üünexü ga yexguma Ichaxíaxü yadexaxëëgu rû ñaxgu:

26 “¡Rû ngema naxü, rû ngëma duïxügümaã nüxü yarüxu rû ñacurügü tá nüxü: ‘Rû woo nüxü pexĩnüëgu rû täütáma aixcüma nüxü pecuèxgü. Rû woo nüxü perüdaunügu rû täütáma aixcüma peyaxögü.

27 Rû ngëmaäcü pixïgü i ñuxmax, erü tama choxü pecuáxchaü i pemax. Rû tama nüxü pexĩnüë i chorü ore erü tama nüxü pexĩnüëchaü. Rû tama nüxü peyaxögü i ngëma choma pexü nüxü chadauxëëxü erü tama nüxü peyaxögüchaü. Rû tama peãëwa chaugu perüxĩnüë erü tama nüxü perüxoechaü i pecüma i chixexügü rû tama chaucèx pedaugüchaü na choma pexü chamaxëëxücèx!’ ”

ñanagürü ga Tupanaãe i Üünexü.

²⁸ Rû ñanagürü ta ga Pauru: –Rû name nixĩ i pema rû ta nüxü pecuèx rû ñuxma rû marü inaxügü na ngêma tama Yudíugü ixígxüñtanüwa naxunagüxü i ñãã Tupanaãrû ore i tüxü maxêxêxü. Rû nümagü tá nixĩ i aixcüma inaxĩnüèxü –ñanagürü.

²⁹ Rû yexguma Pauru yema ñaxgu, rû ínixĩ ga yema Yudíugü, rû poraãcü nügümaã íniporagatanücüü.

³⁰ Rû taxre ga taunecü ga mecü yéma nayexma ga Pauru nawa ga guma ï ga naxütanüne ga nagu na napexücèx. Rû yéma meãma nanayaxuxü ga guxüma ga duñxügü ga naxütawa íyadaugüxüxü.

³¹ Rû nüxü nixuchiga ga ñuxâcü ãëxgacü na yĩxü ga Tupana. Rû taxúema nüxna tanachuxu na nangúexêãxü ga Cori ya Ngechuchu ya Cristuchiga. Rû taxúema naxcèx tanachixewe.

**Tupanaarü Ore i Tórü Cori ya Ngechuchu ya
Cristuchiga
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

9d5dc22a-30be-5d26-85a9-76047f4c89e6